

Mataio

Yesugât hakulupne yâk yengât kot.

¹ Yuda luâk âmbâle areyengât hakuyenje kotne Abraham yâkgât bâgine siâ kotne Dawidi aregât bâgine siâ kotne Yesu Anutuje hunġunarġdo giep amâ yâkgât hakulupne are kotyene hin.

² Ulik ulik luâk kotne Abrahamne nanne kotne Isaka miep. Isakanje humo akmâ âmbâle mendo nanne kotne Yakobo miep. Yakobone humo akmâ âmbâle mendo nanne kotne Yuda miep. Akto nananlupne siânba meyegep.

³ Akto Yudanje humo akmâ âmbâle kotne Tama erânne mendo nanlogâtne lâuwâ meyelelep, kotypetne Perese akto Sera. Akto Peresene humo akmâ âmbâle mendo nanne kotne Hesoronj miep. Hesoronje humo akmâ âmbâle mendo nanne kotne Ram miep.

⁴ Ramne humo akmâ âmbâle mendo nanne kotne Aminadaba miep. Aminadabanje humo akmâ âmbâle mendo nanne kotne Nasonj miep. Nasonje humo akmâ âmbâle mendo nanne kotne Salamonj miep.

⁵ Salamonje humo akmâ âmbâle kotne Rahaba mendo nanne kotne Boasi miep. Boasine humo akmâ âmbâle kotne Ruti mendo nanne kotne Obede miep. Obedene humo akmâ âmbâle mendo nanne kotne Yese miep.

⁶ Yesene humo akmâ âmbâle mendo nanne kotne Dawidi miep. Dawidine luâk kotdâ akmâ malep.

Sop ain Dawidiņe Urigât âmbâle kambut mendo nanņe kotņe Salomo miep.

⁷ Salomoņe humo akmâ âmbâle mendo nanņe kotņe Rehabeam miep. Rehabeamņe humo akmâ âmbâle mendo nanņe kotņe Abia miep. Abiaņe humo akmâ âmbâle mendo nanņe kotņe Asa miep.

⁸ Asaņe humo akmâ âmbâle mendo nanņe kotņe Yosapata miep. Yosapataņe humo akmâ âmbâle mendo nanņe kotņe Yoram miep. Yoramņe humo akmâ âmbâle mendo nanņe kotņe Usia miep.

⁹ Usiaņe humo akmâ âmbâle mendo nanņe kotņe Yotam miep. Yotamņe humo akmâ âmbâle mendo nanņe kotņe Ahasi miep. Ahasiņe humo akmâ âmbâle mendo nanņe kotņe Hisikia miep.

¹⁰ Hisikiaņe humo akmâ âmbâle mendo nanņe kotņe Manase miep. Manaseņe humo akmâ âmbâle mendo nanņe kotņe Amonj miep. Amonņe humo akmâ âmbâle mendo nanņe kotņe Yosia miep.

¹¹ Yosiaņe humo akmâ âmbâle mendo nanņe kotņe Yekonia miep. Akto emilupņe meyegep. Akto sop ain kepia humo kotņe Babilonj aregât ambolupņande togom Yuda luâk hikom meyegi. Akto luâk âmbâle meyekmâ purik katmâ kewuguyekbiâ Babilonj kepiar arim hoņ bawa akyengim mali.

¹² Babilonj hânân mali aregât kakņân Yekoniaņe âmbâle mendo nananj kotņe Salatje miep. Salatjeņe humo akmâ âmbâle mendo nanņe kotņe Serubabe miep.

¹³ Serubabeņe humo akmâ âmbâle mendo nanņe kotņe Abiudu miep. Abiuduņe humo akmâ âmbâle mendo nanņe kotņe Eliakim miep. Eliakimņe

humo akmâ âmbâle mendo nanŋe kotŋe Aso miep.

¹⁴ Asoŋe humo akmâ âmbâle mendo nanŋe kotŋe Sadoko miep. Sadokoŋe humo akmâ âmbâle mendo nanŋe kotŋe Akim miep. Akimŋe humo akmâ âmbâle mendo nanŋe kotŋe Eliudu miep.

¹⁵ Eliuduŋe humo akmâ âmbâle mendo nanŋe kotŋe Eleasa miep. Eleasaŋe humo akmâ âmbâle mendo nanŋe kotŋe Matan miep. Matanŋe humo akmâ âmbâle mendo nanŋe kotŋe Yakobo miep.

¹⁶ Yakoboŋe humo akmâ âmbâle mendo nanŋe kotŋe Yosepe miep. Are humo akmâ Mariagât dâtâŋe dâmbiâ malep. Akto Marianŋe Yesu miep yâk âmâ, “Anutuŋe huŋgun aŋdo giep.” hain dâmaen.

¹⁷ Akto hain miawakmâ gayi, are Abraham yâkgâlânba miawakmâ gam Dawidi miawagep are luâk kâmotŋe kâmotŋe miawakmâ gambiâ gambiâ luâk kâmotŋe 14 agep. Akto luâk kotŋe Dawidi ainba gam Babilon hânân mali are âmâ luâk kâmotŋe kâmotŋe miawakmâ gambiâ gambiâ akai hainâk 14 agep. Akto ainba gam Anutuŋe nanŋe Kristo huŋgun aŋdo gem hânân miawagep are âmâ kâmotŋe kâmotŋe miawakmâ gambiâ gambiâ akai hainâk 14 agep.

Yesu miawagep.

¹⁸ Akto Anutuŋe Yesu Kristo huŋgun aŋdo gem Mariagât tepŋân meawakto Marianŋe miep aregât keiŋe amâ hin tatâp. Memeŋe Maria amâ Yosepegât dâtâŋe malep. Ikiŋeâk ikiŋeâk manbela âmâ Anutugât Wâtŋande memeŋe agaŋdo luâkŋe olop bo peniangim maliat. Yân potalakmâ manbela âmâ tepŋe agep.

¹⁹ Tepņe agep aregât Yosepeņe Anutugât den lokom malepgât biwiņande hin nâņgâep, “Nâņgât dâtâņe luâk siâņe miep gârâmâ luâk unduwâk dewunyeņân watere aņun aņgiwop dâm aregât yonâk watbe.” hain nâņgâep.

²⁰ Hain akmâ benņe aregât nâņgâm mando asinân Humogât aņelo siâņe hin dâm maganep, “Yosepe gâ Dawidigât hakuņe hin makgiņdere nâņgâ. Anutugât Wâtņande meme agaņdo Maria tepņe aktâp aregât memberâm hanâk han lâuwâ bo akben. Hanâk oloņmâ emetgân katmâ siân memben.

²¹ Dâ hinņe âmâ bo mendâlân Anutugât Wâtņande meme agaņdo nanņe membiap amâ yâkgât kotņe Yesu dâm konben. Akto kot aregât keiņe hin. Yâkgât kâmot bâleņe akmai aregât dosa pulimbo aregât Anutuņe yekto huraguwiap.” Aņeloņe hain dâm maganmâ hepulep.

²²⁻²⁵ Hain dâm maganmâ hepundo Yosepeņe agatmâ den are lokom Maria gala agaņmâ malep. Hain mando nanņe mendo Yosepeņe kotņe Yesu dâm kolep. Akto ainba peniangim maliat. Akto Anutuņe aregât keiņe miawagâk dâm ulikņân makto Propete siâņe hin kulengoep, “Âmbâle sigan siâņe nanņe siâ membiap aregât kotņe Imanue dâm konbai.” dâm kulengoep. Kot aregât keiņe amâ hin, Anutuņe nen olop manmap.

2

Luâk nâņgâ nâņgârâņe Yesu nanan togom egi.

¹ Luâk kotdâ siâ kotņe Herote are malep sop ain Maria akto Yosepe Betelehem kepia Yudaia hânân

talewân ain manbela Mariane Yesu miep. Mendo manbiâ luâk nângâ nângâyeŋe olop diâgât keiŋe nângâyiŋe dewutâ gaganângenba togom Yerusalem kepia Yesu miawagep aregen togom ambolupŋe aiyenŋum hin dâyi,

² “Nanan siâ Yuda yenŋât kembu miawagep aregât diâ kâmŋe dewutâ gaganângen ain miawakto ekten. Ekmâ kotŋe mem agatne dâm diâ watmâ hân kâlewângenba togoen aregât emet yâten miawaktâp?” hain dâyi.

³ Hain dâmbiâ luâk kotdâ Herote arekŋe hamep akto kepia ambolupŋande nângâm sân sân meyi.

⁴ Akto Heroteŋe sumbe kat kat luâk areyenŋât humomolupyeŋe akto Mosegât den kârikŋe makmâ kepigi are mem mendugu yekmâ hin dâm aiyenŋuep, “Yeŋe Anutune huŋgun aŋdo gewiap arekŋe kepia wânângen miawakbiap dâmai?” hain dâm aiyenŋuep.

⁵⁻⁶ Hain dâm aiyenŋumbo hin dâyi,

“Anutune makto propete siâŋe hin kulengoep, “Luâk kembu siâ Betelehem kepia bâlensiâ Yudaia hânân talewân ain miawakbiap. Miawakmâ manmâ nângât kâmot Israe luâk âmbâle yenŋât kautyeŋe manmâ damunyeŋe akbiap aregât Betelehem kepia bâlensiâ aregât nângâmbiâ agatbiap.” den hain kulengoep aregât Anutune huŋgun aŋdo gewiap yâkgât hin nângâen Betelehem kepian Yudaia hânân miawakbiap.” dâyi.

⁷ Den hain dâmbiâ Heroteŋe nanan are homban amon agep aregât nângâwerâm luâk nângâ nângâyeŋe olop diâ keiŋe nângâyi are yonâk

mem olonyegep. Olonyekmâ diâ miawagep aregât sopgât aiyenguep. Aiyengumbo sop maganbiâ hin makyengiep,

⁸ “Betelehem kepia ain arinet. Ain arim yeñe kârikñe akmâ nanan are undâgâtmâ mem miawakmâ âmâ togom kepia yâgâten miawagep are makniñbiâ nâkâ hainâk arim âmâ kotñe mem agatbian.” dâm heyengiep.

⁹ Hain dâm heyengimbo ariyi. Dâwân arim dewutâ gaganângen hân yenângen diâ kâmñe are miawakto egi are siâkâ miawakmâ pagaleñe yenngimbo watmâ arimbiâ nanan talep aregât emet kakñân kârigem talep.

¹⁰ Tato ekmâ aregât kambiamyene herone humo nângâyi.

¹¹ Akto emelan âgâm Marianje nanñe tambogo akmâ tato yelekmâ nanñe okot âlep aganmâ pâwutyene ligim kotñe mem agali. Mem agatmâ ito lândem katmâ tâwât dewunñe siâ me siâylene mem togoyi are akto goli akto lâwin hâkñe âlepñe are akto lâwin hâkñe siâ siâ are wani.

¹² Wanmâ tatmâ asin yem hin egi. Anutñe Herotegâlân bo purik katñet dâm asinân miawakyenngimbo agatmâ dâp siângenba purik katmâ kepiayenângen ariyi.

¹³ Purik katmâ arimbiâ Yosepenje asin yendo Kembugât anelo siâne miawaganmâ hin dâm maganep, “Nângât. Herotenje Mariagât nanñe moâk dâm komberâm aregât undâgâtmâ mandâp aregât agatmâ nanan menâi meyelekmâ Aigita hânân arim nângât dengât lângom manben.” dêep.

¹⁴ Hain dâmbo Yosepenje agatmâ nanan menâi

meyelekto hândâkñânâk Aigita hânângen agatmâ ariyi.

¹⁵ Akto ulikñân Humoñe den siâ propete siâgât biwiñân kato kulengoep are hin, “Nâñe nanne konmâ olonđere Aigita hân hepunmâ purik katmâ togowiap.” den are bunñe agep aregât Yosepeñe Herote mombiawân âmâ purikatbian dâm Aigita hânân lâmgom malep.

Heroteñe makto nanan gurukñe yenğuyi.

¹⁶ Akto luâk diâgât keñe nânğâyıñe Herote are bo miawagañmâ arimbiâ nânğâm biwiñe bâlimbo kuk agep. Akto luâk diâ keñe nânğâyıñe Kotdâ Nanñe miawagep aregât sop dâm miawakmâ magañi aregât nânğâm tembe luâklupñe are hunğun yenğimbo Betelehem kepia ain ariyi. Arim are ewumâk ewumâk kepia bâlen malen tali ain nanan miawagi are homban lâuwâ bo akyenğiep are hârogâk yenğumbiâ moyi.

¹⁷ Akto emelâk propete Yeremiane den hin kulengoep are bunñe agep,

¹⁸ “Siân âmbâle siâ kotñe Rahe yâkgât hakulupñe Rama kepiian manbai are siânbañe nananlupyeñe yenğumbiâ mombai aregât nânğâm inde humo indewai. Aregât luâk âmbâle bikñande kambiamyeñe sândugeâk dâm okot âlep akyenğimbiâ kambiamyeñe bo sândugewiap.” hain dâm kulengoep.

Den are bunñe akto Heroteñe makto nanlupyeñe yenğumbiâ memelupyeñe Rama kepiian Betelehem ginñân talep ain indeyi.

Herote mondo purik katmâ togoyi.

¹⁹ Akto Herote mondo, Yosepe Aigita hânân manmâ giwet ekto Humogât anjelo siâne mi-awakmâ den hin maganep,

²⁰ “Emelâk gasa akyengim Mariagât nanne kone dâm agi are hârok moyigât agatmâ nanañ menâi meyelekmenâ Yudaia hânân purik katmâ arinet.” dâep.

²¹ Hain dâm hepundo Yosepenne nanañ menâi are meyelekto Yudaia hânân purik katmâ togoyi.

²² Purik katmâ togombiâ den hin dâmbiâ Yosepenne nângâep, “Herote are mondo nanne kotne Akelao are ewenjaet gewâknân kinmâ Yudaia yengât luâk kotdâ mandâp.” dâmbiâ nângâep. Den are nângâm hamewakmâ Yudaia hân ain manberâm han lâuwâ agep. Hain akto giwelân Anutuñe miawaganmâ maganjo Yudaia hân hepunmâ Galilaia hânân ariyi.

²³ Galilaia hânân arim kepia siâ kotne Nasarete ain arim mali. Ain arim manbiâ aregât um-
bunân Anutugât propetelupñande den kulemgoyi aregât bikne hin tatâp, “Yâk âmâ Nasarete kepia ain gâtne.” hain tatâp. Den are bunne akto Yesuñe Nasarete kepien malep.

3

Yohaneñe âi keiñe katmâ den dâm makyengiep.

¹ Aregât haminân Yohane tu puli puli luâk yâkne âi keiñe katmâ Yudaia hân kamitnângen arim mando luâk âmbâle ekberâm arimbiâ hin dâm makyengiep,

² “Anutuñe damunyañe akberâm aktâp aregât agak memeyene bâleñe makmâ miawakmâ

panmâ han biwiyenê purik katnet.” hain dâm makyenêgip.

³ Akto ain manmâ den dâm makyenêgimbo aregât emelâk propete kotnê Yesaianê hin kulemgoep den are bunne agep.

Hân kamitnângen luâk siâ hin dâm tatbiap, “Ye kotdâgât dâp are megatnet. Akto gimbânê ukulenê me kundet kokonê hâgâm kigilikmâ ârândân ketugumbiâ dâp huraguâk.”

Den magep are bunne miawakto Yohane miawagep.

⁴ Akto Yohanenê âmâ hâk pekenê siâ songo kamele aregât dumutnande mendugum paruli are mem luguakmâ malep. Akto himbân tâknê siâ lalep. Akto sotnê âmâ mumak koanê akto duki kotnê kendemuñ are nem malep.

⁵ Hân kamitnângen are mando Yudaia hân ambolupnê akto Yerusalem aregât ambolupnê akto Yodañ tu biken biken tatmâ ariyi aregât ambolupnande kepia ainba denne nângâne dâm yâkgâlân togom menduguyi.

⁶ Mendugu akmâ tatmâ yenjaet agak memeyenê bâlenê are makmâ miawakmâ panbiâ meyekmâ Yodañ tuân meyekmâ gem tu puliyekminep.

⁷ Akto Parisaio akto Sadukaio are yengât kâmolân gâtne luâk âmbâle dondânê tu pulinenegâk dâm yâkgâlân togombiâ yekmâ hin dâm makyenêgip, “Ye âmâ niambigât kâmot. Bundâk biwiyenê purikato togoâi me?

⁸ Agak memeyenê bâlenê are panbiâ âmâ han biwiyenê Anutugâlânâk kindo aregât bunne hainare âlepneâk akmâ biwiyenê irakneâk manjet.

⁹ Akto biwiyenande hin bo nângâñet, “Nen Abrahamgât kâmot manden.” hain bo nângâñet. Aregât maktere nângâñet. Anutuñe dâwîap, “Kât irekñe Abrahamgât kâmot miawakñet.” dâmbô âmâ âlepñe miawakbai.

¹⁰ Akto hâuñe ye yenñiwiap, aregât den ginñe siâ maktere nângâñet. Luâk siâñe unam are emelâk dâtñe hâwim lâwin keiñân kalep are lâwin siâ bunñe bo yendo kârâm pando gembo kâlâwân ombiâ ombiap.

¹¹ Akto agak memeyenñe bâlenñe makmâ miawakmâ hepunbiâ âmâ biwiyenñe Anutu ikinâelân ari kindo aregât nâñe tuân katyekberân. Hain katyekmâ mandân are âmâ luâk siâ haminângen togom mandâp aregât kârikñe humo talañdâp. Yâk âmâ luâk Kotdâ. Dâ nâmâ luâk yânñe aregât nâñe yâkgât ito are mem gâunmâ golianbeangât dopñe bo. Yâkñe âmâ Anutugât Heak akto kâlâp puliyekbiap.

¹² Yâk gagap urutbiapgât mem togom sot koko welamñe ain gagap urutmâ heñgemgom âmâ sot bunñeâk kepilâm emelan kato tatbiap. Dâ gagapñe âmâ urutmâ ondo kâlâwân ombiap.” hain dâep.

Yohanenñe Yesu tu puliep.

¹³ Sop ain Yesuñe Galilaia hân hepunmâ arim Yodañ tuângen ariep. Arim Yohanenñe tu puli negâk dâm ariep.

¹⁴ Arim Yohane magaño Yohanenñe nângâmbo umatñe akto Yesugât den are mem ge katbe dâm hin dâep, “Gâñe nâ tu pulinekberâm nângâlân togoât are ârândânñ bo aktâp. Gâñe âmâ nâ tu pulinekmenâ dâine ârândânñ akbop.”

¹⁵ Hain dâmbo dêep, “Uṇak Anutuṇe nâṅgâp aregât nâṅgâmenâ umatṇe bo agâk. Akto netṇe Anutugât den lokoetṇe aregât Anutuṇe nâṅgâmbo ârândân akberâp.” hain dêep. Hain dâmbo Yohanene nâṅgaṇep.

¹⁶ Nâṅgaṇmâ tu pulimbo agatmâ âgâmbo ainâk himbim dâpṇe pâron âgâmbo Anutugât Heak arekṇe lâut kotṇe kembâ hain are akmâ Yesugât kakṇân gembo egep.

¹⁷ Gembo ainâk himbimânba Anutuṇe den siâ hin dêep, “Ekṇet. Imâ nâṅgât nanne. Kambi-amne are yâkgâlâk nâṅgâm manman aregât ekmâ ukenṇe nâṅgân.” dêep.

4

Hiangi Ambonjande Yesu dop kombo âmâ Yesuṇe kârikṇe agep.

¹ Akto sinduk baniara bâleṇe yengât humoyeṇe Hiangi Ambone arekṇe Yesu biwiṇe dop kowerâm agep aregât Anutugât Heakṇe Yesu oloṇdo hân kamitṇângen ariep.

² Ain arim sot bâlâk mando hilâm hândâk 40 bo akto mopṇe dondâ aguep.

³ Mopṇe agumbo âmâ Hiangi Ambone arekṇe yâkgâlân arim hin magaṇep, “Gâ bunṇe Anutugât nanṇe mandât akto mopge aguâpgât makmenâ kât irekṇe sot akto ne.” hain dâm magaṇep.

⁴ Magaṇdo Yesuṇe hin dêep, “Bo. Anutuṇe den hin makto kulemgoyi are yendâp, “Luâkṇe sotgâlâk dâm mando âmâ manmanṇe bo miawak-biap. Anutugât denṇe mem lokomâk mando manmanṇe ârândân akbiap.” hain kulemgoyi.” dêep.

⁵ Hain dâmbô Yesu mem Yerusalem kepia humoân sumbe kat kat emetnje talep aregât bokñân olonđo âgâep.

⁶ Âgâ kato kindo hin dâm maganjep, “Anutunje makto siâ hin kulemgoyi tatâp, “Anutunje kâlân gugum keige hârewopgât anjelolupnje hunğun yengimbo mengekbiâ bo guguwerâp.” den hain tatâp aregât gâ Anutugât nanje mandân dâmat amâ inba sopanmenâ anelone mengeknet.” dâep.

⁷ Dâmbô Yesunje dâep, “Bâe. Hain bo. Anutunje makto siâne hin kulemgoep, “Anutu Humoge bo dopkowen.” Den hain tatâp aregât lauge bo lokowerân.” dâep.

⁸ Hain dâmbô mem gimbâne kâlep siân olonđo âgâep. Âgâm kindo ain hânje hânje luâk kâmotnje kâmotnje kotdâlupyeje manmâ ariyi are yengât kotne egâlian siâ siâ keiñe keiñe are hekalanmâ hin dâep,

⁹ “Nâne ire hârok damunyeje akman. Aregât gâ ga okotnân kinmâ ulit niñmâ nângât nângâmenâ agato damunyeje kat gektere damunyeje akbiat.” dâep.

¹⁰ Hain dâm maganđo Yesunje hin dâep, “Bâe. Hain bo. Anutunje den siâ hin dâep are tatâp, Anutu Humoge konok gala aganmâ hon aganmâ akto ikinje den lokoanmâ kotne mem agatben. Den hain tatâp aregât ya maktât are bo lokowerân. Hiangi Amboñe, gâmâ hepun nekmâ ari.” dâep.

¹¹ Dâmbô hepunmâ ariep. Arimbo Yesu hân kamitñangen tato anjelolupnje togom hon aganmâ tângoyi.

Yesunje Galilaia hânân ari manmâ Anutugât den

dâm makyengim malep.

¹² Akto aregât kaknân hân aregât luâk kotdâ Herotenje dâmbo Yohane mem lope kâlegen katbiâ talep aregât pat Yesunje nângâm Galilaia hânângen ariep.

¹³ Ain arim âmâ Nasarete kepia are hepunmâ Kapanaum kepia ain arim tatmâ malep. Akto Kapanaum kepia ain dengân humo siâ kotje Galilaia dengân aregât dâtñân tatmap. Akto dengân are hân lâuwâ kotyetje Sebuloj akto Naptali are yetgât ginnân tatmandat.

¹⁴ Akto Yesunje kepia ain ariep aregât emelâk Anutunje dâmbo propete Yesaianje den hin kulemgoep are bunje agep,

¹⁵ “Sebuloj akto Naptali hân are Galilaia luâk âmbâleje Anutu bo nânganmai yâk yengâlai dengân akto Yodan tu biken tatmandat.

¹⁶ Areyetgât ambolupñande Anutugât bonângâm manmai. Hain manbiâ biwiyenje gisap agum hândâgân yendo pagalenande siliñ siliñ dâm ewuyekto biwiyenje pâronj âgâwiap. Akto ain hilip aguwai aregât pat katyengiep yâk yengâlan pagalenje humo miawakto biwiyenje pâronj âgâwiap.”

den are hain tatâp. Den are bunje miawakto Yesunje ain malep.

¹⁷ Ain manmâ keñje katmâ hin dâm makyengiep, “Anutunje damunyenje akberâm aktâpgât agak memeyenje bâleje makmâ miawakmâ hepunjet.” hain dâm makyengiep.

¹⁸ Akto sop ain arim Galilaia bâtgum ginnân arim luâk lâuwâ emi teu injan oloñmâ manbela yelegep.

Siâ âmâ kotņe Simon kotņe siâ Petoro akto emiņe âmâ Anderea yâkņe waņgan kinmâ ņalu ņalu are bâtgumân iņangât panmâ kiliat.

¹⁹ Akto Yesuņe yelekmâ hin dâm makyetkiep, “Yetņe nâņgâlân gambela arine. Hinņe âmâ iņangât âi mendat. Dâ nâņe âmâ tânyetkure luâk nâņgât kâmot akbaigât âi membiandat.” dâep.

²⁰ Hain dâmbo ainâk dowâk wan me wan hârok hepunmâ Yesu olop arimbela mali.

²¹ Akto arim âmâ emiteu lâuwâ mem miawakyelelep kotyetņe Yakobo akto Yohane yâk Yebedaioġât nanlogâtņe. Eweyetņe olowâk waņgan tatmâ ņalu ņalu iņangât are mem parutmâ heņgemgom kili.

²² Kinbiâ Yesuņe yetkondo dowâk waņganba gem eweyetņe hepunbela Yesu olop ariyi.

²³ Akto Yesu Galilaia hân are hâlâņmâ kepia bâleņ bâleņ den emetņe talewân ain âġâm Anutuņe damunyene akberâm agep den pat âlepņe areġât keiņe dâm makyeņgiep. Akto luâk âmbâle kundat keiņe keiņe aġi are hârok heņgem yeņguep.

²⁴ Hain akto den pat arekņe Siria hânâņgen sambelem arimbo nâņġâm âmâ luâk kundat aġi akto hâk hilâlâm olop mali are kâmotņe kâmotņe mem yâġġâlân oloņ yekmâ togoyi. Akto sinduk baniarane mem bâliyegi are akto dewun biri akmâ mali akto luâk kei bâtyene bâli bâliņe are meyekmâ yâġġâlân togombiâ hârok heņgem yeņguep.

²⁵ Akto Galilaia hân akto kepia bât bip bip hârok ain tali kotyene humo siâ Dekapoli dâm koli are akto Yerusalem akto Yudaia hân akto Yodaņ tu biken ain luâk âmbâle kâmotņe kâmotņe mindugu akmâ Yesuġâlân togoyi.

5

Yesune gimbân mi makyengiep.

¹ Akto Yesune luâk âmbâle kâmot humo are yekmâ âmâ gimbâne siân âgâep. Âgâ tato âmâ âi luâklupne ginjân gambiâ

² den hin dâm makyengiep,

³ “Biwiyenande yenjaet nângâmbiâ gembo nen luâk yânne manden hain nângâmai amâ Anutune are yengât nângâm himbimgât pat emelâk yengiepgât aregât biwiye herone agâk.

⁴ Akto bâlenjaet nângâmbiâ biwiye bâlimbo indem manmai are Anutune hâmbâi mem sândukjân katyekbiap aregât kambiamye herone akto manbei.

⁵ Luâk lumbe herone manmai yâk yengât nângâre âlepne akmap. Yâkne hân hârokgât ambo akbai aregât biwiye hinne herone agâk.

⁶ Akto bikjande sotgât tugât umburuk akmâ amâ tu sot aregâlâk nângâmbiâ humo akmap dop hainâk âlepne aknegât nângâmbiâ humo akmap yâk amâ tepye pikto sândugewiap aregât biwiye hinne herone agâk.

⁷ Akto luâk âmbâle yengumbiâ hâune bo memai amâ akbiâ âlepne akmap amâ Anutune hainâk âlepne akyengiwap aregât biwiye herone agâk.

⁸ Akto biwiye Anutu gâlânâk kinmâ kau kau akto ikinne denne lokom biwi lâuwâ bo akmâ manmai are amâ Anutu dewunyenande ekbai aregât biwiye herone agâk.

⁹ Akto biwiyenande gala konok manne dâmai are Anutune meyekmâ, “Nune nanne baratne.” dâmap aregât biwiye herone agâk.

10 Akto Anutugât den lokom manbaen dâmbiâ gasalupyenande kuk akyengimai aregât hanâk denne lokom manmai are yengât Anutunje damun nenne akmap aregât biwiyenje heronje agâk.

11 Akto nângât akmâ manmai are hâk hilâlâm yengim den bâlenje makyengim hâkyenje tunmai.

12 Hain akyengimbiâ âmâ ainâk hin nângâwai, “Ulikjân Anutugât propetelupne are siânbaen hanâk bâlenje akyengiyei dop hainâk hinne hainâk bâlenje aknengimai aregât siân hâuñe âlepne manmâ himbimân membaen.” dâmai aregât biwiyenje heronje agâk.

Kâtembe aregât dop.

13 Akto aregât den ginne makyengire nângâñet. Nen âmâ kâtembe mem sot kakjân katenne ukenne akmap aregât dopne hainâk akmâ yeâmâ luâk âmbâle hut yenân manmai. Akto kâtembe are ukenne. Gârâmâ bo damunne akbiâ âmâ pâlâmne akto âmâ gain gain lâuwâñe ketugumbiâ ukenne lâuwâñe akbiap? Are bo agakñe. Arekñe hin me hain agakñe bo tatâp amâ yân kâim panmâ keinennande tâlimaen.

Kemdâ pagalenje aregât dop.

14 Akto ye luâk âmbâle hânñe hânñe manmai are yengât ululunne mandâi. Kepia humo siâ gimbâñe tek tekjân tatmap are heambukbiapgât dop bo tatâp.

15 Akto kemdâ are gaunmâ katmâ âmâ bo mem heambukmaen are tek tekjân katenne om pagalembo emet ambolupñande pagalenje yengimbo tatmâ manmai.

16 Aregât kemdâ pagalenje omap dop hainâk yenje Anutugât den lokom agak memeyenje âlepneâk akmâ manbiâ luâk âmbâle yânñande yekbiâ ârândân akto Eweyenje himbimân manmap aregât kotnje nângâmbiâ humo akbiap.

Yesunje Mosegât akto propete yâk yenğât den bo komberâm giep.

17 Akto siâ makbe. Yenje âmâ nângâ yâkgât hin dâmai me bo? “Mosenje den kârikne kulemgoyi are akto propete yâkne den kulemgoyi are komberâm aktâp.” Nângât hain nângâmai me? Nâne âmâ propete yenğât den are komberâm bo geân. Bo kârikne. Nâne are yenğât den lokore bunne agâkgât geân.

18 Nâ bundâk makyengiwe. Hân himbim yembaliandâ dopñânâk den kârikne yem âgâwîap. Ulikne siâ yem tik panbiapgât dopne bo. Are hârok bunne olowâk miawakmâ metewiap.

19 Aregât luâk siâne den kârikne konok pâne siâ are longaim âmâ bikñande hainâk akñet dâm yâk yenğâlân arim hain dâm hâwât yekbiap yâkne âmâ himbingât kâmolân dewatim luâk gegenje manbiap dâwaen. Hain gârâmâ luâk siâne den kârikne are lokom manmâ bikñande hainâk akñet dâm yâk yenğâlân arim hain dâm hâwât yekbiap yâkne âmâ himbingât kâmolân dewatim âmâ luâk humo manbiap dâwaen.

20 Aregât makyengire nângâñet. Yenje âmâ Anutugât den lokom manmâ Mosegât den kârikne makmâ kepikmai are akto Parisaione wan me wan âlepne akmai are bo ewangim âmâ himbingât kâmot bo akbai.

Kuk bo akbaen.

²¹ Bâgilupnennande den hin dâm kali, “Gâne luâk siâ bo komenâ mombiap. Dâ hain akbiat âmâ Anutuŋe denân katgektô dosa membiat.” hain dâm kali.

²² Hain gârâmâ nâne âmâ maktere nângâŋet. Luâk me âmbâle siâne galaŋaet kuk nânganbiap are Anutuŋe denân katbiap. Akto luâk siâne galaŋaet nângâmbo gemap are humomolupyenande menduguyekmâ dâm makmâ hâreyengiwei. Akto luâk me âmbâle siâne galaŋaet nângâmbo gembo biwi bâle akmâ hengân nânganmap are âmâ kâlâpgât pat akmâ dosa umatŋe membiap.

²³ Aregât hin dâre nângâŋet. Yengâlân gâtŋe siâ me siâne Anutugât sumbe omberâm akmâ âmâ biwiŋe kepiak akto hin nângâwip. Nâne galane umatŋe agaŋân aregât kuk akniŋdâp.

²⁴ Hain dâm sumbe are hepundo tato galaŋaelân ariwip. Arim den yetŋe are makmâ ârândân ketugumbela bo akto ainâk purik katmâ arim sumbe are Anutugât pat ketugum onmenâ âlepŋe ombiap.

²⁵ Akto gasagande mengekâmâ kiapgâlân arim denân kat gekmâ dâm hâregiŋdo tembe lokolupnande mengekâmâ kala busiân katgekbâi aregât dâwân arim galage makmâ miawaganmenâ yetŋeak nângâm gala agaŋgiwiandat.

²⁶ Borâm hâre aŋgiwiandat akto âmâ kala busiân katgekbâi tatmâ âmâ yân bo gewiat. Hâu hârok puligom kutigitbialân âlepŋe ain gewiat.

Gala siâgât âmbâle ekmâ bo egâlianbaen.

27 Akto siâ makbe. Moseŋe den kârikŋe kulemgoep are hin dâmbiâ nâŋgâmai. Yeŋgâlân gâtŋe siâŋe galaŋaet âmbenŋe ekmâ kakŋe kom bo membiap. Hain dâmai.

28 Aregât nâŋe âmâ hin dâre nâŋgâŋet. Yeŋgâlân gâtŋe siâŋe âmbâle siâ ekmâ memberâm nâŋgâm âmâ ikinŋe biwiŋande emelâk miep aregât dosa talaŋdâp. Aregât den memenŋe hin dâwe.

29 Gâ hememgât pat akbâtgât dewunge bungenŋe bâlenŋe membom dâm nâŋgâm âmâ dewunge are ewum limbâpkowen. Hain akmâ dewunge bikŋe siâ are âlepŋe akto manmenâ ârândân akbiap.

30 Akto hememgât pat akbâtgât hainâk bâte bungenŋe bâlenŋe akberâm akto âmâ hârem panben. Hain akmenâ bâte bikŋe are âlepŋe akto manmenâ ârândân akbiap.

Âmbenlupnenŋe hanâk hepun yekbaengât dop bo tatâp.

31 Bikŋande amâ hin dâmai, “Luâk siâŋe âmbenŋaet hâkân akmâ hepunbe dâm aregât kulem esenŋe siâ mem âmbâi hepun hepun gât kulemgom waŋmâ huŋgun aŋdo yân ariwiap.” hain dâmai.

32 Aregât nâŋe âmâ hin dâm makyenŋiwe. Luâk siâŋe âmbenŋe kondarâ bo akbiap are yân hâkân akmâ heundo âmâ âmbâle arekŋe luâk siâ mendo âmâ luâk âmbâle lâuwâ lâuwâ dosa membriandat. Akto luâk aŋgâŋe âmbâle hepun hepunŋe mem âmâ yâkâ hainâk dosa membriap.” hain dâep.

33 Akto Yesuŋe den siâ hin dâm dewatiep, “Bâgi hakulupyenŋe hin dâm makyenŋiyi, “Anutugât

metenân hin me hain dâm makbai amâ hainâk akbei.” hain dâyi.

³⁴ Dâ nâmâ hin makyengire nângânet. Hinne âmâ Anutugât metenân dâm bo makbei. Akto areâk bo. Himbimân âmâ Anutuņe ain tatmap aregât himbimân bo horatmâ makbei.

³⁵ Akto hângâlân horatmâ bo makbei. Amâ wangât? Hingât. Anutuņe keiņande tâlim tatmap aregât. Akto Yerusalemgât metenân bo makmâ horatbei. Amâ wangât? Hingât. Yerusalem amâ Anutu Humoyeņe yâkgât kepia kautņe aregât.

³⁶ Aregât ire maktere nângânet. Dumutyene bândup are makbiâ helen bo akbiap. Akto helen are makbiâ bândup bo akbiap. Aregât kautyenân horatmâ bo makbei.

³⁷ Akto siân me siân bo ewum makbai. Are bo agakņe. Aregât denyene are bunņe akto âmâ are dâmbiâ bunņe akbiap. Akto bo dâmbiâ bo hainâk akbiap. Aregât kakņân makmâ dewatiwai amâ Hiangi Amboņande hâwâtyekto miawakbai.

³⁸ Akto den siâ hin kulemgoyi are makbiâ nângâmai, “Gasagande dewunge ewum hogombo bokto âmâ gâkâ hainâk dewunņe ewum hogomenâ bokbiap. Akto gasagande dâtge kom bererek kombo âmâ gâkâ hainâk dâtņe are kom bererek kowen.” hain dâyi.

³⁹ Aregât âmâ hin dâre nângânet. Luâk bâlene gala aganben. Ondopge biken hogombo âmâ on-dopge bikņe wanben.

⁴⁰ Akto luâk siâne gâ olop ewangiak ewangiak bâlene dâm kiapgâlân mengekma ari denân katgekma gângât hâk pekege timonân oloņmâ menjinđo âmâ kakņân olowâk are hainâk mem

wanmenâ lâuwâ lâuwâ membiap.

⁴¹ Akto luâk siâne, “Nângât wan me wan dewunne siâ siâ lokom kepia indâgen ari.” dâm makgingdo âmâ gâne kepia magep ain lokom tângom ewangim indânân ari katben.

⁴² Akto luâk siâne wan me wan siâ siângât ulit gindo âmâ are wanben. Akto wan me wan are yân yogan mem manbe dâm makgingdo âmâ âlepne nânganben. Ye hârok hain akmâ manbei.

Gasa me gala are gala konok aganjiwaen.

⁴³ Akto ye bikjande den siâ hin dâmbiâ are nângâmai, “Gâne galage âlepne biwi herone aganben. Dâ gasage are âmâ gasa aganben.” Hain dâmai.

⁴⁴ Dâ nâmâ aregât hin dâre nângânet. Yeje gasalupyene yekmâ âmâ gala akyengiwei. Akto ye yengum watyekmâ manmai yâk yengât tânyengum Anutu ulilanjmâ herone nângâ yengiwei.

⁴⁵ Hain akmâ himbim Eweyenjaet nanne baratne bunne akmâ manbai. Yâkne âmâ makto yanep pagalenjande luâk âlepne me bâlene hârok pagaleyekmap. Akto tânâkgât makto luâk âlepne me bâlene hanâk hologoyengimap.

⁴⁶ Akto luâk siâne ye olop gala konok manne dâm aregât akyengimai yâk konok yeje gala akyengimbiâ âmâ Anutune wan hâune yengiwiap? Luâk bikjande gawamangât puli meyenjimaine hain akmai aregât yeje luâk bikne gasa akyengim are gala bo akyengimbiâ âmâ aregât hâune hâmbâi Anutune ye yengiwiap.

⁴⁷ Akto galalupyene yâk konok yekmâ gala katyekmai arekne ârândân bo akmap. Luâk âmbâle

Anutu bo nângaṇmaiṇe hain akmai. Aregât yâkâ hainâk akbai aregât hâuṇe âlepṇe Anutuṇe bo yeṇgiwiap.

⁴⁸ Aregât himbimân Eweyeṇande wan me wan akmâ mendo huragumap yekâ hainâk akmâ manbei.” dâep.

6

Anutugât âiân manmâ kotnenṇe bo mem agatbaen.

¹ Akto Yesuṇe den siâ hin makyenṇieṇ, “Gâṇe Anutu heruṇe agaṇdere ârândân akbiapgât mene dâm âmâ luâk âmbâleṇe nekbiâ huraguâkgât bo nâṅgâm manben. Hâk mem agat agat akmenâ âmâ himbimân Ewegande gekmâ aregât ukenṇe bo nâṅgâ giṇmâ hâuṇe âlep bo giṇbiap.

² Aregât gâṇe luâk umburuk manmai are han kalem akyenṇim âmâ luâk âmbâleṇe nekbiâ huraguâk dâm aregât bo nâṅgâm manben. Wangât? Hingât. Luâk bikṇande nen bâleṇe bo akmaen dâmai arekṇeak dewunyeṇânâk den emetṇân akto kâmot keṇian ain hâkyeṇe mem agatmai. Luâk hain arekṇe kâmot humoân kinmâ kalem akyenṇimai. Aregât maktere nâṅgâṇet. Hain dâmat are Anutuṇe hâuṇe âlepṇe bo giṇbiap. Emelâk hâuyeṇe yendâp.

³ Aregât luâk umburuk manmai yâk han kalem akyenṇiwe dâm bâteṇe bungenṇe wan akbiat aregât kanegenṇe bo nâṅgâwiap.

⁴ Yoṇâk akmenâ âmâ galalupgande bo gekmâ aregât keiṇe bo nâṅgâmbiâ âmâ Ewege Anutuṇe yoṇâk yekmâ nâṅgâmapṇe ikinak gekmâ nâṅgâambo

ârândân akbiap. Akto kalem akyengimatgât hâuñe giñbiap.

Anutu ulilañbaengât keiñe.

⁵ Gâñe âmâ heambukmâ kinmâ Anutu âlepñe dâm ulilañben. Dâ luâk bikñe âmâ hiañgi luâk manmaine hain bo akmai. Yâkñe âmâ Yuda luâk mendugum tatmaiân me kâmolân ari kinmâ âmâ luâk âmbâlñe nenekmâ egâlianñet aregât nâñgâm hâkyeñe mem agatmâ Anutu ulilañmai. Aregât âmâ hin dâre nâñgâñet. Yeñe hain akbiâ âmâ aregât hâuñe emelâk membiâ bo aktâp. Anutune hain dâm hâuñe siâ bo dewatim yenñiwiap.

⁶ Gâ âmâ Anutu âlepñe dâm ulilañberâm âmâ emetgân âgâm heambukmâ hâñgi gugum Ewege tikñân manbiap yâk ulilañben. Akto Ewege tikñân siâ me siâ ekmâ nâñgâmapñe bunñe mem peniañmâ giñbiap.

Anutu hin ulilañmâ manbaen.

⁷ Akto aregât hin dâre nâñgâñet. Luâk bikñande Anutugât keiñe bo nâñgâmaine âmâ hin nâñgâm hilipkomai, “Nengât den kâlep hanâk hanâk ulilañdenñe dowâk nâñgâm bunñe nengiwerâp.” hain dâm hilipkomai. Aregât gâñe luâk hain are bo akmâ âmâ den kâlep bo makmâ ulilañben.

⁸ Akto gâ amâ Ewege Anutu irawot bo ulilañmenân yâkñe soñ nâñgâ giñmap. Aregât hanâk hanâk bo makmâ ulilañben.

⁹ Aregât gâñe hin dâm âlepñe dâm ulilañben, “Himbimân Ewenenñe gâñgât kotge âlepñe akto kotge are kârikñe tato nâñgâenñe bunñe akto manbaen.

¹⁰ Akto hân ârândân Kembu aknengi. Himbimân gâtñande lauge lokomai hainâgâk hânân gâtñe nenñe lauge lokoenñe ârândân agâk.

¹¹ Akto unjak ire gâñe sotnenñe are dopnenñânâk nengimenâ nene.

¹² Akto luâk âmbâle bikñande bâleñe siâ siâ ak-nengimbiâ âmâ are yengât dosayeñe hanâk hepun yengim manmaen dop hainâk gâñe dosanenñe are hepun nengiwen.

¹³ Nen bo dop nenguwen. Akto bâleñânba kotgâm menenekben. A bundâk.” Yeñe hain dâm Anutu ulilañbei.

¹⁴ Aregât luâk âmbâle bikñande bâleñe siâ siâ akyengimai are yengât dosa hepun yengimbiâ âmâ âlepñe. Aregât himbimân Eweyende yengât dosa hainâk hepun yengiwiap.

¹⁵ Are âmâ luâk âmbâle bikñande bâleñe siâ siâ akyengimai are yâk yengât nângâm âmâ benñe himbimân Eweyende yengât dosa hainâk bo hepun yengiwiap. Dâ hepun yengimbiâ âmâ benñe dosayeñe hepunyengiwiap.

¹⁶ Akto hiangi luâkñe hin dâmai, “Luâk âmbâle bikñande nen hâk hilâlâm nângâm Anutu ulilañmaen are nângâm nen nenekmâ egâliññet.” dâm aregât sot hepunmâ hâmeyeñe oloñbiâ gembo hewugewai are Anutune yekmâ hâuñe âlepñe bo yengiwiap.

¹⁷ Aregât ye hain bo akbei. Yeñe âmâ sot hepunmâ âmâ tu puliakmâ dumutyene kelu ketugu akmâ manbei.

¹⁸ Hain akbiâ yekmâ âmâ sot hepunmâ mandâigât keiyene bo nângâwai. Eweyene Anutune bo egekñe ekmapñe keiyene yonâk

memai are nângâm aregât hâuñe âlepñe yeñgiwiap.

Puli siâ siâ tat nengiâp aregâlâk bo nângâm man-baen.

¹⁹ Hângât tâwât dewunñe siâ siâ tiñe nemai akto dek sañ saññe hâreyengimai akto motmot akmap akto kâmbu meyeñgimai aregât yeñe dondâ tat nengiâkgât bo undâgâtbei.

²⁰ Are âmâ himbimân tiñe bo neyeñgimap akto dek sañ saññe bo igim hâreyengimap akto motmot bo akmap akto kâmbu bo meyeñgiwai aregât wan me wan bunñe kârikñe tat yeñgiwiap. Aregât Anutunñe pat katyeñgiep are himbimân tatâp ain dewatimbiâ bo gulip akyeñgiwiap.

²¹ Tâwât dewunñe siâ siâyene katbiâ tat yeñgimap ainâk biwiyeñe kinmap aregât himbimgât nângâmbiâ âgâwiap.

Biwinenñande pâlmñe akbopgât biwi golâk man-baen.

²² Akto dewunyeñe âmâ pagaleñe dop hainare aktâp. Dewunyeñe âlepñe tato ain âmâ âlepñe ekmâ bam gutbai.

²³ Dâ dewunyeñe bâlimbo âmâ biwiyeñe hândâk humo dâgâwiap aregât biwiyeñân pagaleñe tatâp are bokbiap âmâ biwi nângâ nângâyeñe pâlmñe akbiap.

Anutu konok hoñ agañbaen.

²⁴ Nanañ konokñe luâk kotdâ lâuwâ yâk yetgât den lokom âmâ âlepñe hoñ bo manyetkiwiap. Siâ gala agañmâ siâ âmâ hâkân agañbiap. Akto siâgâlângen dewatim siâ âmâ hamianbiap. Puli siâ siâgât ukenñe nângâmai yâkñe âmâ gain gain Anutugât den lokom manbai?

Anutuŋe damun nenŋe akmapgât bo nelâm nengiwiap.

²⁵ Ye manman yenjaet nâŋgâmâk akmâ hin bo dâwei, “Wan arekŋaet mem nem manbaen? Akto hâknennjaet nâŋgâm wan mem manmâ luguakbaen.” dâm nâŋgâmâk bo akbei. Amâ hingât. Bâin dâŋet. Manmanyenande bunŋe me sotŋe bunŋe? Akto hâkgande bunŋe me hâk pekegande bunŋe?

²⁶ Aregât siâ maktere nâŋgâŋet. Lâut are ekŋet. Arekŋe âmâ âi bo ketugumâi. Akto kalamŋânba sot wan bo mem katmai. Akto sot hapatet bo ketugum âmâ alekŋe bo mem katmai. Hain bo akmai amâ himbimân Eweyenande hanâk sot mem miawak yengimap. Ye lâut bo. Ye luâk aregât Anutuŋe dowâk tânyengumap.

²⁷ Akto yengâlân gâtŋe siâŋe nâŋgâm hanoko akmâ âmâ manman sopŋaet âlepŋe kâlep mem dewatim manbiapgât dopŋe bo tatâp.

²⁸ Akto sângum lâuwâ lâuwâ aregât nâŋgâm han lâuwâ akbiâ bâliwiap. Aregât hin dâre nâŋgâŋet. Lâwin buluŋe are ekŋet. Arekŋe âmâ sângum lâuwâ lâuwâgât âi bo ketugumap.

²⁹ Buluŋe are âlep âlep aregât luâk siâ kotŋe Salomo ulikŋân malep yâkŋe sângum lâuwâ lâuwâŋe kulem melem âlep âlep hain are mem malep arekŋe buluŋe are bo ewangiep.

³⁰ Pâlônângen siâ me siâ buluŋe unjak miawakmap akto hole bererek âgâm gembo ombiâ bo akmap aregât Anutuŋe dâmbo hanâk kulemŋe âlepŋe miawakmap aregât Anutu bo nâŋganmâ ketelanmâ manmaine yâk yenjaet gai hainâk dâmbo wan me wan miawakyenŋiwiap.

³¹ Are nângâm heŋgemgoweï. Are ekmâ nângâm âmâ bo hanokoakmâ âmâ hin bo dâwei, “Wan nemberen me wan lalakberen?”

³² Are âmâ luâk bikŋe Anutu bo nângaŋmai arekŋe âmâ puli me sâŋgum me siâ siâ aregât nângâmbiâ humo akmap. Hain akbiâ bâlimap aregât hain bo akmâ manbei. Are âmâ benŋe himbimân Eweyeŋande nângâ yeŋgimap aregât hâk peke bâlâk bo manmai.

³³ Yeŋe âmâ Anutuŋe damun nenŋe akbiapgât akto yâkgât agak meme ârândân dâp ain han nângâ nângâyeŋe ulikŋân katbiâ yembiâp. Akto aregât kakŋân Anutuŋe siâ me siâ bikŋe are hârok yeŋgiwiap.

³⁴ Aregât yeŋe agatmâ umatŋe gain hin arekŋe miawak nengiwiap hain dâm aregât nângâmbiâ humo bo akbiap. Agatmâ miawakbiap are âmâ agatmâgât pat. Uŋak iregât hain are miawak nengiâp are ârândân agâk dâm aregât kakŋân han lâuwâ bo akŋet.” Yesuŋe hain dâep.

7

Gala siâgât den bo makmâ hâreaŋbaen.

¹ Yesuŋe den siâ hin dewatim makyenŋieŋ, “Anutuŋe den âiân katyekbopgât yeŋe luâk bikŋe den âiân bo katyekbei.

² Dâ yeŋe yâk yeŋgât den dâm hâre yeŋgiwai dop hainâk Anutuŋe ye dâm hâre yeŋgiwiap. Akto yeŋe siâ siâ akyenŋiwei dop hainâk Anutuŋe mem purik katmâ akyenŋiwiap aregât siâgât bo dâm hâreyenŋiwei.

³ Aregât den dopŋe hin dâre nângâŋet. Gâŋe galagaet dewunŋân gagap bâlensiâ tatâp are ekmâ

âmâ guge dewungân gagap humo dondâ tatâp are bo ektât are ârândân bo aktâp.

⁴ Gagap humo guge dewungân tatâp are bo ekmâ galagaet dewunnân tatâp aregât hin dâmenâ ârândân bo akbiap, “Galane kin. Gagap mem pan ginbe.” dâwiat.

⁵ Hiangi luâk gâ. Guge dewungân gagap humo tatâp a sonj mem panakmâ âmâ ekmâ dewunge hulanj akto âmâ ekmâ henggom âmâ galagaet dewunnân gagap bâlensiâ tatâp are memenâ ârândân akbiap.

⁶ Yeñe Anutugât sot are dua bo yeñgiwai. Hain akbiâ âmâ yeñguwai. Akto puli umatñe are mem bau kâit bo yeñgiwai. Hain yeñgimbiâ âmâ igim hârem purik dâm âmâ yeñgiwai.” Yesuñe hain dâep.

Anutu ulilanmâ âmâ bunje membaen.

⁷ Akto Yesuñe den siâ hin dâm makyengiep, “Yeñe hin aregât undâgâtmâ Anutu maganbiâ âmâ tân yeñguwip. Akto emet ginnân kinmâ woa dâmbiâ hânji ambonande meyeñgimap.

⁸ Aregât Anutu aikomapñe den hâuñe nâñgâmap. Undâgâtmapiñe mem miawakmap. Woa dâmap are âmâ hânji mem kalanmap.

⁹ Aregât hin dâwe. Yeñgâlân gâtñe siâñe nanñande sotgât ulilanjo âmâ kât bo wanmap.

¹⁰ Akto inangât ulilanjo âmâ gipmanj bo wanmap. Bo.

¹¹ Akto ye luâk bâlenande nananj lepatlupyene damun akyengim hin are yeñgimai aregât dopñe are ewangim Anutu himbimân manmapñe luâk siânbanje ulilanmai are yeñgât okot nâñgâm dowâk wan ulilanmai are yeñgimap.

¹² Akto den dâm makyenjiân aregât keiņe hin. Yeņe bikņande âlepņe aknenginjetdâm hârok âlepņe tân yeņgum manmâ âgâwei. Aregât âmâ Mosenje akto propete luâkņe Anutugât den kârikņe kulemgoyi aregât keiņe hainâk tatâp.

Himbimgât dâp aregât den.

¹³ Hilip agu hilip agugât kepia aregât dâp are humo akto pempemâk aregât dâp humo ain âlepņe ari ari aregât luâk dondâņe arimai. Yeņe âmâ ain bo ariwei. Ye dâp gâwikņânba ariwei.

¹⁴ Are âmâ manman kârikņe aregât dâp amâ gâwik gâwikņe, heambuk heambukņe akto yonâk yemap. Dâp are watmâ luâk âmbâle undup akmâ bo arimai. Dâ konok konokņe ain arimai. Ye âmâ dâp are watmâ ariwei.

Hiaņgi luâk yâk yeņgât keiyeņe.

¹⁵ Propete luâk hiaņgi arekņe âmâ hâkyeņe lama hâk yeukņe hainare dâ hanyeņe âmâ dua metņe han hainare aregât yâk yeņgât damun agangim manbei.

¹⁶ Siâ siâ Bunņe bo aregât nâņgâm kepilâyekbei. Giat ain kewu bunņe memaen mon? Me kândenân ham bunņe miawakto memaen mon?

¹⁷ Lâwin âlepņân bunņe âlepņe miawakmap. Lâwin bâleņân bunņe bâleņeâk.

¹⁸ Aregât lâwin âlepņânba bunņe bâleņe bo miawakmap akto lâwin bâleņânba bunņe âlepņe bo miawakmap.

¹⁹ Aregât ire maktere nâņgâņet. Lâwin siâ bunņe âlepņe bo kindo âmâ kârâm ondenņe ombiap hain.

²⁰ Yeņe luâk keiyeņe ekmâ gain gain akmâ iare akmai aregât nâņgâwai.

21 Akto aregât hin makbe. Luâk âmbâle nogonmâ âmâ kotdâ nenje kotdâ nenje hain dâm nogonmai yâk hârokne himbim kepien bo ariwai. Himbimân Ewenaet denje lokom manmainje âmâ ariwai.

22 Luâk dondâje sop humoân hin dâm makniñbai, “Kotdâ ire nângâ. Nenje gângât kotgaet akmâ denge makmâ miawakmâ makyenjiyion. Akto gângât kolân konmâ sinduk baniara bâleje watyenjiennje luâk hepun yekmâ ariyi. Akto gâ gogonmâ kulem keñje keñje are ketuguyion.”

23 hain dâmbiâ âmâ nâje hin dâm makyenjiwian, “Nâ ye bo nângâ yenjiân. Nângâlân bunje bo dewatiyigât hepun nekmâ ariñet. Ye amâ bâleje meme luâk.” hain dâwian.

Luâk lâuwâ emetyetje ketuguyiat aregât den.

24 Aregât den ginje ire maktere nângâñet. Luâk siâje denne ire nângâm lokomapne âmâ dop hinare aktâp. Luâk nângâ nângâje olop yâkne emet are gimbâje kârikñân ketugumbo kilep.

25 Emet kât kakñân mângiepi aregât tu tânâk humo gembo âmâ ugurup humo gam lokowerâmbo âmâ kârikne akmâ nâñâk kilep. Dop hain.

26 Dâ luâk siâje denne ire nângâm laune bo lokomapne âmâ dop hin are aktâp. Luâk nângâ nângâje bo siâje emet nupiânâk ketuguepi dop hain are.

27 Ketugumbo kindo tu seru humo pando ugurup humoñe togombo emet are gagai akmâ kom bâliepi.” Yesunje hain dâm makyenjiapi.

28-29 Yesuŋe Anutugât den keinjânbak nâŋgâm makyenŋiep. Akto biwiyeŋân kalepgât denŋe nâŋgâmbiâ dâtŋe akto hin dâyi, “Mosegât den kepikmâ maknengimai are hârok ewangi yektâp.” hain dâm yâkgât nâŋgâmbiâ humo agep.

8

Luâk siâ diwi kârikŋe akmâ malep are Yesuŋe mem howaimbo âlepŋe agep.

¹ Akto Yesuŋe den makmâ metem gimbânânba gembo luâk âmbâle biwirâŋe watbiâ olop ariyi.

² Akto luâk siâ diwi kârikŋe akmâ malep arekŋe Yesu ekmâ enemŋân togom pâwutŋe ligim hin dâm maganŋep, “Humo, kârikŋege tatgiŋdâpgât makmenâ diwine bo akniŋâk mon?” dâep.

³ Hain dâmbo Yesuŋe hâkŋe mem howaim kinmâ hin dâep, “Âlepŋe, nâŋgâ giŋdângât diwige are pandak giŋâk.” dâmbo ainâk diwi bo aganŋdo hâkŋe âlepŋe agep.

⁴ Âlepŋe akto ainâk Yesuŋe maganmâ hin dâep, “Gâ iregât den pat luâk bo makyenŋim âmâ yânâk arim sumbe kat kat luâk damun yâkgâlân konok ari. Arimenâ keige gekmâ nâŋgâmbiâ âmâ benŋe Moseŋe wan me wan iregât den kârikŋe kulemgoep are lokom Anutugât sumbe omben. Sumbe omenâ are ekmâ nâŋgâm heŋgemgowei.” dâm huŋgun aŋep.

Yesuŋe hoŋ bawa siâ mem heŋgemgoep.

⁵ Akto arewa arim kepia siâ kotŋe Kapanaum ain arim âgâmbiâ Roma yengât tembe loko are yengât humoyeŋe siâŋe yâkgâlân arim den hin dâm ulilaŋep,

6 “Humo, nângât hoŋ bawane siâ kundat akmâ hâk hilâlâm bâleŋe umatŋe miawagaŋdo kei bânŋe kêregembo yem tatâp.” dâmbo

7 dêep, “Âlepŋe, arim mem heŋgemgowerân.” dêep. Hain dâm magaŋdo

8 hin dêep, “Humo, nâ luâk âlepŋe bo mandân aregât nângât emelan bo âgâwerât. Inâk kinmâ denâk makmenâ âmâ nângât hoŋ bawane are âlepŋe agâk.

9 Akto nâ gai luâk kotdâ yâk yengât den lokom manman akto nâ luâk humonande nângâ niŋmâ damunyeŋeak dâm katnegep. Aregât nâŋe tembe lokolupne den makyengire lokomai akto yâk yengâlân siâgât, “Gâŋe siâ ari.” hain dâm magaŋdere âmâ âlepŋe arimap. Akto siâgât, “Gâ ga.” dâre âlepŋe gamap. Akto hoŋ bawane siâ ekmâ, “Âi ire me.” dâre âmâ âi are hainâk memap. Aregât gâ Humo inâk kinmâ denâk makmenâ âlepŋe agâk.” hain dêep.

10 Hain dâmbo Yesuŋe den are nângâmbo dâtŋe akto purik dâm hamiŋân togom malî are hin dâm makyengiep, “Den bunŋe maktere nângâŋet. Israe kâmot ire yengât hutyeŋân luâk siâŋe nângât keine nângâm heŋgemgoep hainare siâ bo ekman. Roma luâk irekŋe hârok ewangi yektâp.

11 Hâmbâi hân tunŋuŋâŋen biken biken ainba luâk biwirâŋe togom âmâ Abraham, Isaka, Yakopo yâk olop manmâ Anutugât kepiân âgâm menduguakmâ ain sot keine keine nem heronŋe akbai.

12 Dâ emelâk Anutuŋe Yuda luâk damunyeŋe akminep are panyekto yâk âmâ kepia ginŋâŋen hândâgân gem manmâ indem kamboŋmâ man-

bai.”

¹³ Hain dâm makyengim purik dâm tembe loko humoyeñe are ekmâ hin dâm magañep, “Gâñe bi-wige nâñgâlân katmâ hain nâñgât aregât bunñe miawakgindâp. Gârâmâ bam ari.” hain dâmbo bam arimbo sop ainâk hoñ bawañe are âlepñe akto egep.

Yesuñe makto Petorogât hewonñe âlepñe agep.

¹⁴ Akto arewa arim Petorogât emelan âgâmbô Petorogât hewonñe kundat akmâ hâk kâlâp akmâ yem tato egep.

¹⁵ Bam ekmâ bâññân mendo ainâk kundat are bo agañep. Bo agañdo agatmâ sot om wañep.

¹⁶ Wañdo nem tato emet dâgâwerâm akto âmâ sinduk baniara bâleñande luâk âmbâle bikñe kautyenñan meyegi are meyekmâ yâkgâlân togoyi. Meyekmâ togombiâ Yesuñe launñande makmâ watyekto sinduk baniara bâleñe arekñe hepun yekmâ ariyi. Akto kundat agi arekâ hainâk lokoyekmâ togombiâ yekmâ mem heñgem yeñgüep.

¹⁷ Hain agep aregât emelâk propete Yesaiñe den siâ hin kulemgöep are bunñe agep amâ hin, “Nen kundat umatñe miawak nengimbo me wan me wan pâpkom nâñgâm hilipkomaen aregât yâkñe bâleñe are mendo bo agep.” dâm kulemgöep den are bunñe akto Yesuñe kundatdâ dondâ heñgem yeñgüep.

Luâk hin arekñe âmâ Yesugâlân dewatiwai.

¹⁸ Yesuñe hain akmâ tân yeñgumbo ainâk luâk âmbâle biwirâñe yâkgâlân togom ândeanmâ kinbiâ Yesuñe are yekmâ, “Bâin, wanga mem indâgen

bam arine.” dâm aposololupņe makyengiep. Hain dâmbo waņa mem bātġum humo are hātikom ariwerâm agi.

¹⁹ Ariwerâm akbiâ Moseġāt den makmâ miawagi are yengâlân ġātņe siâņe bam hin dâm magañep, “Apo, ġâ iregen me aregen ariwerâm âmâ makņiņmenâ olop ariwaet.” dâep.

²⁰ Hain dâmbo Yesuņe hin dâm magañep, “Yo âmâ lâwin timopņân yemap. Dâ lâut âmâ lâwin bāt bātņân kelom tatmai. Dâ nâmâ luâk akmâ ġeân areġât nâņġât emet âmâ bo tatņiņdâp.” dâep.

²¹ Akto luâklupņe yengâlân ġātņe siâ arekņe yâġġâlân togom hin dâm magañep, “Humo, nâņġâ niņmenâ arim ewene soņ hangom âmâ benņe purik katmâ togore âmâ olowâk ariwaen.” dâep.

²² Hain dâmbo Yesuņe hin dâm magañep, “Hain bo. Luâk âmbâle momoņandeak momoņelupyeņe hangoyekņet, Dâ ġâmâ hinņe nâ wat nekmenâ olowâk arine.” dâep.

Yesuņe makto seru nâņġâġep.

²³ Hain dâm waņgan âġâmbo aposololupņe olop ariyi.

²⁴ Arim manbiâ seru humo sân sânâk pando haru are bâliep. Akto haruņe waņa kâlegen ġewerâm agep ain Yesu asiņ yiep.

²⁵ Akto aposololupņande goaņmâ hin dâm magañi, “Humo, haruņe kawut nenekberâm aktâp areġât agatmâ tân nengu.” dâyi.

²⁶ Hain dâmbiâ hin dâm makyengiep, “Bo nâņġâniņmâ kepiłânekmai. Ye wangât hamewaktâi?” dâm agatmâ seru pando haru bâliep are den makyetkimbo ainâk nâņġâġyiat.

²⁷ Nâjâgâmbela ekbiâ dâtne akto hin dâyi, “Ae, yâkne seru akto haru makyetkimbo yâkgât den lokom nângat aregât luâk ire gain hinare?” dâyi.

Yesune sinduk baniara bâlene watyekto bau bi-wiñan geyi.

²⁸ Akto bângum are hâtikom indânân bam Gadara hânângen ariyi. Arim manbiâ luâk lâuwâ siâ sumângenba togom manbela yelegi. Yâk yetgât keiyetne hin. Sinduk baniara bâlenande kaut yetnân mendo metne akmâ luâk âmbâle hârok mem bâli yekte dâm manminiat. Akto dâwân togombela âmâ luâk âmbâle hârokne hamewakmâ ain bo arimini. Keiyetne hain.

²⁹ Lâuwâ arekne togom Yesu penianmâ den hin dâm maganjat, “Gâ Anutugât nanne, gâ gain gain aknetkiwerâm togoât? Gângât sop bo tâlâgumbo hâk hilâlâm netkiwerâm togoât me?” dâyat.

³⁰ Akto indâgen bau kâmot humo siâ tâmut nem mali.

³¹ Akto sinduk baniara bâlene arekne Yesu maganmâ hin dâyi, “Gâne wat nenekberâm âmâ hungun nengimenâ bau biwiyeñan gene.” dâyi.

³² Hain dâmbiâ Yesune, “Âlepne genjet.” dâep. Hain dâmbo luâk lâuwâ are hepun yelekmâ bau hârok biwiyeñan geyi. Gembîa bau arekne pârigim arim indâgen bângum siân sopanbiâ tune lauyeñan pikto moyi.

³³ Mombiâ bau damunlupyeñande arim kepia yeñângen âgâm Yesune sinduk baniara bâlene watyekto bau biwiyeñan gembîa moyi aregât den pat are kepia ambolupne makyenjiyi.

³⁴ Makyenġimbiâ ainâk luâk âmbâle hârokne Yesu are ekne dâm kepiayenġânba geyi. Gem kepia yenġe hepunmâ ariâkgât wârakmâ maganġi.

9

Yesuġe luâk parâġe siâ mem âlepġe ketuguep.

¹ Maganġbiâ Yesuġe hepun yekmâ ariwerâm wanġan âġâm bâtgum biken hâtikom arim ikinġe kepia ain ariep.

² Arim kindo luâk bikġande galayenġe siâ bâtġe keiġe mom kârikne akminep are temân katmâ yâkgâlân lokom togombiâ Yesuġe are biwiyeġe ekmâ nâġġâm luâk kundatdâ are hin dâm maganġep, “Bâleġe akmâ manmâ gaen areġât dosa puli ġiġdân.” dâep.

³ Hain dâmbo Moseġât den kârikne makmâ kepikmâ makmini are yengâlân ġâtġe bikġande biwiyeġân hin nâġġâyi, “Anutu ikinġak âmâ dosayeġe puli yengimap ina luâk yânġe irekne Anutu ewangiwerâm aktâp imâ bâliâp.” hain dâm nâġġâmbiâ bâliep.

⁴ Biwiyeġânâk hain nâġġâmbiâ Yesuġe biwiyeġe ekmâ nâġġâm hin dâm makyenġiep, “Hanyenġande wangât den bâleġaet nâġġâi?”

⁵ Gain gain arekne owâiġe luâk bâtġe keiġe mom kârikne akmap ire hin dâm maganġberân. Anutunġe dosage hepunġiġdâp hain dâm maganġberân me hin dâm maganġberân. Agatmâ temge are lokoakmâ ari?

⁶ Areġât maktere nâġġâġet. Nâ luâk akmâ geâġġât dosayeġe hepun yenġiwerâmġât Anutunġe makmâ ninġep areġât keiġe ekmâ nâġġâġet.” dâm

makyengiep. Luâk kundatdâ are hin dâm maganep, “Agatmâ temge loko akmâ emetgângen bam ari.” dâep.

⁷ Hain dâmbo agatmâ temje lokoakmâ emetjângen bam ariep.

⁸ Arimbo luâk âmbâleje are ekmâ otneyeje arimbo hin dâyi, “Yesuje Anutugât kârikjân kinmâ agak meme bo agakje aktâp.” dâm Anutu kotje mem agatmâ kinmâ manjanli.

Yesuje luâk kotje Mataio gawamangât puli meme are miep.

⁹ Akto Yesu ainba arim gawamangât puli meme luâk kotje Mataio puli emetjân tato ekmâ hin dâm maganep, “Nângâlân dewatimenâ nâ olop mande.” dâep. Hain dâmbo agato olop ariyat.

¹⁰ Arim sot nemberâm âmâ hon bawa olop emetjân âgâmbiâ Romagât puli meme akto bâleje meme luâk biwirâje yâk yengâlân arimbiâ Yesu akto luâklupje olowâk sot neyi.

¹¹ Nem tatbiâ Parisaio luâk bikjande yekmâ Yesugât hon bawalupje hin dâm aiyenguyi, “Wangât eweyenande Romagât puli meme akto bâleje meme luâk olop tatmâ sot nendâp?” dâyi.

¹² Hain dâm aiyengumbiâ Yesuje den are nângâm hin dâm makyengiep, “Hin nângâm hengemgowei. Âlepje mandâi yengâlân are doktaje âi mene hain bo dâm arimai. Kundat aktâi are yengâlân âi mene hain dâm arimai.

¹³ Ulikjân Anutuje makto luâk siâje kulemgoep are hin, “Yeje dosayenâet akmâ âmâ songo wan gâim om nângâlân katmai aregât bo nângâm egâlianman. Gala konok akmâ manjetgât nângâm

egâlianman.” den hain tatâp aregât keiŋe yeŋe nâŋgâmbiâ huraguâkgât mendugum den âi mem maganŋi goanŋi akmâ manŋet. Aregât maktere nâŋgânŋet. Luâk bikŋande, “Nen luâk âlepŋe akmâ yân târârâgâk manmaen.” hain dâmai luâk hain are mem oloŋyekbe dâm bo geân. Bo kârikŋe. Nâmâ luâk bâleŋe meme oloŋ yekbiangât togoân.” dâep.

Yesu Anutugât pat sot hepunmâ maligât aikoyi.

¹⁴ Hain dâmbo Yohane tu puli keiŋe kalep are olop mali arekŋe Yesugâlân togom hin dâm aikoyi, “Nen Anutugâlân okot âlep agakgât akto Parisaio luâk nenŋe âmâ sot hepunmâ manmaen. Dâ luâklupge âmâ wangât sot sapa bo akmai?” dâyi.

¹⁵ Hain dâmbiâ hin dâep, “Aregât den ginŋe siâ makbe. Luâk kotdâŋe âmbâle siâ mendo âmâ kâmotlupŋe olop manmâ okot bâle akmâ sapa bo akmai. Hâmbâi bikŋande menekbiâ bo aktere sop ain nâŋgâm indem tatmâ sot sapa akmâ manbai.

¹⁶ Niŋande sâŋgum tâmbânân irakŋande katmâ parutbop? Bo. Irakŋande tâmbâŋe are oloŋdo dondâ torokbopgât hain bo akmaen.

¹⁷ Me niŋande waiŋ irakŋande hâpu tâmbânân kâimbo gewop? Bo. Waiŋ irakŋande hâpuŋe tâmbâŋe tâlim hogombo waiŋ akto hâpu bâliwopgât hain bo akmaen. Waiŋ irakŋande hâpu irakŋân gembo âlepŋe akmap.” dâep.

Yesuŋe makto Yairo baratŋe momoŋânba agalep.

¹⁸ Yesuŋe den hain dâm makyenŋim kindo luâk damun siâŋe togom kâŋgom hânân gem âmâ hin dâm ulilanŋep, “Baratne hinŋe mondâp aregât nâ olop arim momoŋânba goanŋmenâ agalâk.” dâep.

19 Hain dâmbô Yesuŋe agatmâ arimbo luâklupŋe olop ariyi.

20 Arim âmbâle siâ hutyenân kilep aregât keiŋe hin. Âmbâi are dewutâyeŋe gam yenŋumap dop hain bo geminep. Sop kâlep gembo mando hombanj bêt bip bip hârok keiân lâuwâ bo agep.

21 Yâkŋe Yesugât hamiŋân arim hin nâŋgâep, “Nâ sâŋgumŋeâk howaim âlepŋe akberân.” nâŋgâep.

22 Hain nâŋgâm yonjâk watmâ sâŋgum kâlep are mem howaimbo Yesuŋe purik dâm ekmâ hin dâep, “Woe, meŋ, gâŋe biwige nâŋgâlân katâtgât Anutunŋe nâŋgâ giŋdo kundat are unak bo akgiŋdâp.” dâmbô ainâk âmbâle are âlepŋe agep.

23 Akto Yesuŋe arim luâk damun yâkgât emetjân âgâm âmâ uruwaku waitbiâ nâŋgâep. Uruwaku waitmâ den maganŋi goanŋi akbiâ ekmâ nâŋgâm hin dâm makyenŋiep,

24 “Âmbâi sisik ire bo mondâp. Yân asiŋ yendâp aregât gem ariŋet.” dâep. Hain dâmbô nâŋgâm giriŋaŋi.

25 Giriŋaŋbiâ den makyenŋimbo gem sopali. Gem arimbiâ âmâ baratŋe yiep ain bam bêtjân mem agato âlepŋe akmâ agatmâ kilep.

26 Akto kulem miep aregât den pat maganŋi goanŋi akbiâ kepiŋe kepiŋe arimbo hân humo are ambolupŋande nâŋgâyi.

Yesuŋe luâk lâuwâ dewunyetŋe bokbokŋe heŋgemyetkuep.

27 Akto Yesuŋe kepia are hepunmâ arimbo luâk lâuwâ dewunyetŋe bokbokŋe arekŋe hamiŋân arim den hin dâm maganŋiat, “Woe Dawidigât

kâmolân gâtne gâ den makginđetne netgât okot nângâ netki.” dâyat.

²⁸ Hain dâm watmâ arimbela emetnân âgâmbô watmâ âgâm enemnân kinbela aiyetkum hin dâep, “Biwiyetnande gain gain nângat? Maktere âlepne dewunyetne hulan akberâp me bo?” dâmbô dâyat, “Humo, âo, kâriknege tat ginđâpgât nângâginđet.” dâyat.

²⁹ Hain dâmbela dewunyetne mem howaim hin dâep, “Han biwiyetne nângâlân katat aregât dopnân bunne miawak yetkiâk.” dâep.

³⁰ Hain dâmbô dewunyetne hulan akto emet egiat. Akto Yesune hin dâm makmâ hâre yetkiep, “Yet bât kulem iregât den pat luâk siâ me siâ bo makyenğiwiadat.” dâep.

³¹ Hain dâm makyetkimbo hepunmâ arim den koanmâ aregât den pat are makyenğimbela sambelem arimbo luâk âmbâle biwirâne nângâyi.

Yesune luâk kopa siâgât sinduk baniara bâlene walanep.

³² Akto arimbiâ ainâk luâk siâ Yesugâlân kewugum togoyi aregât keine hin. Are sinduk baniara bâlenande mângimbo kopa akmâ den bo makmâ yân manmâ gaep.

³³ Akto luâk are kewugum togombiâ sinduk baniara bâlene are wato hepunmâ arimbo nângâ nângâne miawakto den agep. Hain akto aregât kâmot humo ain kili arekne hin dâyi, “Israe nengât hutnennân kulem hinare uliknân siâ miawakto bo ekmâ malion.” hain dâm ekmâ nângâm bâtyene dâtyenân igim kili.

34 Dâ Parisaio yâkne âmâ Yesugât nângâm bâlianmâ hin dâyi, “Sinduk baniara bâlene are yengât humoyenande memeņe agaņdo aregât sinduk baniara bâlene are watyekmap.” hain dâyi.

Yesune luâk âmbâle damunlupyeņe bo mali are yekmâ okotne nângâ yengieņe.

35 Akto Yesune kepiāne are hepunmâ arim den emetne ârândāņ âgām Anutune damunyeņe akberâm agep aregât pat âlep den makyengim malep. Manmâ kundat keiņe keiņe agi are mem heņgem yenguep. Hain akmâ malep.

36 Akto lama damunlupyeņe siâ bo manmai dop hainâk akmâ luâk âmbâle arekne biwi gulip akmâ wâtyeņe gembo mali Yesune are yekmâ okot nângâ yengieņe.

37 Okot nângâ yengim aregât luâklupne den ginne siâ hin dâm makyengieņe, “Kalamân sot bunne dondâ tatâp aregât âi luâk amon siâ manmai yâkgât âi kalam are mem metewaigât dop bo tatâp

38 aregât kalamgât Amboņe Humo are ulilanbiâ âmâ âi luâk siâkâ huņgunyengiâk.” dâm makyengieņe.

10

Yesugât hoņ bawalupne yâk yengât kotyeņe.

1 Akto Yesune luâklupne keiân lâuwâ yengonmâ meyekto togoyi are hin dâm makyengieņe, “Yeņe sinduk baniara bâlene are luâk âmbâle mâņgiyekbiâ bâliyi are watyekņet. Akto kundat keiņe keiņe

aktâi are mem hengem yenğunet.” dâep. Hain dâm aregât memenje akyenğiep.

² Akto Aposololupne yâk yengât kotyene hin. Luâk siâ kotne Simon kotne siâ Petoro akto emine Anderea. Akto Yebedaioğât nanlogâtne kotyetne Yakopo akto Yohane.

³ Akto siâ Pilipo, siâ Batolomaio, siâ Toma. Akto siâ kotne Mataio gawamangât puli meme luâk manminen akto Yakopo amâ Alipaiogât nanne are, akto Tadaio

⁴ akto Simon siâ Roma damunlupylene yengât hâkân agi are yengâlân gâtne. Akto siâ âmâ Yudasî Karioto kepien gâtne yâkne halop hogom luâk olon yekto Yesu meyi are.

⁵ Akto Yesune aposololupne are hin dâm hunğunyenğiep, “Yene âmâ Yuda luâk âmbâle bo yâk yengâlân me Samaria gâtne kepi siâ me siâ yâk yengâlân bo ariwei.

⁶ Dâ Lama are damunylene bo manmâ ari hilip agumai dop hainâk Israe luâk âmbâle yâkne hilip agune dâm aktâigât yâk yengâlânâk tâñ tâñâk ariwei.

⁷ Israe yâk yengâlân areâk arim hin dâm makyenğiwei, “Anutu himbimân manmapne damunnenne akberâm aktâp.”

⁸ Hain dâm amâ kundat aktâi yâk mem hengem yenguwei. Akto luâk âmbâle momone areyenğât dâmbiâ momonânba agatbai. Akto hâk bâle aktâi are mem hengem yenguwei. Akto sinduk banianne meyegi are watyekbiâ ariwei. Nâmâ yân kârikne yengim hunğunyenğian aregât ye gai hainâk wan me wan yân yenğiwei.

⁹ Akto hin akmâ ariwai. Tâwât dewunŋe âmâ bo mem ariwei.

¹⁰ Akto ito siâ siâyeŋe bo lugum goliakmâ ito bâlâk ariwei. Akto hâk pekeŋe konogâk lugu akmâ ariwei. Akto kei pekeŋe hainâk konogâk katmâ ariwei. Akto huwan hepunbiâ talâk. Yân arimbiâ âmâ kepia ambolupŋande yekmâ luâk âirâ dâm tânyenŋumbiâ ârândân akbiap.

¹¹ Akto hunŋun yeŋgire arim ulik gulik kepia ambolupŋe yeŋgât keiyeŋaet makmâ aikowei. Akto siâgât nânŋâmbiâ ârândân akto yâkgât emetŋân âgâm ainâk tatmâ manbei.

¹² Emetŋân âgâm Anutunŋe damunyeŋe agâkgât makmâ heronŋe akyenŋiwai.

¹³ Heronŋe akyenŋimbiâ emet ambonŋande ye gala akyenŋim denyenŋe nânŋâmbiâ ârândân akto aregât bunŋe miawakyeŋgiwip. Gârâmâ denyenŋe nânŋâm hâkân akmâ gala bo akyenŋimbiâ âmâ hamiyenŋimbiâ aregât bunŋe bo miawak yeŋgiwip.

¹⁴ Akto yeŋe kepia siân arim makyenŋimbiâ hâkân akbiâ aregât kepia are hepunmâ Anutunŋe hâuŋe yeŋgiwip aregât dop akmâ keiyeŋân hamaŋ siâ tatbiap are paŋ paŋgom tâlim pulimbiâ gewiap.

¹⁵ Aregât maktere nânŋâŋet. Sop humoân Anutunŋe Sodom akto Gomora kepia ambolupŋande bâlenŋe agi aregât hâuŋe yeŋgimbo meyi. Gârâmâ ye kepia yeŋân arimbiâ gala bo akyenŋiwai âmâ dosa yeŋaet hâuŋe umatŋe membai.

Biwiyeŋande Anutugât nânŋâm manbaiŋe Anutugât pat akbai.

16 Lama pâlâmne are pugaiya yengât hutyenân arimbiâ hilip yengune dâm kinmai dop hain are akmâ hungun yengire luâk bâlene hutyenân ari manmâ aregât bo hamep akbei. Akto songo kotne hewam are nângâ nângâne olop manmâ damun agangimap dop hainâk ye biwi golâk manbei. Akto lâut kotne kembâ arekne bo kârâ nenekmap kopakom tatmap dop hainâk yeje arim yeuknân manmâ bo mem bâli yekbai.

17 Ye luâk bikne yengât nângâmâk manbei. Yâkne yâk yengât den emetnân katyekmâ luâk kembulupyene yâk yengât dewunyenân bugâne yenguwai.

18 Akto areâk bo. Ye nângât akmâ mandâigât kiap me luâk kembu yâk yengâlân meyekmâ arimbiâ den âi membai. Aregât ye yâk yengât meteyenân akto Anutu bonânganmai yâk yengât meteyenân kârikneâk kinmâ den bunne makmâ hulanbei.

19 Den âiân katyekbiâ âmâ den gain gain hinare maktenne ârândân akbiap aregât nângâm han lâuwâ bo akmâ hanoko bo akbei. Anutune biwiyenân Heakne kato yâkne makmâ miawakyeongimbo areâk makbei.

20 Sop ain âmâ den makbai are Eweyenjaet Heaknande biwiyenân den kato nângât keine makyengiwei. Are âmâ yejeâk bo makbai. Amâ Heaknande makmâ miawakyeongiwiap.

21 Akto sop ain teulupyenande emilupyene monet dâm oloŋ yekmâ togo kiap maganbiâ yengumbo mombai. Akto ewelupyenande nanlupyene yengum gasa akyengim kewugu yekmâ humomolupyenaelân arimbiâ âmâ

yeŋgumbiâ mombai. Akto nanan lepatlupyeŋande ewe memelupyeŋe gasa akyeŋgim kiapgâlân arimbiâ tembe lokolupyeŋande togom meyekmâ arim yeŋguwai.

²² Akto ye kot patnaet akmâ luâk hârok yâkŋe yeŋgât nâŋgâmbiâ bâliwiap. Aregât yeŋgâlân gâtŋe siâ me siâŋe nâŋgât akmâ bo hâkân akbiap âmâ sop humoân himbim kepia membiap.

²³ Akto ye meyekmâ den âi mem bugâŋe yeŋgune dâm akbiâ ain hepun yekmâ kepia siân arim manbei. Aregât siâ hin maktere nâŋgâŋet. Yeŋe âmâ Israe kepia ârândân tatmâ ariâp ain bo purik katmâ arim âiyeŋe ketugum metembiâ âmâ nâ luâk akmâ geân aregât sopŋe ewumâk akbiap.

²⁴ Nananŋe humoyeŋe ewangiwaigât dop bo tatâp. Akto hainâk luâk humomolupyeŋe akto hoŋ bawalupyeŋe yâk dop konogâk membai.

²⁵ Akto nâŋe âmâ yeŋgât kautŋe mandân. Akto yeŋe âmâ nâŋgât den lokom hoŋ akniŋmâ mandâi. Akto luâk bâleŋe arekŋe âmâ hin dâm nogondâi, “Sinduk baniara bâleŋe yâk yeŋgât amboyeŋe kotŋe Besebulu.” dâm nogondâi hainâk hâmbâi ye hoŋ bawalupne manmâ denne lokom manbiâ âmâ makmâ mem ge katyekmâ mem bâliyekbai.

²⁶ Aregât yâk yeŋgât bo hamewakbei. Amâ wan me wan siâ yoŋâk kinmâ akmai are hainâk bo yembiap. Are hâmbâi miawakto ekbai. Akto wan me wan siâ akmâ heambukmai are hainâk bo yembiap. Are hainâk hâmbâi tek tekŋân miawakto ekbaen.

²⁷ Aregât âmâ nâŋe ye olop yoŋâk yoŋâk tatmâ den makyeŋgim mandân ire luâk âmbâle hârokŋe nâŋgâŋetgât makyeŋgiwei. Akto nâŋe den hilop

halowân makyengim mandân ire hâmbâi kâmot humoân kinmâ makyengiwei.

²⁸ Akto luâk bâlenande yengât wâtyeņe bo akyengiâkgât dâm bugâņe yenguwai. Gârâmâ yengât otne biwiyeņe hilipkowaigât dopņe bo tatyengiâp are yengât bo hamewakbei amâ Anutu yâk konokņe ye yengum aregât kakņân otne biwiyeņe hilipkowiapgât kârikņe talaņdâp yâkgât konok hamewakbei.

²⁹ Lâut sâmbâlilik are gagap amâ bunņe bo. Are amâ tâwât dewunņande puligowaengât dopņe bo tatâp. Hain gârâmâ sâmbâlilik siâ mombiap momo aregât himbimân Eweyēande bo ewum pâpkowiap.

³⁰ Yâkņe dumutyēne aregât yalaņe nâņgâm metemap. Aregât ye manbiâ bo nelâm yengiwiap.

³¹ Dâ ye âmâ sâmbâlilik bo. Ye luâk, aregât Anutune damunyeņe akmap. Akto yâkņe keiyeņe hârok nâņgâmap. Aregât luâk yengât bo hamewakbei.

³² Akto yengâlân gâtņe siâņe luâk âmbâle yengât bo hamewakmâ yâk yengât dewunyeņân kinmâ, “Nâ biwine Yesugâlân katere kinbiap.” dâm makyengiwiap amâ nâņe hainâk hâmbâi himbimân Ewenaet dewunņân kinmâ, “Luâk ire amâ nâņgât kâmolân gâtņe.” dâre Anutune luâk hainare manman âlepņân katbiap.

³³ Aregât luâk aņgâņe amâ luâk âmbâle yengât hamewakmâ dewunyeņân kinmâ, “Nâ Yesu are bo nâņgaņman.” dâwiap amâ nâkai hainâk Ewenaet dewunņân kinmâ, “Bo nâņgâ giņdân.” dâwian.

³⁴ Akto yeņe nâņgâ yâkgât hin bo dâwei, “Yesu amâ nen gala konok manbaengât giep.” hain bo

dâwei. Aregât maktere nângânet. Nâne miawakmâ geân aregât bugâ miawakbiap.

³⁵ Nâne geân aregât eweñe nanñe potalakmâ gasa aganñiwandâ. Akto memene baratñe potalakmâ gasa aganñiwandâ. Akto erânñe erânñe potalakmâ ikinêak ikinêak gasa aganñim manbian-dat.

³⁶ Me yenğât ginbailupyenande gasa aganñiwai.

³⁷ Akto siâ ewe meme han kalem humo akyetkim nâ bâlensiâ akniñbiap âmâ yâk nângât pat bo akbiap. Akto siâ nanñe baratñe han kalem humo akyenñim nâ bâlensiâ akniñbiap âmâ yâk hain âgâk nângât pat bo akmâ manbiap.

³⁸ Akto luâk siânne gasalupnande mem hilip nuguwai dâm aregât hamep akmâ ikinê hâkñaet hanokoak akmâ manbiap âmâ nângât pat bo akbiap.

³⁹ Me luâk siânne manmanñe are ikinâelâk mem hanokoak akmâ manbiap arekñe hâmbâi hilip aguwiap. Dâ luâk siânne nângât akmâ nângâ niñmâ manmanñaet bo hanokoak akmâ manmâ denne lokom manmâ manbiap arekñe âmâ manman kârikñân manmâ âgâwiap.

⁴⁰ Ye hunğun yenğire arimbiâ gala konok akyenñimai yâkñe nâ gala konok akniñmai aregât dop aktâp hainâk nâ gala konok akniñmai yâkñe âmâ Ewenande hunğun niñep yâk gala konok aganñmai aregât dopñe aktâp.

⁴¹ Akto Anutugât propete siâ mandâp aregât luâk siânne nângâm gala konok agando ain gâtñande hâmbâi Anutunne ikinê propetegât hâuñe wanñbiap. Akto luâk siâ agak meme âlepñe mem manmap aregât luâk siânne yâkgât keiñe ekmâ nângâm

hengemgoep aregât gala konok aganmap yâk Anutune luâk âlepne yâkgât hâuñe wanbiap.

⁴² Me luâk âmbâle siâne biwiyene nângât katbai yâk yengâlân gâtne gegenen are luâk siâne ekmâ nângâm âmâ tu hâgâm wanbiap yâkne aregât hâuñe âlepne hâmbâi membriap.” dâep. Yesune den hain dâm aposololupne makyengiep.

11

Yesune Yohanegât magep.

¹ Yesune hon bawalupne keiân lâuwâ are hain dâm makyengiep. Hain makyengim metem kepia are hepunmâ kepiene kepiene arim Anutugât den akto ikinen keine are makmâ miawakmâ makyengim malep.

² Sop ain âmâ Yohane are kala busi kâlegen katbiâ talep. Kala busi kâlegen katbiâ tatmâ Kristone kulem keine keine mem malep aregât pat nângâep. Nângâm tatmâ galalogâtne lâuwâ hungun yetkimbo arim

³ hin dâm aikoyiat, “Damun netne Yohane are ulikjân yâk togom damun nenne akbiapgât dâyi are gâ me niñaet lâmgom manbaen? dâm maknetkimbo gutet.” dâyat.

⁴ Hain dâmbela Yesune hin dâm makyetkiep, “Yet arim âmâ wan me wan ekmâ nângat iregât den pat are Yohane hin dâm maganbiandat.

⁵ Dewunyenene bok bokne yâk yengât makto dewunyenene hulan akto emet ektâi. Akto luâk kei bâtyene bâli bâline yâk yengât makto âlepne

akmâ bam gutâi. Akto diwi kârikne akmâ manmai yâk yenġât makto pandak yenġiâp akto ondopyeñe bok bokne yâk yenġât makto ondopyeñe kepik akto den nânġâi akto makto momonânba agatmâ golâk mandâi. Akto umburuk mamburuk mandâiñe den pat âlepne makyenġimbo nânġâi.

⁶ Akto luâk siânje hâkânje bo akbiap âmâ yâkgât nânġâre âlepne aktâp.” hain dâm hunġun yetkimbo purik katmâ ariyat.

⁷ Hunġun yetkimbo purik katmâ arimbela Yesuñe Yohanegât hin dâm luâk âmbâle kili are makyenġiep, “Ye Yohane hân kamitnânġen malep yâk wan ekne dâm yâkgâlân ariyi? Seruñe dakerâ waito bam gutmap are ekne dâm yâkgâlân ariyi me?

⁸ Me luâk siânje hâk peke kulem melem are mem luguagep. Luâk hainare ekne dâm yâkgâlân ariyi me? Luâk hain arekne hâk pekenje kulem melem luguakmâ heñgemgom luâk kotdâ yenġât emelan tatmâ manmai.

⁹ Ye wan ekne dâm hân kamitnânġen ariyi? Âmâ propete siâ ekberâm ariyi mon? Ye Yohane Anutugât den makmâ miawagep are ekne dâm ariyi areġât Yohane egi arekne âmâ luâkne luâkne Anutugât den makmâ miawakmâ manmâ gayi yâk yenġât dop bo. Yâk âmâ siâ. Yâkne âmâ propete hârok ewangi yekmâ kautne mandâp.

¹⁰ Yâkgât âmâ uliknân Anutuñe den hin dêep are tatâp, “Nune hoñ bawane hunġun anġdere laune lokom ġânġât uliknân akġinmâ dâp heñgemgo ġinbiap.” den are âmâ bunje akto Yohane miawagep.

¹¹ Akto Yohane yâkgât den siâ maktere nânġânjet.

Luâk yânñande âmâ Yohane bo ewangimap. Dâ Anutu himbimân manmapñe damunyeñe akto yengâlân gâtñe hârokñe âmâ Yohane ewangimai.

¹² Akto Yohaneñe âi keñe katmâ den makyengim malep sop arewa luâk âmbâle biwirâñe Anutunje damunnenñe akberâm aktâp aregât den pat âlepñe nângâm biwiyenñe heronje maronje akto aregât bunje mene dâm aktâi. Akto luâk âmbâle kârikñe akmai yâkñe himbimgât pat akbai.

¹³ Propete luâk akto Mosegât den kârikñe yâk hârokñe Anutugât keñe kulemgom manmâ gayi. Akto Yohaneñe aregât den bâñe makmâ mi-awagep.

¹⁴ Propete luâk siâ kotñe Elia are malep luâk hainare hutnenñân miawakbiap, den are nângâm biâ ârândân agâkgât tatyengiâp mon?

¹⁵ Ire nângâm biwiyenñe kepigâkgât den ire mem biwiyenñân katmâ nângâmâk manbei.

¹⁶ Hinñe mandâi yengât den gain gain maktere ârândân akberâp? Dop hinare. Nanañ lepat hain are kâmot lâuwâ kepia sombeimân tatbai. Tatmâ kâmot siâñe kâmot siâ are hin dâm makyengiwei,

¹⁷ “Nenñe han nenñeâk kep kondan hain koñet dâen. Hain dâm makyengiennje ye bo kondâi. Umbi mem indiengât yekâ han mem indenjet dâen. Hain dâm makyengiennje yekâ hainâk bo indeâi.” dâwai. Akto hainâk nâñe bo indem okot bâle akmâ sot bâlâk manman aregât nângât hainâk hâkân aktâi. Akto aregât maktere nângânjet.

¹⁸ Yohaneñe sot waiñ tu bo nem âmâ yân manmâ gambo aregât ye hin dâyi, “Âi luâk ire âmâ sinduk baniara bâlenñande kautñe mem gulip ketuguâp.”

dâyi.

¹⁹ Akto nâ luâk akmâ gem sot songo nendere hin dâm maganji ninmai, “Luâk irekne sot humo nem mandâp amâ Roma yengât pat akmâ puli meme akto luâk bâleje yâk yengât gala.” dâm maganji goanji akmai. Gârâmâ Anutugât nângâ nângâne nângâm watmâ manbai âmâ siâ me siâ bunjeak akto keije yâk yengâlân bunje miawakbiap.” dâep.

Yesune kepianje kepianje hârok makmâ sârek yenguep.

²⁰ Akto emelâk Yesune kepianje kepianje manmâ kulem keije keije mendo ekmâ kinmâ agak memeyeje bâleje yeje bo makmâ miawakmâ han purikali aregât nângâm bâli yengim sârek yenguep.

²¹ “Bâe, Korasiñ kepia ambolupne, bâe, Besaida kepia ambolupne yengâlân kulem hamepne olowâk mem manmâ gan hainare Tiro akto Sidon kepijan ketugure dâine yâk emelâk agak memeyeje bâleje hepunmâ kângom kinmâ okot bâle nângâ anjim kinmâ Anutugât den nângâwâi.

²² Dâ ye âmâ hain bo agi aregât hâmbâi sop humoân Tiro akto Sidon kepia ambolupnande aregât umatne membai. Hain gârâmâ ye âmâ agak memeyeje bâleje bo hepuli aregât hâune umatne bâleje membai.

²³ Akto Kapanaum kepia ambolupne ye âmâ Anutune meyekto himbimân âgâwai mon? Hain bo. Anutune âmâ ye hepun yekto hememân gewai. Yengâlân kulem keije keije ketuguân are Sodom kepijan ketugure dâine kepia aregât ambolupne hanyene purik katbiâ Anutune bo yenguwop.

²⁴ Aregât hin makyenjiwe. Sop umbunân Sodom kepia ambolupñande bâlene agi aregât umatne meyi. Dâ ye âmâ sop humoân umatne bâlene membai.” dâep.

Yesune biwi sânduk ketugu nenekto wâtnenñe kârikñe akmap.

²⁵ Sop ain Yesune Ewene manjanmâ hin dâep, “Apo, hân himbim ambone gânğât okot âlep akğinđân. Ewene gâ luâk bikñande gânğât keige nânğâne dâm nânğâ nânğâ emetñân âğâyi yâk yengât wan me wan ire nânğâwâi dâm dâp tigi yengimat. Are nânğâre ârândân aktâp. Dâ nanan hinare yânñande âmâ aregât nânğâñet dâm hekat yengimenâ nânğâmai aregât gâ mepaige mendân.

²⁶ Apo gâ hain miawakmâ ariâkgât nânğâmenâ âlepñe agep.” dâm maganep.

²⁷ Akto den siâ hin dâm makyenğiep, “Ewene yâkñe nâ memenje akniñdo aregât kotñe siâ siâ akbiangât dopñe aktâp. Akto Ewenaet keiñe nânğângât luâk âmbâle potat yekmâ biken biken makyenğire arekñe âmâ hainâk keiñe nânğâwai.

²⁸⁻³⁰ Akto nânje nunak yeukñân manmâ damunyeñe akberâm aktângât ye hâk hilâlâm kakñân manmai me umatñe miawak yengimbo wâtyeñe sândugewerâm aktâp ye hârok nânğâlân togombiâ âmâ nânje welam yeukñe âlepñe are mem katyenğire âmâ nânğât keine nânğâm heñgemgombiâ mem hâk sânduk ketugu yektere wâtyeñe kârikñe akbiap. Akto biwiyeñe sândugembo sân sân bo membai.” hain dâm makyenğiep.

12

Âi bo meme sopɲaet den.

¹ Âi bo meme sopɲe Sarere ain Yesu akto hoɲ bawalupɲe âi kalam kâlegenba bam ariyi. Arim hoɲ bawalupɲe mopyeɲe agumbo sot mem hâkɲe gagaim neyi.

² Akto Parisaio luâkɲe yekmâ Yesu hin maganji, “Hoɲ bawalupgande âi meme sopɲe bo ain ina sot hâkɲe gagaim nendâi are yektenɲe ârândân bo aktâp.” dâyi.

³ Hain dâmbiâ Yesuɲe hin makyenɲiep, “Ye Daw-idinɲe agep aregât den pat oyanmai are bo oyanmâ nâɲgâmai mon? Yâk akto tembe lokolupɲe mop humo miawak yenɲimbo mali.

⁴ Hain akmâ Anutugât sumbe kat kat emetɲân âgâyi. Âgâm âmâ Anutugât sumbe dâm sot kâmbokɲe dâtâɲe are om kali are neyi. Are âmâ sumbe kat kat luâkɲeak ne.

⁵ Moseɲe den kulengoep are oyanmai dâ amâ bo nâɲgâmai. Sumbe kat katgât âi luâkɲe âi mem Sarere âi bo meme sopɲân sumbegât âi memai amâ dosa bo akmai.

⁶ Nâɲe âmâ sumbe kat kat emetɲe are ewangiân.

⁷ Akto ye den ire Anutuɲe makto kulengoep, “Sumbe ogogât âmâ hâkân aktân. Dâ okot âlep agakgât âmâ egâlianɲân.” den are nâɲgâmai dâine agak memeyeɲe bâleɲe bo akmai yâk yenân den âiân umatɲe bo katyekbâi.

⁸ Nâ luâk akmâ geân âmâ âi bo meme sopɲe Sarere aregât damunɲe akman.” dâep.

Yesuɲe luâk siâ mem âlepɲe ketuguep.

⁹ Akto Yesuŋe arewa arim yâk yengât den emetjân âgâep.

¹⁰ Âgâm ain luâk bâtje bâleŋe siâ tato egep. Akto Parisaio luâk arekŋe, “Gain gain akmâ Yesu denân katbaen.” dâm aregât hin dâm maganji, “Sarere âi bo meme sopŋân âlepŋe luâk kundatdâ hengem yenjuwerât me bo?” dâyi.

¹¹ Dâmbiâ hin makyengiepi, “Hut yenân gâtje siâŋe lama siâ kinaŋbiap. Akto lama arekŋe Sarere âi bo meme sopŋân lâmân gewiap. Akto luâk arekŋe lâmânba bo hikom oloŋbiap me?”

¹² Hanâk hikom oloŋbiap akto luâkŋe âmâ lama ewangimap. Aregât nen âlepŋe âi bo meme sopŋe Sarere ain luâk hengem yenjuenŋe ârândân akmap.” dâep.

¹³ Hain dâm kinmâ luâk bâtje bâleŋe are hin dâm maganep, “Bâtge panmenâ agalâk.” dâmbo bâtje pando âlepŋe akmâ bâtje biken aregât dopŋe agep.

¹⁴ Akto Parisaio luâkŋe agatmâ arim mendugum Yesu kombiâ mombiapgât maganji goanji agi.

Yesu miawakbiapgât magi a kârigiepi.

¹⁵ Hain akbiâ Yesuŋe den are nâŋgâm kepia are hepunmâ agatmâ ariep. Akto luâk âmbâle dondâŋe olop arimbiâ luâk kundatdâ dondâ hengem yenjuepi.

¹⁶ Hain akmâ aregât den pat bo makyengiwei dâm den kârikŋe makyengiepi.

¹⁷ Makyengiepgât Anutuŋe ikiŋe hoŋ bawagât den siâ Yesaia magando hin kulengoep,

¹⁸ “Hâmbâi nâŋgât hoŋ bawane nâŋe emelâk makmâ hâreaŋân. Nâ yâkgât ukenŋe humo

nângân akto yâkgât okot âlep nângân. Akto nâne nune Heakne are yâkgâlân katbian akto yâkne agak meme âlepne aregât den pat are hânne hânne manmai are makyengiwiap.

¹⁹ Akto yâkne kuk hengân denne bo makbiap. Akto dâp humo watmâ bo kambonjo nângâwai.

²⁰ Akto hâlâm pelâkne kokne are bo hârem kâlâwân panbiap. Akto kâlâp ululunne are bo limbâpkombo bokbiap. Nângât hon bawa hain akmâ âi humo mem ârândân den mem hulan golan mângimbo nângâmbiâ âlepne miawakbiap.

²¹ Akto hânne hânne manmai arekne yâkgât kotne nângâmbiâ humo akto biwiyene sândugembo yâkgât lângom tatmâ mârune akmâ konmâ man-bai.” Yesaiane hain kulemgoep.

Yesune sinduk baniara siâ walanep.

²² Akto sop ain luâk siâ yâkgâlân kewugum to-goyi. Akto luâk are âmâ sinduk baniara bâlenande kautnân miep. Dewunne akto laune hârok gisap aguep. Akto Yesune luâk are mem âlepne ketugumbo denne bo arekne den hogom emet ekmâ agep.

²³ Akto luâk âmbâle kâmot humo arekne ekmâ ot-neylene arimbo hin dâm magangi goangi agi, “Luâk ire Dawidigât hakune me angâ?” dâm han lâuwâ agi.

²⁴ Akto Parisaio luâkne den are nângâm hin dâyi, “Yâkgât keine hingât akmâ kinmâ sinduk baniara bâlene watyekmâ kindâp. Sinduk baniara bâlene yengât humoyene kotne Besebulu yâkgât kâriknân kinmâ watyekmâ kindâp.” dâyi.

²⁵ Hain dâmbiâ Yesuŋe biwiyenân ekmâ hin dâm makyenŋiep, “Luâk kâmot siâŋe potalakmâ yenŋeak agumbiâ dâine bo akbop. Me emet me kepia humo siâŋe potalakmâ agumbiâ dâine emet kepia are bo yembop.

²⁶ Dâ hainâk Hianŋi Amboŋande ikinak walakto dâine kâmotlupŋe emelâk potalakmâ bo akbâi.

²⁷ Hianŋi Amboŋaet kârikŋân kinmâ âi mem manman dâine bunŋe bo miawakbop. Dâ Anutugât kârikŋân kinman aregât Hianŋi Amboŋaet âi luâk watyekman. Akto aregât lâuwâŋe makbe. Ye nânŋâ yâkgât Besebulugât kârikŋân kinmâ Besebulugât kâmot watyekmap dâi aregât hin dâm makyenŋiwe. Yenŋât luâklupyeŋande hainâk Besebulugât kârikŋân kinmâ sinduk baniara bâleŋe watyekmai. Yâkŋe âmâ hâkyeŋe tunmâ keiyenŋe mem miawakmai.

²⁸ Akto nâ Anutugât Heakŋande wâtŋe ninŋo sinduk baniara watyekman aregât Anutuŋe wan me wan hârok damunyenŋe akbiapgât sopŋe tâlâwâk aktâp.

²⁹ Akto nânŋât keine aregât den dopŋe siâ makyenŋire nânŋâŋet. Luâk kârikŋe siâŋe mâron goliakmâ tembe bisârân mem âgâm emet kepiaŋe damungom henŋemgowiap âmâ yâkgât ito me wan me wan âlepŋe talanbiap. Dâ gasa kârikŋe dondâŋe togom emet damunŋe akmap are tâkŋe hikombo yeukŋe akto âlepŋe ito me bau me wan me wan are meakbiap.

Heak bo hâkâŋŋe akbaen.

³⁰ Akto aregât siâ maktere nânŋâŋet. Luâk âmbâle siâŋe gala bo akniŋmapŋe âmâ gasa

akniņmap. Akto siāņe âi mendere bo tân nugumapņe nugum pan nekbiapgât dop aktâp.

³¹ Akto luâk âmbâle bikņande nugum bâleņe maleņe hârok mânginekmai dosa are Anutuņe ikinjak kutigit yengiwiapgât dopņe aktâp. Dâ luâk siāņe Anutugât Heakņe are pilâkom mem ge katmâ âmâ dosa membiap are Anutuņe hepunbiapgât dopņe bo tatâp.

³² Akto nâ luâk akmâ geân nâņgât siāņe makmâ bâleniņbiap âmâ dosa are Anutuņe ikinjak kutigilanbiapgât dopņe aktâp. Dâ Heak âlepņe yâkgât makmâ bâlianbiap yâkgât dosa âmâ Anutuņe bo kutigilanbiap. Borondâ. Luâk are dosa olop manmâ âgâwiap.

³³ Lâwingât keiņe bunņande mem miapanmap. Aregât ye lâwin siâgât nâņgâm kepilâm imâ âlepņe dâm benņe bunņeņaet hainâgâk âlepņe dâmai. Akto lâwin siâgât nâņgâm kepilâm imâ bâleņe dâm âmâ benņe bunņeņaet hainâgâk bâleņe dâmai.

³⁴ Wei, mulum nananlupņe, ye bâleņe akmai aregât gain gain den âlepņe siâ makbai. Amâ hanyenân wan me wan siâ yendâp hain âgâk lauyenânba gamap.

³⁵ Luâk âlepņande han nâņgâ nâņgâņe âlepņânba siâ me siâ âlepņe lândemap. Dâ luâk bâleņande âmâ han nâņgâ nâņgâņe bâleņânba siâ me siâ bâleņeâk lândemap.

³⁶ Aregât hin makyenġire nâņgâņet. Siân sop humoân luâk âmbâle hârokņe den keiņe bo makmai are makmâ miawakbiâ Anutuņe den âiân katyekbiap.

³⁷ Amâ hingât. Den makmat arekņe keige âlepņe

mem miap pando Anutuŋe hâuŋe âlepŋe akgiŋbiap. Me den makmat arekŋe keige bâleŋe mem miap pando Anutuŋe hâuŋe umatŋe giŋdo umatŋân manmâ âgâwiat.” dâep.

Yesuŋe kulem mendo eknegât maganŋi.

³⁸ Yesuŋe hain dâmbô sop ain Mosegât den kârikŋe makmâ kepigi akto Parisaio luâk arekŋe Yesu maganmâ hin dâyi, “Apo, gâŋe kulem siâ memenâ ekne.” dâyi.

³⁹ Hain dâmbiâ hin makyengieŋep, “Hain bo. Luâk âmbâle bâleŋe yeŋe Anutugât kotŋe mem bâlimai arekŋe kulem miawakto ekne dâmai. Dâ nâŋe âmâ kulem bo hekat yeŋgiwian. Konok amâ hin. Yonagât kulem are nâŋgâm hengemgoweŋi.

⁴⁰ Ulikŋân propete kotŋe Yona iŋan humo siâgât tepŋe kâlegen hilâm âlâwu yieŋp hainâk luâk akmâ geân nâ hilâm âlâwu hân kâlegen yembian.

⁴¹ Dâ Yona arekŋe kepia bâleŋe dondâ kotŋe Niniwe aregât ambolupŋe den makyengimbo hanyeŋe purik kali. Dâ nâ Yonagât Humoŋe nâŋe makyengire hanyeŋe kârikŋe akmai aregât Niniwe ambolupŋande yeŋgât dosa mem miawakye kmâ makbiâ agak memeyeŋe bâleŋe are mem miawakbiap.

⁴² Aregât den siâkâ makbe. Ulikŋân hakunenŋe Dawidi yâkgât nanŋe Salomoŋe den nâŋgâ nâŋgâŋe makmâ miawageŋp. Den are sambelem arimbo âmbâle kembu siâ hân bâiŋâŋen Salomogât den are nâŋgâwerâm togombo maganŋdo nâŋgâmbo dâtŋe ageŋp. Dâ nâŋe âmâ Salomogât Humoŋe aregât yu kindâi ire makyengire nâŋgâmbiâ dâtŋe bo akto aregât âmbâle kembu

arekñe yeñgât dosa mem miawakmâ hâkyeñe tun akto agak memeyeñe bâleñe are miawakbiap.

Niambiñe luâk hepunmâ arim manmâ purikamâ gewâkñânâk togoep.

⁴³ Ye hain akmaigât hin makyenpire nângâm hengemgonet. Sinduk baniara helenj bâleñe siâñe luâk siâ hepunmâ hân kamitñângen luâk memberâm undâgâto bo akbiap.

⁴⁴ Undâgâto bo akto hin dâwiap, “Emelâk nângât luâk are agañmâ hepulân aregâlân purik katmâ arim manbian.” hain dâm purik katmâ arim luâk aregât biwiñân siâ siâ bo kindo ekmâ ârândânj aktâpgât

⁴⁵ âmâ arim galalupñe bât biken lâuwâ bâleñe dondâ akmai are âmâ mem miawakye kmâ kewuguyekto togom manbiâ umatñe bâleñe dondân manmâ âgâwiap. Akto agak meme hain arekñe luâk âmbâle bâleñe hinñe mandâi are yeñgâlân miawakbiap.” dâep.

Yesugât memene emilupñe.

⁴⁶ Den hain dâm makyenjimbo ainâk memene emilupñe togom betgen kinmâ, “Teunenñe gemenâ makgiñe.” dâm koli.

⁴⁷ Hain dâm konbiâ luâk siâñe hin dâm magañep, “Memege emilupge betgen kinmâ gogonmâ kindâigât gemenâ makgiñberâi.” dâep.

⁴⁸ Hain dâmbo Yesuñe luâklupñe are yekmâ hin dâm magañep, “Memene niñe? Akto emilupne niñema?

⁴⁹ Memene me emilupne amâ ire.

⁵⁰ Ewene himbimân manmap yâkgât launje loko-mai yâkne amâ nângât memene akto emilupne garilupne aktâi.” dâep.

13

Luâkne sot koanje kâmelep.

¹ Akto sop ain Yesune emet are hepunmâ sopanmâ arim bâtgum ginjân talep.

² Ain tato luâk âmbâle dondâne yâkgâlân togom gam ândeanji. Hain agi aregât wanga siân âgâep. Akto luâk âmbâle togoyi are bâtgum dâtnjân kinbiâ makyengiep.

³ Wanga kâlegen kinmâ den ginje dondâ makyengiep are hutjân den ginje siâ ikinjaet pat hin dâm makyengiep, “Luâk siâne sengo alekne mem âi pâinângen ariep.

⁴ Hain akmâ arim mem biken biken pando giep. Dâ sengo alekne bikne âmâ dâwân ge yiep. Are lâutne dowâk togo nem meteyi.

⁵ Dâ bikne âmâ hân kât kâlegen hân dondâ bo ain ge yiep aregât dowâk pâtkombo kâmne dowâk gambo

⁶ dewutâ kârikne pando kândârâne tâlâwâk aregât dipkom moep.

⁷ Dâ bikne âmâ hele kândârâne kâlegen ain ge yiep arekne sopjân pâtkom kâmne gambo hewukne âkâ hainâk gam kârikne akmâ sot tigimbo bunje bo agep.

⁸ Akto sengo alekne bikne âmâ hân kelurâ am-boṇande mem bandikoep ain ge yiep are bikṇande pâtkom agatmâ bunje âlepne agep. Dâ bikṇande amâ pâtkom agatmâ bunje âlepne dondâ agep.

⁹ Gârâmâ ye den ire nângâm biwiyeñân katmâ heñgemgom manbiâ bunje yeñgâlân miawakbiap.” dâep.

¹⁰ Hain dâmbo luâk âmbâle dondâ arimbiâ luâklupñande Yesu hindâm aikoyi, “Amâ wangât den ginñeâk makyenjiât?” dâmbiâ hin makyenjiep,

¹¹ “Ye Anutuñe damunyeñe akmap aregât keñe yonâk malep are miapñân makyenjamin. Dâ luâk âmbâle bikñe Anutuñe bo damunyeñe akmap are Anutugât den patgât keñe miawâk bo makyenjamin.

¹² Aregât luâk âmbâle bikñande siâ me siâ are damun akmâ mem manmai are siâ me siâ siâkâ yeñgire sambe miawaganbiap. Dâ bikñande âmâ siâ me siâ bâlensiâ are mem manmai are mendere yân manbai.

¹³ Aregât den ginñeâk makyenjamin. Amâ yâkñe âmâ ekmâ âmâ bo ekmâ nângâwai. Akto nângâwerâm hâumgowai arekñe keñe bo nângâwai.

¹⁴ Aregât den siâ Yesaianje ulikñân kulemgöep bikñe bunje aktâp. Amâ hin,

Anutuñe hin dâep, “Luâk âmbâle yu mandâi amâ ondopyenñande nângâwai. Dâ hanyenñande âmâ bo nângâm kotgâwai. Akto dewunyenñande ek-bai. Dâ ekmâ âmâ bo heñgemgowai.

¹⁵ Luâk kâmot irekñe hanyenñe kârikñe akto ondopyenñe bokbokñe akto dewunyenñe âmâ bogep. Amâ dewunyenñande siâ me siâ ekmâ ondopyenñande nângâm heñgemgom âmâ han biwiyeñe purikatmâ heñgemgombiâ nâñe mem heñgemgomyekbomgât wan me wan bo ekmâ nângâm heñgemgowai.” Anutuñe hain dâep.

Yesaianje den yu kulemgoep are bunne aktâp.

¹⁶⁻¹⁷ Den bunne makyengiwe. Uliknân Anutugât propete akto luâk âmbâle bikne Anutugât dewunnân agak meme âlepneâk akmâ mali arekne wan me wan unak yeje ekmâ mandâi hainâk ekberâm ukenne humo nângâm mali. Dâ amâ bo egi. Akto den pat âlepne makyengire nângâi ire gai nângâwerâm ukenne humo nângâm mali. Dâ amâ bo nângâyi. Aregât ye âmâ wan me wan ekmai aregât nângâm herone humo akmai. Akto den pat âlepne makyengire nângâmai aregât herone humo nângâm manmai.

Sot kâmelep aregât keije.

¹⁸ Akto nâje luâk siâje sengo palepgât den ginne maktân aregât keije amâ hin.

¹⁹ Sengo palep amâ Anutune damunyeje akbiapgât den dopne makyengiman. Akto dâwân mesokto ge yiep are amâ den maktere bo nângâmbiâ ainâk Bâleje Ambojande dowâk togom den âlepne biwiyenân gewop dâm den pat are kondo bo akmap. Hain are.

²⁰ Dâ sengo bikne hân kât kâlegen ge yiepgât maktân are amâ luâkne hin akmai. Den pat âlepne maktere âlepne nângâm manmai. Akto ire amâ âlepne dâm herone akmâ getek mem manmai.

²¹ Dâ den biwiyenân bo gem henngemgoep aregât getek manmâ umatne siâje me nângât dengât Anutugât gasa togombiân hamep akmâ den are hepunbai.

²² Dâ koaje hele hewukne kândârânân yiep ain palep hân aregât dopne amâ luâk âmbâle hin akmai. Luâk âmbâle den makyengire are

nângâm kinmâ hin dâmai, “Den ire lokowaen.” dâmai âmâ benne sikumgât me puligât me hâkgât ukenne aregât nângâm han lâuwâ akbiâ sikumne kambiamyenne olongo den âlepne hepunmâ sikum aregâlâk nângâmai. Hain nângâm agak meme âlepne bo akmâ bunne bo akmai.

²³ Dâ hân âlepñân palep hân aregât dop amâ luâkne hin akmai. Yâk âmâ den pat âlepne nângâm kotgâm hengemgom mem manmâ agak meme âlepne bunne akmai. Dâ bikñande âmâ hain akmâ agak meme âlepne dondâ akmai. Den dopne maktân aregât keñe amâ hain.” dâep.

Sot âlepne aregât hutñân hele pâtkomap aregât den.

²⁴ Akto Yesune den dopne siâ hin makyengiep, “Himbimân manmap yâkne damunyenje akbiap aregât den dopne hin. Luâk siâne senjo alekne mem âiângen arim kâmelep.

²⁵ Hain kâmeto bo akto emetñân âgâmbo emet dâgâep. Emet dâgâmbo ainâk hârok asin yembiâ âmâ gasane togom senjo kâit aregât alekne mem togom senjo hutñân kâmelep.

²⁶ Hain akmâ arimbo hilâm siân amâ senjo kâmne gambo bunne miawakto senjo kâit bunne bo are âkâ pâtkoep.

²⁷ Pâtkombo luâk aregât hon bawalupne arekne humoyenne hin maganji, “Apo, senjo alekne kâmelen aregât gain gain senjo kâit dondâ hutñân pâtkoâp?” dâyi.

²⁸ Hain dâmbiâ kalam ambonje arekne hin makyengiep, “Maktâi âmâ nângât gasa siâne togom senjo kâit kalep.” dâep. Hain dâmbo âi

luâklupñande hin magañi, “Akto gain gain nângât? Nenñe ari senjo kâit are hindâne me?” dâyi.

²⁹ Hain dâmbiâ hin makyenñiep, “Hain bo. Hep-unñet. Ageine mesokmâ koañe âlepñe hindâ yekbâi.

³⁰ Gârâmâ hepunbiâ hain yendo titnan bunñe miawakto âlepñe ainâk ire senjo, ire bo dâm nângâm kepilâwai. Aregât hâre hâre luâklupne hin makyenñiwian, Arim hele wan bunñe bo are hindâm dâgâm mendugum kâlâwânâk panbiâ oâk. Dâ senjo bunñe olop are orem nângât sot emetñân menduguwei. Hain dâwian.” dâm makyenñiep.”

Lâwin koañe akto kâtembe aregât den.

³¹ Yesunje den dopñe siâ hin dâm makyenñiep, “Himbimân manmap yâkñe damunyeñe akbiap aregât den dopñe hin. Lâwin koañe siâ kotñe wesem are âi luâk siâñe koañe are mem arim ikinje kalamñân kâmelep.

³² Koañe amâ bâlensiâ dondâ. Dâ pâtkom amâ humo akmâ lâwin siânba are hârok ewangiyekmap. Hain akmâ lâwin humo akto lâutñe togom bât bâtñân panmai.” dâep.

³³ Hain makyenñim benñe den dopñe siâ hin dâm makyenñiep, “Anutunje damunyeñe akberâm aktâp amâ kâtembe dop hinare. Âmbâle siâñe kâtembe bâlensiâ mem hamân golanjoep. Akto kâtembe bâlensiâ arekñe ham hârok mângimbo ukenñe agep.” dâep.

Yesunje den dopñeâk magep.

³⁴ Yesunje hain dâm den dopñânâk luâk âmbâle togoyi are makyenñiep. Dâ den miapñân amâ bo makyenñiep.

³⁵ Akto den dopne siâ makyengiep amâ uliknân propete siâne kulemgoep are bunne miawagep hin kulemgoep,

“Nâne den ginneâk hârok makyengiwan. Akto wan me wan Anutune uliknânbak heambukto yem âgâep den are makmâ miawakyingire nângâwai.”

Hain kulemgoep den are bunne akto Yesune den ginneâk makyengim malep.

³⁶ Akto Yesune luâk âmbâle kâmot humo are hepun yekmâ emelan âgâep. Akto hon bawalupnande âgâm maganmâ hin dâyi, “Sengo kâitne kalam kâlegen pâtkoepgât maktât are nenâkâ keine maknengimenâ nângâne.” dâyi.

³⁷ Hain dâmbiâ Yesune den ginne aregât keine hin makyengiep, “Luâk sengo alekne kâmelep amâ luâk akmâ geân nâ.

³⁸ Dâ kalam amâ kepia hârok. Dâ sengo koane âlepne amâ luâk âmbâle Anutune damunyeje akberâm aktâp are. Dâ hele bâlene amâ Bâlene Ambonaet luâk âmbâle.

³⁹ Dâ gasane togom kalam kâlegen hele bâlene koane kâmelepât maktân amâ Hiangi Ambone yâk. Dâ kalamân sot bunne memegât maktân amâ hâmbâi sop humoân miawakbiap aregât maktân. Dâ are amâ anelone mendugum kâlâwân ombaigât maktân amâ hâmbâi dop hainâk hân himbim bo akbiandat sop ain miawakbiap.

⁴⁰ Dâ hele bâlene hindâm kâlâwân ombaigât maktân amâ dop hainâk hâmbâi miawakbiap.

⁴¹ Amâ luâk akmâ geân nâne anelolupne hungun yengire wan me wanne luâk biwiyene mem

bâlimap are akto luâk agak meme bâlenje akmai are olonyekmâ kâlâwân panyekbiâ gewai.

⁴² Gem indem hâk hilâlâm humo nângâm elewe-tyeje igim kinmâ manbai.

⁴³ Akto sop ain luâk âmbâle agak meme âlepneâk akmâ manmai are âmâ Eweyenjaet dewunñân dewutâ dewunje hinare akmâ pagalem kinbai. Gârâmâ ye den ire biwiyenñân katmâ nângâm manbei.

⁴⁴ Akto Anutune damunyeje akberâm aktâp are âmâ luâk siâne tâwât dewunje kalam kâlegen heambukto yiep hainare. Akto luâk siâne tâwât dewunje are ekmâ benje yâkâ hainâk lâuwâne heambugep. Hain akmâ aregât mârune dondâ akmâ wan me wan mem arimbo luâk bikñande puligoyekbiâ puli are mem arim tâwât dewunje egep are memberâm kalam are puligoep.

⁴⁵ Anutune damunyeje akberâm aktâp are âmâ sikum luâk siâne kune âlep âlepgât undâgâtmap hainare.

⁴⁶ Luâk arekne kune siâ âlep âlepne dondâ ekmâ âmâ ikinjandeân siâ siâ mem arim yengimbo puli wanbiâ puli arekne kune delem are puligoep.

⁴⁷ Akto siâ gai hainâk Anutune damunyeje akberâm aktâp amâ hin. Âi luâk bikñande ñalu ñalu panbiâ haru kâlegen gembo inñan bâlenje âlepne hârok olonyegi.

⁴⁸ Olonyekbiâ pikbiâ ginnângen olonbiâ giep. Hain akmâ inñan âlepne âmâ kepilâmbiâ kondo siân giep. Dâ inñan bâlenje amâ pali.

⁴⁹ Hainâgâk hâmbâi himbim hân ire bo akbiap sop ain âkâ hainâk akbai. Anjelone gem luâk bâlenje

luâk âlepñe yengât hutyeñe tete manmai are mem kepilâ yekbai.

50 Hain akmâ kâlâp humo om yemap ain panyekbai. Akto sop ain âmâ hâk hilâlâm nângâm elewetyeñe igim indem kambonmâ yembai.” dâep.

51 Akto Yesuñe aiyengum hin dâep, “Den keñe hârok makyengîân are âlepñe nângâi me bo?” dâambo, “Âlepñe nângâen.” dâyi.

52 Akto hin makyengiep, “Mosegât den tâmbâñe makmâ hulanmai areyengâlân gâtñe siâ himbimân manmap yâkñe damunyeñe akbiapgât keñe makyengire nângâmap âmâ hin akmap. Itoânba sikum tâwât irakñe akto wan tâmbâñe lândem katmap.”

Nasarete kepiân gâtñande Yesu hâkâñe agi.

53 Yesuñe den ginñe are hârok makmâ metem hân are hepulep.

54 Hepunmâ ikeñe kepiânân arim den emetñe âgâm den pat âlepñe makyengiep. Hain akto luâk âmbâle arekñe otneyeñe arimbo sân sân mem hin dâyi, “Luâk ire amâ niñande hekalanndo nângâ nângâñe miawaganmap akto kulem keñe keñe mendo miawakmap?

55 Imâ nengâlân gâtñe, eweñe Yosepe emet ketugu ketugu âi meminep akto memene amâ ingâtñe Maria are akto emilupñe amâ Yakobo siâ akto Yosepe akto Simon siâ akto Yudasi

56 akto garilupñe amâ in mandâi aregât yâk siâ me siâ hârok are yâgâtenba mem miap palep?”

57 dâm nângâmbiâ bâliep. Hain akbiâ Yesuñe hin makyengiep, “Anutugât Propete siâñe hân siân siân

arim makyengimbo denŋe nâŋgâm heŋgemgomai. Dâ ikiye kepijanân âgâm makyengimbo âmâ hâkân akmâ hamianmai.” dâep.

⁵⁸ Hain dâm kepia ambolupŋande biwiyene yâkgâlân bo katmâ âmâ hâkân agi aregât yâk yenġâlân gâtŋe konok konok mem heŋgem yenġuep.

14

Heroteŋe Yohane kondo moep.

¹ Akto sop ain luâk kembu kotŋe Herote arekŋe Yesuŋe âi mem kotŋe siâ siâ akmâ malep aregât den nâŋgâep.

² Nâŋgâm hoŋ bawalupŋe makyengim hin dâep, “Luâk kotŋe Yohane tu puli keiŋe kalep are emelâk moep arekŋe sumânba agatmâ mandâp. Aregât kulem keiŋe keiŋe siâ siâ memap.” dâep.

³ Dâ Heroteŋe Yohane kondo moep aregât keiŋe hin. Ulikŋân Herote are akto luâk siâ kotŋe Pilipo emi teu tatminiat. Akto Pilipo arekŋe âmbenŋe kotŋe Herodia miep. Mendo âmbâle arekŋe luâkŋe Pilipo are hepunmâ Herote miep.

⁴ Hain manbela Yohane tu puli keiŋe kalep arekŋe Herote hin maganep, “Den kârikŋe kom kandâge memenâ bâliâp.” dâep.

⁵ Hain dâmbo kondere moâk dâm kala busi kâlegen kato talep. Hain akto âmâ luâk âmbâleŋe Yohane âmâ Anutugât Propete dâmini aregât Heroteŋe hamewakmâ hepulep.

⁶ Akto tatmâ hilâm siân Herote miawagepgât hombaŋ sopŋe akto galalupŋe mendugu yekmâ sot om yenġiep. Sot om yenġimbo mendugum nem tatbiâ âmbenġaet baratŋe âmbâi sigan arekŋe

hutyenân kinmâ kenğu kom ândiep. Hain akto âmâ kambiamyenê âlepne akto

⁷ Heroteņe hin dâep, “Anutugât dewunņân makbe. Wan me wan ekmâ ulit niņmenâ âmâ are âmâ âlepne giņbian.” dâep.

⁸ Hain dâmbo arim memenê aikombo memenande Yohane kombiâ moâk dâm maganđo baratņande bam Herote hin maganep, “Yohane tu puli keiņe kalep aregât kautņe hârem kondoân katmâ niņ.” dâep.

⁹ Hain dâmbo Heroteņe nâņgâmbo umatņe agep. Gârâmâ magep aregât den koko bo agep. Akto luâk tali are yenġât dewun yenġân denņe gewopġât magep.

¹⁰ Akto hoņ bawaņe siâ tâwât amboņe are hunġun anđo tâwât mem arim kala busi kâlegen âġâep.

¹¹ Âġâm Yohanegât hanņe hârem kautņe konđoân katmâ mem gutmâ âmbâi sigan are waņep. Waņđo memenaelân lokom ariep. Lokom arim memenê waņep.

¹² Akto Yohanegât hoņ bawalupņande pat are nâņgâm ari hâkņe mem hangoyi. Hangom âmâ aregât arim Yesu maganġi.

Yesuņe luâk 5,000 sot yenġimbo neyi.

¹³ Yesuņe den are nâņgâm kepia are hepunmâ luâk âmbâle donđâ are hepun yekmâ waņga mem hân pumângen ariep. Arimbo luâk âmbâleņe nâņgâm kepia humo hepunmâ kei hân watmâ togoyi.

14 Akto wangbanba sopanbiâ Yesuŋe luâk âmbâle dondâ yekmâ okot nâŋgâyeŋgim kundatdâ mem heŋgem yeŋguep.

15 Hain akmâ mando hoŋ bawalupŋande togom hin maganŋi, “Emet enŋaiŋe aktâp. Akto hân iren kepia me emet bo tatâi aregât luâk âmbâle ire huŋgun yeŋgimenâ mopyeŋe aguwoŋgât kepia en-emânâk ain arim sot puligom neŋet.” dâyi.

16 Hain dâmbiâ hin makyenŋiep, “Wangât ariŋetgât maktâi? Ye sot om yeŋiŋet.” dâep.

17 Hain dâmbo hin dâyi, “Nen âmâ sot bo menden. Sot koaŋe momerâk akto iŋan lâuwâ kindâp.” dâmbiâ hin dâep,

18 “Sot are niŋŋet.” dâmbo mem ga wangbiâ

19 luâk âmbâle makyenŋimbo umiliŋ kakŋe tete tatmâ ariyi. Hain tatbiâ sot are mem kinmâ him-bimân ekmâ Anutu mepaiŋe miep. Mepaiŋe mem sot yeŋgimbo luâk âmbâle are yeŋgiyi.

20 Yeŋgimbiâ nem tepyeŋe pikto sot pipiŋe ge yiep are pitim mendugum haka bâb bip bip hârok keiân lâuwâ lugumbiâ pigep.

21 Akto luâk sot neyi are yeŋgât yalayeŋe âmâ 5,000. Dâ âmbâle nanaŋ âmâ bo oyaŋyegi.

Yesuŋe bâtgum kakŋân ariep.

22 Ainâk Yesuŋe hoŋ bawalupŋe huŋgun yeŋgim hin dâep, “Yeŋe soŋ wangan âgâm haru biken arimbiâ âmâ nâmâ titnan luâk âmbâle ire huŋgun yeŋgire arimbiâ âmâ togowerân.” dâep.

23 Hain dâmbo arimbiâ yâk luâk âmbâle are huŋgun yeŋgimbo hârok arim metembiâ ikiŋeâk Anutu ulilaŋberâm gimbiâŋe siân âgâep. Âgâ eweŋe ulilaŋmâ kindo emet enŋaiŋe agep.

24 Engaiŋe akto luâklupŋe waŋga mem arim emelâk haru tânâmŋângen ariyi. Arimbiâ waŋga hâmeŋângenba seru gambo waŋga are âgâm gem malep.

25 Gem mando emet haunberâm akto hândâk pipiŋe tatoâk Yesuŋe haru kakŋân tâlim tâlim yâk yengât enemyeŋân togoep.

26 Togombo ekmâ sân sân mem ongâyeŋe hogombo hin dâyi, “Niambi siâ togoâp.” dâm hamewakmâ kamboŋi.

27 Kamboŋbiâ âmâ dowâk makyenŋim hin dâep, “Bo hamewakŋet. Biwiyeŋe sândugeâk. Nâŋe to-goân.” dâep.

28 Hain dâmbo Petoroŋe hin maganep, “Gâŋe to-goât aregât nogonmenâ nâkâ haru kakŋân tâlim tâlim gângâlân gutbe.”

29 Hain dâmbo Yesuŋe, “Âlepŋe gut.” dâmbo Petoroŋe waŋga hepunmâ gem haru kakŋe tâlim tâlim Yesugâlân baep.

30 Bam haru are ekto seruŋe waito agatmâ gem agatmâ gem akto ekmâ hamewagep. Hamewakmâ haruân gewerâm agep. Hain akmâ konmâ hin dâep, “Humo tân nugu.” dâmbo

31 Yesuŋe dowâk bâtŋe panmâ Petoro mem hin maganep, “Gâ nâŋgât biwige bo katmâ heŋgemgomat. Gâ wangât han lâuwâ aktât?” dâep.

32 Hain maganŋo waŋgan bam âgâmbela ainâk seru nânâgâep.

33 Akto luâk waŋgan tali yâkŋe enemŋân kâŋgom hin dâyi, “Gâ Anutugât Nanŋe bunŋe.” dâyi.

34 Haru are hâtikom kepia siâ kotŋe Genesaret ain ariyi.

³⁵ Arimbiâ patŋe nâŋgâm togom ekmâ nâŋgaŋi. Akto luâk arekŋe den katbiâ kepia ewumâk ewumâk ariep. Akto luâk âmbâleŋe kundatdâ meyekmâ yâkgâlân togoyi.

³⁶ Togom Yesu konmâ maganmâ hin dâyi, “Apo nengâlân gâtŋe kundatdâ irekŋe sâŋgumge howaim âmâ âlepŋe akŋet.” dâmbiâ âlepŋe dâmbô bikŋande howaimbiâ Yesuŋe heŋgem yeŋguep.

15

Sotŋe biwinenŋe bo hilipkomap.

¹ Sop ainâk Parisaio luâk akto Yuda luâk yâk hârokŋe bâgilupyenŋe yeŋgât den lokom sot nemberâm akmâ bâtyenŋe pulimâk sot nemini. Luâk arekŋe Yerusalem kepiansa togom Yesugâlân mendugum hin dâm aikoyi,

² “Honŋ bawalupgande wangât bâgilupnenŋe yeŋgât den bo lokom bâtyenŋe tuân bo pulim yân sot mem nendâi?” dâyi.

³ Aregât hin makyenŋiep, “Dâ ye amâ wangât yeŋjaet agak memeyenŋe bâliwopgât Anutugât den kârikŋe kalep are loŋgaimai?

⁴ Aregât keiŋe hin. Anutuŋe den kârikŋe makto Mosenŋe kulemgœp bikŋe hin tatâp, “Gâ ewege memege amukyetŋân manben.” akto bikŋe hin tatâp, “Luâk âmbâle siâŋe ewenŋe memenŋe den bâleŋe makyenŋiwiap âmâ humomolupŋande kombiâ mombiap.” hain tatâp.

⁵ Aregât ye den hamianmai. Hamianmâ hin dâmai, “Luâk âmbâle siâŋe ewenŋe memenŋe hin dâm makyetkiwiap, “Meŋ, apo, sot me puli me wan me

wan yetkiwiangât are Anutugât sumbe emetjân katere tatbiap.”

⁶ dâm puli me wan me wan are ain kato tato ârândân akbiap.” dâmai. Aregât eweje memene tanyenguwiapgât nângâmbiâ gemap. Akto nengât den bunje agâk dâm Anutugât den kombiâ gemap.

⁷ Ye hiangi luâk. Ulikjân propete Yesaiane ye dop yengum hin kulengoep,

⁸ Anutuje hin dâep, “Luâk âmbâle kâmot irekne lauyenandeak nângât kotne mem agatmai. Dâ han biwi olowâk amâ bo.

⁹ Akto luâk yengât den are nângâmbiâ bunje akmap. Hain akmâ hâkneak nângât kotne mem agatmai.” hain kulengoep are bunje akto ye Anutugât den kombiâ nângâre dondâ bâliâp.” dâep.

¹⁰ Akto Yesuje luâk âmbâle yengondo togombiâ hin makyengiep, “Ye den ire nângâm hengengom mem biwiyenân katjet.

¹¹ Wan me wan luâkne lauyenân nembiâ gemap arekne âmâ luâk mem helen bo ketugu yekmap. Dâ wan me wan luâk biwiyene kâlegen yem lauyenânba gamap arekne âmâ luâk mem helen ketugu yekmap.” dâep.

¹² Hain dâmbo hon bawalupjande togom maganjmâ aikom hin dâyi, “Parisaio luâk makyengimenâ nângâm bâlignjâi are nângât me bo?” dâyi.

¹³ Hain dâmbiâ hin dâm makyengiep, “Ewenande bo kâmetryegek are hâmbâi hârok hindâm panyekbiap.

¹⁴ Aregât yene hepun yekbei. Luâk dewunyetne bok bokne arekne olojakmâ gain gain dâp hekalangiwandât? Gârâmâ Parisaio luâk amâ

dewunyeŋe bok bokŋe hainâk luâk âmbâle Anu-tugât dâp hekat yeŋgiweren dâm dâp bâlenjângen oloŋyekmâ arimai.” dâep.

¹⁵ Hain dâmbo Petoroŋe maganmâ hin dâep, “Apo, den dopŋe maktât aregât keiŋe maknengi-menâ nâŋgâne.” dâep.

¹⁶ Hain dâmbo hin dâep, “Woe, yekai hainâk nâŋgâ nâŋgayeŋe bo me?”

¹⁷ Ye den iregât keiŋe nâŋgâŋet. Ye sot nem-biâ lauyenjâmba gem tepyeŋân tatmap. Akto tepyeŋânba âmâ gem lâmân arimap.

¹⁸ Dâ luâk âmbâle bâleŋe yeŋgât biwiyenjân wan me wan yemap are makbiâ den arekŋe luâk âmbâle mem helen ketugu yekmap.

¹⁹ Aregât keiŋe hin. Luâk âmbâle bâleŋe are yeŋgât biwiyenjân hin yemap. Nâŋgâ nâŋgâ bâleŋe siâ yeŋgumbiâ moŋetgât, luâkdâ âmbendâ mem hepunak hepunak, egâlian bâleŋe, kâmbu, hiangi den akto den hembalik galagât hogo hogo bâleŋe olowâk.

²⁰ Arekŋe luâk âmbâle biwiyenjân gemap. Hain gem miawakto bâleŋe akmai. Dâ luâk âmbâle bâtyeŋe bo pulim sot mem nemai are amâ bâleŋe bo akmap.” dâep.

Âmbâle siâŋe Yesu ulilanep.

²¹ Yesu kepia are hepunmâ kepia lâuwâ kotyetŋe Tiro akto Sidon aregen ariep.

²² Ain arimbo âmbâle siâ Kanan gâtŋe Yuda gâtŋe bo arekŋe togom Yesu hin ulilanep, “Humo, Dawidigât hakuŋe nâŋgât akmâ han kalem akniŋ. Sinduk baniara bâleŋe siâŋe baratne mem bâlimbo umatjânâk manmap.” dâep.

23 Hain dâmbô Yesuñe den hâuñe bo magañep. Hain akto âmbâle arekñe hoñ bawalupñe hâwât yekto Yesu hin magañi, “Apo, âmbâle irekñe hâwât nenekto hâkân akten aregât watmenâ ariâk.” dâyi.

24 Hain dâmbiâ Yesuñe aregât hin magep, “Israegât kâmotñe gulip manmai are henñgem yenñguwen dâm Anutuñe huñgun niñdo geân. Dâ kâmot siâ siâ are yenñgât bo geân.” dâep.

25 Hain dâmbô âmbâle are gutmâ enemñân kânñgom kinmâ hin dâep, “Humo, gâñe nâ tân nugu.” dâep.

26 Hain dâmbô hin dâep, “Nanan yenñgât sot are mem dua yenñgiennñe bo ârândân akmap.” dâep.

27 Hain dâmbô hin magañep, “Kembu, bundâk maktât are nânğare ârândân aktâp gârâmâ nananñe soñ sot nem tatbiâ pipiñe gembo âmâ duanñe hanâk nemai.” dâep.

28 Hain dâmbô hin magañep, “Meñ, den hain maktât aregât han biwigande nânğâ niñmâ kepilâm kinmâ maktât aregât nânğâ giñdân.” dâep. Hain dâmbô emetñân arim sinduk baniara arekñe Yesuñe magep sop ainâk baratñe are hepulep.

Yesuñe luâk biwirâ mem âlepñe ketuguyegep.

29 Akto Yesu kepia are hepunmâ Galilaia bätgum giññân ariep. Arim gimbânñe siân âğâ talep.

30 Akto luâk âmbâle dondânñe yâkgâlân mendugum luâk âmbâle keiyenñe bâlenñe me dewunyenñe bok bokñe akto hagityenñe goñ goñ agu agunñe me den bo makmâ mali akto kundat keiñe keiñande meyegep are loko yekmâ togo Yesugât keiñân menduguyegi. Hain akbiâ Yesuñe mem henñgem yenñguep.

³¹ Hen gem yen gumbo denyen bo arekne den hogoyi akto hagityen kâm kâmne are ârândân akyengiep akto keiyen bâlen arekne bam guli akto dewunyen bok bokne arekne emet egi. Hain akbiâ luâk âmbâle ain kili arekne are yekmâ nângâmbiâ dâtne agep. Hain akmâ Israegât Humoyen Anutu aregât kotne mem agali.

Yesune luâk 4,000 sot yengimbo neyi.

³² Yesune hon bawalupne yengondo togoyi. Togombiâ hin makyengiep, “Nâ luâk âmbâle ire yekmâ okotne nângân. Nâ olop tatmâ manbiâ hilâm âlâwu bo akto sot bâlâk tatmâ mandâi. Gârâmâ sot bâlâk âmâ bo hun gun yengire ariwerâi. Ageine yân hun gun yengire arim dâwân sotgât dewun biri yenguwop.” dâep.

³³ Akto hon bawalupnande hin dâyi, “Hân iren âmâ an gim nene bo tatâp aregât yâgâtenba sot unduwâk mem luâk âmbâle kâmot humo ire yengiweren?” dâyi.

³⁴ Dâmbiâ Yesune hin makyengiep, “Yengâlân sot wan kindâp?” dâmbo hin dâyi, “Sot koan nâmbulân lâuwâ akto in an bâlen malen konok konok kinnengiâp.” dâyi.

³⁵ Hain dâmbiâ Yesune luâk âmbâle are makyengimbo hân tete tatmâ ariyi.

³⁶ Akto Yesune sot koan nâmbulân lâuwâ are akto in an amon siâ are mem Anutu mepain mem munditmâ yengiep. Yengimbo potatmâ luâk âmbâle are yengiyi.

³⁷ Yengimbiâ nem tepyen pikto hon bawalupnande sot pipine are pitim mendugum haka nâmbulân lâuwâ lugumbiâ pigep.

³⁸ Akto luâk sot neyi are âmâ 4,000. Dâ âmbâle nanan âmâ bo oyanjegî.

³⁹ Akto Yesuñe luâk âmbâle are hungun yengimbo arim meteyi. Arim metembiâ âmâ luâklupñe olop wangan âgâm kepia siâ kotñe Magadan aregen ariyi.

16

Yesuñe kulem mendo eknegât makbiâ bo dêep.

¹ Akto Parisaio luâk bikñe akto Sadukaio luâk bikñe arekñe Yesu dop kom hianberâm togom hin maganji, “Himbimgât kulem siâ memenâ ekne.” dêyi.

² Hain dâmbiâ hin dêep, “Ye amâ hin akmai. Engainje akto himbim gilâm aktâp are ekmâ hin dâmai, “Woe, hamandat gilâm aktâp aregât emet huraguwerâp.” dâmai.

³ Dâ hândâgân hamandatñe tigimbo hin dâmai, “Woe, hamandat hândâk aktâpgât unak amâ tânâk seru akberâp.” hain dâmai. Aregât emet kulem keiñe ekmâ nângâm hengemgomai. Dâ sop humo aregât keiñe amâ bo nângâmai.

⁴ Aregât siâkâ makbe. Luâk âmbâle bâlenje akmâ dêp gulip manmai arekñe kulem miawakto ekne dâmai. Ulikñân luâk kotñe Yona wan miep aregât kulem konok areâk miawakto ekbai.” dêep. Hain dâm Yesuñe hepun yekmâ luâklupñe olop wangan âgâm ariyi.

Parisaio akto Sadukaio luâk minao makyengiep.

⁵ Wanga mem bâtgum hâtikowerâm akbiâ luâklupñe nelâm yengimbo sot bo mem bâtgum hâtikoyi.

⁶ Akto Yesuŋe makyenġim hin dâep, “Parisaio akto Sadukaio yenġât kâtembe areġât biwiyenjaet damunŋe golâk manbei.” dâep.

⁷ Hain dâmbo maganġi goanġi akmâ hin dâyi, “Sot bo mem togoen areġât maktâp.” dâmbiâ

⁸ nânġâm hin makyenġiep, “Ye sotġât nânġâmbiâ humo aktâp areġât nânġâlân biwiyenġe getek kat-mai.

⁹ Nâ siâ me siâ agân areġât nelâmyenġiep mon? Luâk 5 tausen akmâ sot koanġe momerâk nembiâ pipiŋe gembo haka dondâ lugumbiâ pigep.

¹⁰ Akto luâk 4 tausen akmâ sot nâmbulân lâuwâ nembiâ tepyenġe pigep. Pikto pipiŋe gembo haka dondâ lugumbiâ pigep.

¹¹ Areġât sotġât bo nânġâmbiâ humo akbiap akto kâtembe ġât maktân are âmâ sotġât bo maktân. Maktân are lâuwânġe maktere nânġânġet. Parisaio akto Sadukaio yenġât kâtembe hâkŋe hâkŋe arekŋe yenġâlân hâtikombo bâliwâi.” dâep.

¹² Hain dâm makyenġimbo hin maganġi goanġi agi, “Sotġât hanokoak bo akŋet dâm maknengiâp. Parisaio akto Sadukaio yâk yenġât den nânġâwâi dâm maknengiâp.” dâyi.

Petoroŋe Yesuġât keiŋe makmâ hulanġep.

¹³ Akto ainba arim hân kotŋe Kaisarea kotŋe siâ Pilipi areġen ariyi. Ain arimbiâ Yesuŋe hin aiyenġuep, “Luâk âmbâleŋe nâ luâk akmâ ġeân nânġât ġain ġain dâmai?” dâmbo

¹⁴ hin dâyi, “Bikŋande âmâ Yohane tu puli luâk arekŋe mandât dâmai. Dâ bikŋande âmâ Elianġe gem mandât dâmai. Dâ bikŋande âmâ propete siâ

kotņe Yeremia me propete siâ me siâne mandât dâmai.” dâyi.

¹⁵ Hain dâmbiâ hin aiyenguep, “Dâ yeņe âmâ nâņgât gain gain dâm nâņgâ niņmai?” dâmbo Petoro kotņe siâ Simon arekņe hin magañep,

¹⁶ “Anutuņe huņgunanđo miawakbiapgât dâtâņe Anutu manman kârikņe yâkgât nanņe gem mandât.” dâep.

¹⁷ Hain dâmbo hin dâep, “Simon Yonagât nanņe luâk âmbâle siâne den ire makgiņđo bo maktât. Ewene himbimân mandâp arekņe den ire makgiņđâp aregât heroņe ak.

¹⁸ Gâņgât kotge Petoro den aregât keiņe amâ kât aregât dopņe hainâk yu maktât den arekņe nune emet ketuguwian ain Hememgât ambolupņande nâņgât kâmot are mem ge katyekberâm âi humo mem kinmâ pâpkowai.

¹⁹ Akto nâ himbim kâleņæet hâņgigât tâkņe giņbian aregât gâ hânân wan hikowiatgât âi memenâ himbimân gai hikowiapgât miawakbiat. Dâ hânân hulaņbiatgât âi memenâ himbimân gai hulaņbiapgât miawakbiap.” dâm magañep.

²⁰ Akto Yesuņe hoņ bawalupņe makyengim hin dâep, “Nâ Anutuņe huņgun niņđo geân iregât den siâ me siâ bo makyengiwei.” dâep.

Yesuņe mom agatbiapgât makyengiep.

²¹ Akto sop ain Yesuņe keiņe katmâ Yerusalem kepiân âgâmbo Israe yeņgât humomolupyeņe akto Mosegât den kârikņe makmâ kepigi akto sumbe kat kat luâk arekņe mem siâ siâ mâņgim hâk hilâlâm waņmâ kombiâ mom benņe hilâm âlâwu

bo akto momonânba agatbiap aregât den hon bawalupne makyengiep.

²² Akto Petoroŋe Yesu kewugum ginŋângen bam den kugâk kugâk mângim hin maganep, “Humo, gâ hain bo akbiat. Wan me wan akŋinbaigât maktât are gângâlân bo miawakbiap.” dâep.

²³ Hain dâmbo Yesuŋe purik dâm Petoro maganmâ hin dâep, “Gâ Hiangi Amboŋe aregât hepunnek. Gâmâ nâ peŋ panmâ nuguâkgât dâp tiginiŋdât. Gâ Anutugât nâŋgâ nâŋgâ are bo nâŋgât. Gâ luâk yeŋgât nâŋgâ nâŋgâ are nâŋgâm maktât aregât heniŋdât.” dâep.

Yesu olop manbaengât den.

²⁴ Hain dâm hârok hin dâm makyengiep, “Luâk âmbâle bikŋande biwiyene nâŋgâlân katmâ nâ olop ariwerâm âmâ wan me wanŋe hilipyenŋuwiap aregât bo hamewakmâ hanâk watnekmâ manbei.

²⁵ Dâ siâŋe ikinŋe hâkŋe gangerâwiap are âmâ yâk manman âlepŋe bo penianbiap. Akto siâŋe nâŋgât den âi aregâlâk nâŋgâm mando kombiâ âmâ momonân ba agatbiap.

²⁶ Luâk siâ hângât wan me wan hârok mem mando manmanŋe gulip akto gain gain manmanŋe miawaganbiap? Akto manmanŋaet den dâtâŋe are gain mendo ârândân akbiap?

²⁷ Aregât keiŋe hin. Sop humoân Ewenâet pagaleŋe olop akto aŋelolupŋe âkâ olowâk Ewenande luâk akmâ geân nâ lâuwâŋe hunŋun niŋdo gewian, sop ain âmâ luâk âmbâle agak meme akmai aregât hâuŋe hainâk yeŋgiwian.

²⁸ Akto aregât makyengire nâŋgâŋet. Luâk bikŋe yu kindâi ire hâmbâi boâk mombiân nâ emelâk

luâk akmâ geângât togom damunyeŋe aktere nek-bai.” dâep.

17

Yesuŋe gimbânân himbim towat agep.

¹ Akto hilâm nâmbulân konok bo akto Yesuŋe Petoro Yakobo akto emiŋe Yohane kewugu yekto gimbânŋe siâ ain âgâyi. Âgâm ain yeŋeâk kili.

² Ekmâ kinbiâ Yesugât hâkŋe purik âgâmbo anğâ agep. Hain akto enem dewunŋe arekŋe dewutâ dewunŋe hinare akmâ pakpak dâep. Pakpak dâmbo sângumŋe wan arekŋe kau kau dondâ agep.

³ Akto ainâk Mose akto Elia miawakbela Yesu olop den maganği goanği akbiâ yegi.

⁴ Akto Petoroŋe yekmâ Yesu maganğmâ hin dâep, “Humo wan siâ hekat nengimenâ ekten aregât ukenŋe nânğâen. Gârâmâ gâŋe âlepŋe dâmenâ âmâ nâŋe uligi âlâwu in ketuguwerân. Gângât siâ akto Mosegât siâ akto Eliagât siâ.”

⁵ Hain dâm makmâ kindo are olowâk hamandat kau kau arekŋe tigiyegep. Akto hamandat are kâlegenbak den siâ hin miawagep, “Ire âmâ nânğât nanne akto biwinande mem hengemgoman. Akto yâkgât agak meme aregât ukenŋe akman gârâmâ ye yâkgât den nânğâwei.” dâep.

⁶ Akto hoŋ bawalupŋande den are nânğâm hamewakmâ enem dewunyeŋe hânângen gembo kânğom tali.

⁷ Akto Yesuŋe enemyenân gutmâ mem goanğ yekmâ hin makyenğiep, “Agatŋet. Ye hamep bo akŋet.” dâmbo

⁸ agatmâ luâk lâuwâ are bo yelegi. Yesuņe konok ikinjak kindo egi.

⁹ Akto gimbâņe are hepunmâ pelepņe gem gem Yesuņe den kârikņe makyenġim hin dâep, “Wan me wan âuren ye ektâi areġât den luâk siâ me siâ bo maganbei. Titnan luâk akmâ geân nâ momonânba agatbian ain âmâ âlepņe makyenġiwei.” dâep.

¹⁰ Akto hoņ bawalupņe olop kili arekņe aikom hin dâyi, “Moseġât den kârikņe makmâ kepikmai arekņe hin dâmai, “Eliane lâuwâņe togombo âmâ haminân Anutugât hoņ bawa togowiap.” dâmai. Amâ gain gain?” dâyi.

¹¹ Hain dâmbiâ hin makyenġiep, “Amâ bundâk, Eliane âmâ togom wan me wan are hârok heņgemgowiap.

¹² Gârâmâ areġât hin makyenġiwe. Elia âmâ lâuwâņe emelâk togoep gârâmâ luâk bikņande bo ekmâ nânġâm heņgemgom ukenyeņe watmâ agak meme keiņe keiņe aganbiâ moep. Areġât hainâk akmâ luâk akmâ geân nâ hâk hilâlâm niņbiâ mombian.” dâep.

¹³ Yesuņe hain dâmbo hoņ bawalupņande hin nânġâyi, “Eliagât maktâp amâ Yohane tu puli keiņe kalep areġât maktâp.” dâyi.

Aposolone nanan siâ heņgemgone dâm hâumgoyi.

¹⁴ Akto arewa gembâi luâk âmbâle dondâ yâkgâlân togoyi. Akto luâk siâņe Yesugât enemņân togom pâwutņe ligim hânân tatmâ kânġom hin maganep,

¹⁵ “Humo, gâ hanâk nannaet okotge nânġâ. Nâ nune nanne biwi gulip akmâ manmap. Akto kâlâwân me tuân gembo sop unduwâk aktâp.

16 Akto gângât hoŋ bawalupgande mem heŋgemgoŋet dâm mem togore heŋgemgowerâm âsimbiâ bo agep.” dâep.

17 Hain dâmbo Yesuŋe hin dâep, “Ye wangât nâŋgâlân biwiyenŋe bo katmâ âmâ yenŋaelâk nâŋgâm kautyenŋe oremai. Nâ ye olop sop kâlep bo manbaen aregât arire âmâ ye gain gain akmâ manbai? Akto sokom katyektere sop kâlep akbiap mon? Bâin, nanan are kewugum nâŋgâlân ganŋet.” dâep.

18 Hain dâmbo kewugum yâkgâlân âgâmbiâ sinduk baniara bâlenŋe are den kugâk kugâk mângimbo luâk sigan are hepunmâ ariep. Akto ainâk kundat are bo agep.

19 Akto hoŋ bawalupgande ikinŋeâk yonâk tatoân Yesugâlân togom maganmâ hin dâyi, “Keiŋe gain gaingât nenŋe sinduk baniara bâlenŋe are watberâm mem âsienŋe bo aktâp?” dâyi.

20-21 Hain dâmbiâ yâkŋe hin makyenŋiep, “Ye nâŋgâlân biwiyenŋe kârikŋe bo katmâ heŋgemgomai aregât walanberâm âsiâi. Dâ yenŋe biwiyenŋe nâŋgâlân getek katmâ âmâ âlepŋe borâŋe ire maganmâ hin dâwai, “Gâ agatmâ indâgen ari.” dâmbiâ ariwerâp. Akto wan me wan miawagâk dâmbiâ âlepŋe miawakbiap.” dâep.

Yesuŋe mom agatbiapgât makyenŋimbo sop lâuwâ agep.

22 Akto Yesu Aposololupŋe olop Galilaia hânân ariyi. Arim Yesuŋe hin makyenŋiep, “Nâ luâk akmâ geân nâ luâk bikŋande nugumbiâ mombian.

23 Akto nugumbiâ mom benje hilâm âlâwuân momonânba agatbian.” Hain dâmbo biwiyenje umatje agep.

Petoroŋe iŋan launânba puli miep.

24 Akto arewa Kapanaum kepiariyi. Akto sumbe kat kat emetjaet puli dâtâje memini arekje Petorogâlân togom aikom hin dâyi, “Yengât tiksayenande sumbe kat kat emetjaet puli siâ katmap me bo?” dâm maganji.

25 Hain dâmbiâ Petoroŋe, “Âo.” dâep. Hain dâm ikinjak emet kêlegen âgâmbo Yesuje soŋ maganmâ hin dâep, “Simon gâ gain gain nângât? Hângât luâk kembuje yeŋe nanlupyenje yeŋgâlânba puli dâtâje memai me luâk anğâ yeŋgâlânba memai?” dâep.

26 Hain dâmbo Petoroŋe maganmâ dâep, “Luâk anğâ yeŋgâlânba memai.” dâmbo Yesuje hin maganep, “Bundâk maktât. Gârâmâ nanlupyenande puli dâtâje kat katgât âi bo memai.

27 Gârâmâ bo katenje nângâmbiâ bâliwopgât hanâk netgât puli dâtâje kat. Gâje haruângen arim tâk panmâ iŋan ulik gulik oloŋberât are tepje gâimenâ puli koanje siâ miawakto mem netgât katberât.” dâep.

18

Nanan gurukje yeŋgât towat manbaen.

1 Akto sop ain hoŋ bawalupjande Yesugâlân togom hin maganji, “Anutuje damun nenje akmap nengâlân gâtje niŋande bikje ewangi nenekmâ damun nenje akbiap?” dâyi.

2 Hain dâmbiâ nanan siâ kondo gambo hutyenân kato kindo

³ hin dâm makyenġiep, “Den ai nuguâi areġât makyenġire nânġâġet. Nananlupyenġande akmai are yeġe hain akbiâ âmâ Anutuġe meyekbiap. Dâ hain bo akbai amâ Anutugât kâmolân bo dewati nenekbai.

⁴ Akto nanan ire hainare akmâ amâ ikinġaet nânġâmbo gewiap areġât yenġâlân ġâtġe siâġe hainâk akmâ ikinġaet nânġâmbo gembo amâ Anutugât kâmot damunyeġe akbiap.

⁵ Akto luâk âmbâle siâġe amâ nanan ire hinare tângomap arekġe amâ nâ tân nugumap areġât dop akmap.

⁶ Dâ luâk siâġe nanan biwiyeġe nânġâlân katmai are yenġâlânba konok bâliwerâm hâkġe hâkġe hain akto amâ ġâuk, siâġe kât humo dondâ hanġân imbogoanmâ haru bâtġumân hâkokombo dâine arekġe amâ siâ me siâ owâiġe miawaganġâp akbop.

⁷ Akto dop yenġumapġe ye hârok dop yenġuwerâm biwiyeġân gewiapġât dop tatâp areġât hân hâroġġât okotne nânġân. Ġârâmâ luâk âmbâle siâġe bikġe bâleġe akġet dâm hilip yenġumbo Anutuġe hâuġe humo wanġiap.

⁸ Akto hememġât pat akbâiġât bâtyeġe me keiyeġe bikġande bâleġe akbâiġât hârem panbei. Hain akmâ keiyeġe me bâtyeġe bikġe are âlepġe akto manbiâ ârândân akbiâp. Dâ bâtyeġe keiyeġe biken biken âlepġe tatbiap amâ arekġe olonġekto kâlâwânâk manmâ âġâwâi.

⁹ Akto dewunyeġande bâleġe akġet dâm olonġ yekto dosa akbâen dâm dewunyeġe are kâwutmâ panbei. Akto dewunyeġe konogâk tatyenġiwiap amâ âlepġeâk manbai. Dâ dewunyeġe lâuwâ lâuwâ tatbiap amâ arekġe olonġ yekto hememġât kâlâp

humo yemap ain gewâi.

¹⁰ Akto himbimân anelone nanan damunyeŋe akmai arekne âmâ hokboâk hokboâk Ewene ekmai. Aregât nanan sisik ire hut nenjân hinare yengât nângâmbiâ gewop.

¹¹ Akto luâk âmbâle hilip aguwaigât nâ luâk akmâ geân nâ heŋgemgo yekbian aregât hin makbe.

¹² Luâk siâ lama 100 kinaŋbiap. Akto hutyeŋânba konokne heambukto ambonande lama bikne are gimbanjân hepun yekmâ siâ heambugep aregât undâgâtbiap.

¹³ Undâgâtâmâ mem miawakmâ okot âlep akbiap. Dâ lama bo heambukmâ âlepneâk kinbai aregât âmâ herone hain bo akbiap.

¹⁴ Hainâk Ewene himbimân mandâp arekne nanan itik matik bâliwâi dâm damunyeŋe akmap.

Galagaet dosa hepunben.

¹⁵ Akto den siâ hin makbe. Galage siâne gâŋgâlân dosa akto âmâ bâlene aregât keŋe pumân maganben. Hain akmenâ yâkne gâŋgât den nângâmbo âmâ gala konok manbiandat.

¹⁶ Dâ yâkne gâŋgât den bo nângâmbo âmâ luâk âmbâle amon siâ yeŋgonmenâ gutmâ den yetne ârândân ketugune dâwai.

¹⁷ Dâ yâk yengât den are bo nângâmbo nângât kâmolân gâtne arim makyenŋiwen. Akto are âkâ hainâk yâk yengât den are bo nângâmbo âmâ gâŋe yâk hin maganben, “Gâmâ luâk bâlene akmai are yengât dop aktât.” dâwen.

¹⁸ Akto aregât bunne maktere nângâŋet. Ye hânân wan hikowaigât âi membiâ himbimân gai

hikowiapgât miawakbiap. Dâ hânân hulanᵊbaigât âi membriâ himbimân gai hulanᵊbiapgât miawakbiap.

¹⁹⁻²⁰ Gârâmâ siân nânᵊgât kâmolân gâtᵊe lâuwâ me âlâwu Anutu ulilanᵊberâm mendugum kinbiâ ainâk nâ hutyenân manbian aregât wan me wan ulilanᵊberâm han konok katmâ Anutu ulilanᵊbai amâ ainâk Ewene himbimân manmap arekᵊe wan me wan âlepᵊe yenᵊgiwiap.” dâep.

Hon luâk hâkᵊe hâkᵊaet den.

²¹ Akto sop ain Petoroᵊe Yesugâlân togom maganᵊmâ hin dâep, “Humo, galanande sop amon nânᵊgâlân dosa akto âmâ nânᵊe dosa are hepun anᵊbian? Nâmbulân lâuwâ akto hepun anᵊbian me kakᵊân siâkâ aktoân hepun anᵊbian?” dâep.

²² Hain dâmbo Yesuᵊe maganᵊmâ hin dâep, “Hain bo. Hanâk luâk are dosanᵊe hepunanᵊmâ âgâwiat.

²³ Aregât den dopᵊe siâ hin makbe. Anutunᵊe damunyenᵊe akbiap amâ luâk kembu hinare yâkᵊe ikinᵊe luâklupᵊe hâuyenᵊaet akmâ henᵊgem yenᵊguwerâm agep.

²⁴ Yâkᵊe hâu are henᵊgemgowerâm âi miep. Akto yâkᵊe luâk siâ yâkgâlân mem ari âi luâk aregât hâu âmâ 13 milion kina hainare.

²⁵ Akto luâk arekᵊe hâu are kutigitbiapgât puli dop hainare bo talanᵊep. Aregât akmâ luâk kembu arekᵊe makyenᵊgimbo luâk are ikinᵊe akto âmbenᵊe nananᵊlupᵊe meyekmâ yenᵊgâlân kotᵊe siâ siânᵊe are hârok puligom benᵊe puli are mem luâk aregât hâu kutigitberâm agi.

²⁶ Hain akto âi luâk arekᵊe luâk kembu aregât enemᵊân kânᵊgom hin maganᵊep, “Gâmâ hanâk

nângât okot nângâm lâmnugu. Hâmbâi âlepņe hâu are gângâlân kutigitbian.” dâep.

²⁷ Akto âi luâk aregât humoņande luâk aregât okotņe akmâ dosaņe hepunaņep.

²⁸ Akto âi luâk arekņe hâkņângen gem benņe ikinņe âi luâk siâ hannân mem metawolep. Amâ luâk aregât hâu amâ 100 kina. Akto âi luâk are mem hin magañep, “Gâņe hâu are hârok kutigitmâ meteniņ.” dâep.

²⁹ Hain dâmbo ikinņe âi luâk arekņe enemņân kângom ulilaņmâ hin dâep, “Gâ nângât okotge nângâm lâmnugu. Hâu are âlepņe gângâlân kutigitbian.” dâep.

³⁰ Hain dâmbo yâkņe yâkgât den are bo nângâm lope kâlegen katmâ hin dâm magañep, “Inâk tatmenâ hâu are ârândân akto âlepņe ariwiat.” dâep.

³¹ Akto hoņ bawa aregât galalupņande den are nângâm bâlianĭ. Hain akmâ arim den are humoyeņe magañi.

³² Akto humoyeņe arekņe damun are kondo guto hin magañep, “Gâ luâk bâleņe. Gâņe ulit niņmenâ aregât hâuge yiep ina hanâk yân hepun gektân.

³³ Nâņe gângât okot nângâ giņdân ina gâkâ âi luâkge aregât okot bo nânganĭdât are nângâre umatņe donĭdâ aktâp.” dâep.

³⁴ Humoņe hain dâm biwiņe kâlâp akto tembe loko yeņgâlân kato membiâ hin makyeņgiep, “Âi luâk bâleņe ire hâk hilâlâm agañbiâ hâu are ârândân akbiap.” dâm makyeņgiep.

³⁵ Aregât keiņe hin. Yeņe galalupyeņe yeņgât dosa are biwiyeņân makmâ manbiâ âmâ Ewene

himbimân mandâp yâkne yengât dosa bo kutigit-biap.” dâep.

19

Âmbâle mem bo hepunyekbaengât den.

¹ Yesune den are hârok makmâ metem Galilaia kepia are hepunmâ hân humo kotne Yudaia tu kotne Yodañ biken ain ariep.

² Arimbo luâk âmbâle dondâne olop ariyi. Akto ain luâk âmbâle kundatdâ dondâ mem hengem yenguep.

³ Akto Parisaio luâkne yâkgâlân togom dop komberâm hiangim hin dâyi, “Gain gain luâkne âmbenlupyeñe watyekbaigât dâp tatâp me bo?” dâmbiâ

⁴ yâkne hin makyengiep, “Ye den ire oyanmâ nângâmai, “Anutune hân himbim ketuguyelelep sop ain âmâ luâk âmbâle ketugu yelegap.

⁵ Ketugu yelekmâ hin dâep, “Luâkne eweñe memene hepun yelekto âmbenñe olop dewati akbiandat. Hain akmâ yâk hâkyetne konok hainare akto manbiandat.” dâep.” den hain tatâp.

⁶ Hain gârâmâ yâk siâkâ ikinêak ikinêak bo akbiandat. Yâk hâkyetne konok hainare akbiandat. Hain gârâmâ Anutune mem mendugu yelegap are luâk siâne luâk âmbâi lâuwâ are potatyelekbiapgât dop bo tatâp.” dâep.

⁷ Yesune hain dâambo Parisaio luâkne maganmâ hin dâyi, “Maktât are gain gain maktât? Wangât Mosenje den kârikne katnengim hin dâep, “Luâk

siâŋe âmbenŋe watberâm âmâ âmbâle hepun hepun-gât kulem esenŋe kulemgom âmbenŋe wanŋmâ wato ârândân akbiap.” dâep?” dâyi.

⁸ Akto Yesuŋe hin makyenŋiep, “Mosenŋe amâ yenŋaet agak meme bâlenŋe akbiâ biwiyenŋe kârikŋe akmap aregât akmâ kulemgoep amâ yenŋe agat agatŋe akbiâ dâp katyenŋiep. Dâ ulikŋân âmâ agak meme ire hain bo yiep.

⁹ Aregât ye hin makyenŋiwe. Luâk siâgât âmbenŋande dâp gulip bo mando âmâ yân luâk arekŋe watmâ âmbâle siâ membiap amâ luâk arekŋe luâkdâ âmbendâ yenŋât dâp are mem bâlimbo dosa miawaganbiap.” dâep.

¹⁰ Yesuŋe hain dâmbo hon bawalupŋande hin maganŋi, “Luâk yenŋât agak meme hain tato amâ luâkŋe hanâk âmbâle bo membiâ ârândân aktâp.” dâyi.

¹¹ Hain dâmbiâ hin makyenŋiep, “Luâk hârokŋe den ire membaigât dop bo. Anutuŋe luâk bikŋeâk kârikŋe yenŋiep. Luâk arekŋeak amâ den ire âlepŋe membai.

¹² Hin. Luâk bikŋe memelupyenŋande meyegiân âmbâle bo meyekbaigât dop tatâp. Dâ luâk bikŋe amâ gasalupyenŋande gâiyenŋimbiâ âmbâle meyekbaigât dâp bo tatâp. Hainâk luâk bikŋande amâ himbingât akmâ âi humo mem manmai yâk âmbâle bo menegât nânŋâmai are ârândân akbiap. Gârâmâ den ire amâ Anutuŋe memenŋe akyenŋimbo aregât kârikŋe manmai.” dâep.

Yesuŋe nanan yenŋât Anutu ulilanŋep.

¹³ Akto sop ain luâk âmbâle bikŋande Yesuŋe nananlupyenŋe bâtnande kautyenŋân mem Anutu

ulilanâkgât yâkgâlân meyekmâ togoyi. Hain akbiâ hon bawalupñande den kugâk kugâk akyenjiyi.

¹⁴ Hain akyengimbiâ Yesuñe hin makyenjiye, “Ye hepunbiâ nanan are nângâlân togoñet. Ye bo mem ganyenye dâñet. Anutuñe damunyenye akbiap amâ nanan hainare yenğât.” dâep.

¹⁵ Hain dâm bâtnande kautyenñan kalep. Katmâ amâ kepia are hepunmâ ariep.

Luâk sikumdâñe Yesu aikoep.

¹⁶ Akto luâk siâñe Yesugâlân togom hin maganep, “Tiksa. Nâ agak meme gain hinare akmâ âlepñe akmâ amâ manman kârikñeâk manmâ âğawian?” dâmbo

¹⁷ hin maganep, “Gâ wan me wan âlepñeâk makniñdât keñe amâ âlepñe Anutu konok. Gârâmâ gâ manman âlepñe manberâm amâ Moseğât den kârikñe kat katñe are hârok watben.” dâmbo

¹⁸ luâk arekñe hin dâep, “Wan den kârikñe?” dâmbo hin maganep, “Den kârikñe amâ hin. Gâ luâk bo yenğumenâ mombai. Gâ luâkdâ âmbendâ yenğât dâp are bo mem hilipkowen. Kâmbu bo akben. Gâ luâk siâğât den bo hiangiwen.

¹⁹ Gâ ewege memege yetğât amukyetñan manben. Akto gugaet akmat hainâk galalupge are akyenjiwen.” dâm maganep.

²⁰ Hain maganđo hin maganep, “Den kârikñe kat katñe ire hârok emelâk akmâ meteân. Gârâmâ wan bânñe mendere amâ manman kârikñe mi-awakniñbiap?” dâmbo

²¹ Yesuñe hin maganep, “Gâ âlepñe dondâ akberâm nângâm amâ ari kotñe siâ siâñe are hârok

yenjimenâ puligombiâ puli are mem ari luâk umburuk yenjiwen. Hain akmenâ âmâ Anutuņe gângât wan me wan âlepņe are himbimân kat giņbiap. Gârâmâ gâ nâ watnekmâ gamenâ arire.” dâep.

²² Hain dâmbo luâk sigan arekņe nâņgâm kotņe siâ siâ dondâ talaņep aregât nâņgâmbo humo akto aregât Yesuņe tâwât dewunge panben dâm magaņep aregât biwiņe umatņe akto gem yân ariep.

Luâk pulirâ sikumdâņe Anutugât kâmolân dewatiwerâm âmâ âi humo membai.

²³ Akto Yesuņe hoņ bawalupņe hin makyenģiep, “Makyenģire nâņgâņet. Luâk pulirâ sikumdâņe Anutugât kâmolân dewatiwerâm amâ âi humo membai.

²⁴ Soņgo pike dâpņânba gawerâm âmâ âi humo membiap. Dop hainâk luâk pulirâ sikumdâņe Anutuņe damunyeņe akbiap ain ariwerâm âi humo membai.” dâep.

²⁵ Hain dâmbo den are nâņgâm sân sân mem hin magi, “Bâe, niņande manman âlepņân ariwiap?” dâyi.

²⁶ Dâmbiâ Yesuņe tâņ tâņâk yekmâ kinmâ hin makyenģiep, “Anutugât manman âlepņân ariwaigât nâņgâ nâņgâyeņe watbiâ bo akmap. Dâ Anutuņe konok âmâ wan me wan miawakbiapgât bo pâpkomap.” dâep.

²⁷ Hain dâmbo Petoroņe maganmâ hin dâep, “Woe, nen âmâ kotņe siâ siâ hârok hepunmâ gâ olop malion aregât hâuņe nen wan membaen?” dâep.

²⁸ Akto Yesuŋe hin makyenŋiep, “Hâmbâi kotŋe siâ siâ ire hârok irakŋe akmâ metewiap. Sop ain âmâ luâk akmâ geân nâ lâuwâŋe gem âmâ luâk kembu yenŋât tat talân tatbian. Akto nâ wat-nekmâ manmai yekâ hainâk tat tat keiân lâuwâ ain tatbai. Tatmâ Israe luâk âmbâle kâmot keiân lâuwâ are mem potat yekbai.

²⁹ Akto luâk âmbâle nânŋât nânŋâm emetyeŋe me emi teulupyenŋe me meme ewelupyenŋe me nanan me âi kalam me wan me wan nânŋât akmâ hepun-mai amâ hâmbâi aregât hâuŋe kotŋe siâ siâ dondâ membai. Hain akmâ manman kârikŋân manmâ âgâwai.

³⁰ Aregât siâkâ makbe. Luâk âmbâle bikŋe hinŋe hâkyeŋe mem agatbai are âmâ hâmbâi Anutuŋe hamiŋâŋen katyekbiap. Dâ bikŋe âmâ hinŋe hâkyeŋe mem gewai are âmâ Anutuŋe hâmbâi tânyenŋumbo ulik gulik akbai.” dâep.

20

Waiŋ âi meyi yenŋât den ginŋe.

¹ Akto Yesuŋe hin dâm makyenŋiep, “Anutuŋe damunyenŋe akbiap amâ luâk siâgât hân humo yeaŋmap dop hainare akto hândâktâk dondâ agatmâ âiâŋen âi meanŋetgât âi luâk bikŋe meyekberâm ariep.

² Akto âi luâk bikŋe olop den akmâ hilâm konokgât hâu dâtâŋe aregât puliŋe membaigât makyenŋimbo âlepŋe dâmbiâ hunŋun yenŋimbo âi memberâm ariyi.

³ Arimbiâ âmâ 9 kilok wan hainare kepien arim luâk bikŋe yekto kepia tete yân tali.

⁴ Yân taligât luâk arekne makyengim hin dêep, “Ye arim nângât wain âiângen âi membiâ aregât puline âi aregât dopnânâk yengiwerân.” dêep.

⁵ Hain dâmbo arimbiâ benne 12 kilok akto 3 kilok ain âkâ hainâk agep.

⁶ Hain akmâ âmâ engaine 5 kilok wan hainare arim yekto luâk bikne yân tatmâ manbiâ yekmâ hin makyengiep, “Ye gain gain akmâ hilâm humo ire yân tatmâ mandâi?” dâmbo

⁷ yâkne hin maganji, “Luâk siâ me siâne âi siâ bo nengimbo aregât yân tatmâ manden.” dâmbiâ yâkne hin makyengiep, “Ye arim nângât wain âiângen âi menjet.” dêep.

⁸ Akto emet dâgâmbo âmâ luâk arekne âi luâklupne yengât damun are maganmâ hin dêep, “Âi luâk yengonmenâ togombiâ hilâm konokgât hâu dâtâne yengi. Akto âi luâk hami togoâi are yengâlânba keine katmâ yengim maleine âi luâk ulik gulik togoâi are âmâ bâine yengiwen.” dêep.

⁹ Hain dâmbo âi luâk 5 kilok âi meyi are âmâ hilâm konokgât hâu dâtâne konok yengiep.

¹⁰ Akto luâk ulik gulik togom âi keine katmâ meyi are togom, “Nenne âmâ hilâm konokgât puli aregât kakjân memberen.” dâm nângâyi. Dâ ina yâkâ hainâk hilâm konokgât hâu dâtâne yengiep.

¹¹ Yengimbo mem kalam amboe aregât dondâ nângâm bâlianji.

¹² Hain akmâ maganmâ hin dâyi, “Luâk ire âmâ hinneâk togom âi getegâk mendâi ina gâne hilâm konokgât yengiât. Akto nenne âmâ dewutâ kârikjân âi humo menden akto dewutâne dondâ nenektâp ina hainâk nengiât are ârândân bo

aktâp.” dâyi.

¹³ Hain dâmbiâ yâkne luâk hutyenân kilep siâ maganmâ hin dâep, “Gala, nâ bâleŋe bo akginđân. Nâŋe hilâm konokgât hâu dâtâŋe memberât dâm makginđere gâŋe âlepŋe dâm nâŋgâmenâ ârândân aktâp aregât

¹⁴ gâ pulige are meakmâ ari. Puli ya ginđân hainâk luâk hami dondâ togom âi getek mendâi are nunaet ukennaet akmâ yengian.

¹⁵ Nâŋe nune puli ire mem siâ me siâ akbiangât amâ nunaet pat. Gâŋe damunne akmat me? Nâŋe agak meme âlepŋe akginđere aregât gâŋe wangât nâŋgâm bâli ninđât? Nâŋgâm bâli ninmenâ ârândân bo aktâp.”

¹⁶ Luâk âmbâle bikŋande hinŋe hâkyeŋe mem agatbai are amâ hâmbâi Anutuŋe haminâŋen katyekbiap. Dâ bikŋe hâkyeŋe mem gewai are âmâ Anutuŋe hâmbâi mem ulik gulik katyekbiap.” dâep.

Yesuŋe mom agatbiapgât sop âlâwu makyengiep.

¹⁷ Yesuŋe Yerusalem kepia âgâwerâm akmâ hon bawalupŋe keiân lâuwâ are meyekto ariyi. Arim manmâ Yesuŋe dâwân makyengim hin dâep,

¹⁸ “Ye nâŋgâŋet. Bâin. Nen Yerusalem kepiân âgâne. Akto ain sumbe kat kat luâk akto Mosegât den kârikŋe makmâ kepikmai ain tatmai yâk yengâlân gâtŋande luâk akmâ geân nâ bâleŋe akniŋmâ sumbe kat kat luâk akto Mosegât den kârikŋe makmai yâk yengâlân makyengimbiâ menekbai. Akto den âiân katnekmâ nugumbiâ mombian aregât den maganŋi goanŋi akbai.

19 Akto den hembalik mângi nekmâ lâwinân nugumbiâ mombiangât Roma luâk are yengâlân oloŋ nekbîâ bâlene mângi nekmâ lâwinân nugumbiâ mombian. Mondere han nugumbiâ hilâm âlâwu akto momonânba agatbian.” dâep.

Yakobo akto Yohane yâkŋe galalupyetŋe damunyeŋe akbiandatgât aikoyiat.

20 Akto sop ain Yebedaioġât âmbenŋande nanlogâtŋe Yakobo akto Yohane are kewugu yelekmâ Yesugâlân togom kâŋgom ulilaŋep.

21 Ulilaŋdo hin maganep, “Gâ wangât nâŋgât?” dâmbô hin dâep, “Sop siân gâŋe togom luâk âmbâle hârok damunyeŋe akbialân sop ain nanlogâtŋande gasomge bikŋe bikŋe tatmâ kembu akbiandat.” dâep.

22 Hain dâm ulilaŋdo Yakobo akto Yohane hin dâm makyetkiep, “Yet areġât keiŋe pâpkom mak-tat. Nâ wan me wan umatŋe miawak niŋbiap are hârok yet âlepŋe miawakyetkiwiap me?” dâep. Hain dâmbô hin dâyat, “Maktât are miawak netki-wiap areġât nâŋgâetŋe ârândânġ akbiap.” dâyat.

23 Hain dâmbela hin dâep, “Wan me wan umatŋe miawak niŋbiap arekŋe âlepŋe hainâġâk miawak yetkiwiap. Dâ Anutu Ewene yâkŋe konok nâŋgât amuknân manmâ damunyeŋe akbai areġât emelâk kotyeŋe dâm hârieŋ. Amâ nâŋgât âi bo.” dâep.

24 Hain dâm makyetkimbo hoŋ bawane bât bip bip hârok yâkŋe den are nâŋgâmbiâ umatŋe akto Yohane akto Yakobo peiyelegi.

25 Peiyelekbiâ Yesuŋe yeŋgondo bambiâ hin dâm makyenŋiep, “Hângât luâk kembuŋe luâk damunyeŋe akmâ âmâ hoŋ bawalupyenŋe meyekbiâ manmai are âmâ nâŋgâmai.

26 Dâ yeŋe âmâ hângât luâk kembu are yeŋgât agak meme are hain bo akbei. Yeŋgâlânba siâŋe Anutuŋe nekto ârândân agâk dâwiap âmâ benŋe galalupŋe yâk yeŋgât hoŋ bawa akmâ manbiâp.

27 Akto yeŋgâlânba siâŋe Anutuŋe nekmâ, “Woe, damunyeŋe akbiapgât dop tatâp dâwiap.” dâm aregât galalupŋe yeŋgât âi luâk manbiâp.

28 Nâ hainâk hoŋ bawalupnande tân nugunet dâm aregât bo geân. Âi humo mem hâk hilâlâm nâŋgâm luâk âmbâle dondâ are yeŋgât dosa bo akyenŋiwapgât mombian aregât luâk akmâ geân.” dâep.

Yesuŋe dewunyetŋe bokbokŋe lâuwâ mem heŋgemyetkuep.

29 Yesu akto hoŋ bawalupŋe Yeriko kepia hepunmâ ariyi. Arimbiâ hami yeŋân luâk âmbâle dondâ ariyi.

30 Akto dâp ginŋân luâk dewunyetŋe bok bokŋe lâuwâ taliat. Yesu togoep aregât den nâŋgâm kârikŋeâk konmâ hin dâyi, “Humo, gâ Dawidigât hakuŋe gâ hanâk netgât okotge nâŋgâ.”

31 Hain dâm konbela luâk âmbâle ain kili arekŋe nâŋgâm hin dâyi, “Woe, den hepulet.” dâyi. Hain dâmbiâ denyenŋe bo nâŋgâm âmâ lâuwâŋe koliat, “Humo, gâ Dawidigât hakuŋe gâ hanâk netgât okotge nâŋgâ.”

³² konbela nângâm dâwân kinmâ yetkondo gut-bela hin aiyetkuep, “Gain gain akyetkiwegât nângat?” dâmbô hin dâyat,

³³ “Humo âlepne eget dâmenâ dewunnetne hulajâkgât ulit giñdet.” dâyat.

³⁴ Hain dâmbela okotne nângâm dewunyetne howaimbo hulan akto Yesu olop ariyi.

21

Yesune dongi kakjân Yerusalem âgâep.

¹ Akto arewa arim Yerusalem kepia ewumâk Betepage kepia akto gimbâne kotne Ôliwa ain togoi. Togo Yesune hon bawalogâtne lâuwâ hungun yetkiep.

² Hungun yetkim hin makyetkiep, “Yet kepia bâlensiâ tato ektat âuren âgâet. Âgâm âmâ dongi siâ hikombiâ kindâp nanne olowâk are dowâk mem miawak yelet. Meyelekmâ mem âmâ nângâlân togoet.

³ Dâ luâk siâ me siâne den wan siâ makyetkimbo âmâ hin maganberat, “Iregât âi miawakto Humonetnande maknetkiâp gârâmâ mem arietne âi bo akto âmâ dowâk mem purik katberâp.” dâm maganberat.” dâep.

⁴ Wan me wan ya miawagep are amâ Propete siâne den kulengoep aregât bikne bunne miawagep den are hin tatâp,

⁵ “Sion gimbâne ambolupne nângânet. Yengât kembuyene amâ hâkne mem gemap. Hain akmâ yonâk ariwerâm âmâ dongigât kakjân tatmâ togowiap. Dongi aregât nanne are olop togowiap.”

⁶ Yesuñe hain dâm hunḡunyetkimbo arim hain agiat.

⁷ Dongi akto nanñe lâuwâ mem oloñyelekmâ togombela sânḡum kakñân luguakmini are oloñmâ dongi kakñân katbiâ yâkñe âgâ talep.

⁸ Âgâ tato luâk âmbâle dondâne Humonenñe togoâp aregât dâp hêngemgone dâm sânḡum kakñân luguakmini are oloñmâ dâwân lengaim ariyi. Dâ bikñande âmâ esenñe siâ siâ ligim dâwân katmâ ariyi.

⁹ Akto luâk âmbâle dondâ enemñân akto hamiñân olop ariyi arekñe âmâ hin koli, “Woe, hakunenñe Dawidi yâkgât kâmolân gâtñe gâñe damun nenñe ak. Anutu Humoñe wâtñe giñmâ hunḡun giñdo togoât aregât heronñe akgiñne. Akto kembunenñe yu togoât iregât Anutu himbimân manmap yâk nânḡanñenñe kotñe humo agâk.” dâyi.

¹⁰ Akto Yesuñe Yerusalem kepiân âgâmbo kepia humo ain luâk âmbâle tali arekñe sân sân mem hin dâyi, “Luâk ire niñe?” dâyi.

¹¹ Hain dâmbiâ luâk âmbâle yâk olop ariyi arekñe makyenḡiyi, “Imâ Anutugât Propete siâ kotñe Yesu, Galilaia hân aregât kepia Nasarete ain gâtñe.” dâyi.

Yesuñe sumbe opmânânba watyegep.

¹² Hain dâmbiâ Yesu Yerusalem kepiân âgâm sumbe kat kat opmânñân âgâm luâk âmbâleñe siâ me siâ katmâ anḡim kili are wat yekmâ siâ me siâ yeñe me kembâ welamñe me puli tat tat welamñe mem kâwulep.

¹³ Kâwutmâ watyekmâ hin makyenḡiep, “Anutuñe makto kulemgoyi bikñe hin tatâp,

“Nângât emet âmâ luâk âmbâle hârokņe ulitņinbaigât emet kindâp.” Den kulem hainâk yendâp are hâkâņ akmâ mângimbiâ luâk kâmburâ yengât emet hainare aktâp.” dâep.

¹⁴ Hain dâm sumbe kat kat opmânņân luâk dewunyeņe bok bokņe akto keiyeņe pâwutyene bâlêne are togombiâ mem hengem yenguep.

¹⁵ Akto nananĵ lepat ain âgâm Yesugât hin dâyi, “Dawidigât hakuņe kotņe mem agatne.” dâyi. Hain dâmbiâ sumbe kat kat luâk akto Mosegât den kârikņe makmâ kepigi arekņe Yesuņe kulem keiņe keiņe miep are ekmâ akto nananĵ lepat are yengât den nâņgâmbiâ bâlimbo kuk bâlêne agi.

¹⁶ Hain akmâ Yesu hin maganĵi, “Nananĵ lepat irekņe kotge konmâ mem agatbiâ nâņgât mon?” dâm maganĵi. Hain dâmbiâ hin makyengiep, “O nâņgân gârâmâ aregât Anutuņe makto kulemgoyi bikņe aregât hin tatâp, “Anutuņe nananĵ lepat memene akyengimbo kotņe mem agatbai.” den are oyaņmâ nâņgâm meteyi mon?” dâep.

¹⁷ Akto ainba hepun yekmâ kepia humo are ginnângen gem hândâk ain Betania kepiان yiep.

Yesuņe makto lâwin siâ ululun dâep.

¹⁸ Yem kindo hauņdo hândâktâk purik katmâ kepia humoân âgâm sotgât mopņe aguep.

¹⁹ Akto dâwân lowot hainare siâ kindo ekmâ bunņe yendâp dâm keiņân baep. Bam ekto bunņe siâ bo yendo esenņandeâk kilep. Akto lowot are maganmâ hin dâep, “Lâwin iregât koaņe siâkâ bo yembiâp. Boâk tiņ.” dâmbo ainâk lowot arekņe ululun kârâep.

20 Hain akto hon bawalupnande are ekmâ ot-neye arimbo sân sân mem hin dâyi, “Gain gain akmâ lowot ire dowâk ululun kârâp?” dâyi.

21 Hain dâmbiâ Yesuŋe makyenŋim hin dâep, “Nâ iregât keiŋe makyenŋire nânŋânet. Ye nânŋâlân biwiyenŋe katmâ henŋemgom han lâuwâ âlâwu bo akbai âmâ nâŋe lowotgâlân aktere ektâi hainâk âlepŋe akbai. Akto are konok bo akbai. Gimbâŋe ire maganmâ hin dâwai, “Gâ kâwulakmâ haruân umbure ge.” dâmbiâ âlepŋe hain akbiap.

22 Akto yeŋe nânŋâlân biwiyenŋe katmâ henŋemgom kinmâ wan me wan memberâm ulilanbai amâ wan me wan are âlepŋe membai.” dâep.

Yesugât keiŋe nânŋânegât aikoyi.

23 Akto Yesuŋe sumbe kat katgât opmânŋân âgâm luâk âmbâle den pat âlepŋe are makyenŋiep. Akto sumbe kat kat luâk akto Israe yenŋât kembu yâkgâlân togom maganmâ hin dâyi, “Gâ wan me wan akmat are niŋaet lau lokom akmat? Akto niŋande memenŋe akŋiŋdo mema?” dâyi.

24 Hain dâmbiâ Yesuŋe hin makyenŋiep, “Nâkai hainâk wan siâgât ai yenŋuwerân. Gârâmâ yeŋe den hâuŋe makniŋbiâ âmâ benŋe nâkâ wan kârikŋe tatniŋdo âi meman iregât keiŋe makyenŋiwerân.

25 Yohanenŋe tu puli keiŋe kalep are niŋande meme agaŋdo âi are meminep? Anutuŋe me luâk yânŋande?” dâep. Hain dâmbo den are nânŋâm are yenŋeâk maganŋi goanŋi akmâ hin dâyi, “Nenŋe Anutuŋe meme agaŋep dâweren âmâ yâkŋe

hin maknengiwerâp, “Ye wangât yâkgât den bo nângâm hengemgoyi?” dâwerâp.

²⁶ Dâ nenñe are luâk yânñande memenñe agañmini dâweren âmâ luâk âmbâle yu kindâi irekñe Yohane âmâ Propete dâm kuk aknengiwaî aregât gain gain magañberen?” dâyi.

²⁷ Hain dâm kinmâ Yesu hin magañi, “Yohane niñande memenñe agañdo akminep are bo nângâen.” dâyi. Hain dâmbiâ Yesuñe hin makyenñiep, “Nâkai hainâk niñâet laugât kinmâ âi meman aregât bo makyenñiwerân.

Nananj lâuwâ yetgât den ginñe.

²⁸ Aregât den ginñe makyenñiwe. Luâk siâgât nanlogâtñe lâuwâ maliat. Akto teunñe aregâlân arim hin magañep, “Nan, gâ unjak arim wainj âiângen âi me.” dâep.

²⁹ Hain dâmbo nanñe arekñe magañmâ dâep, “Nâ borân.” dâep. Hain dâm tatmâ benñe beirânângen hanñe siâ akto arim âi miep.

³⁰ Akto eweyetñande emiñe aregâlân arim arekâ hainâk magañep. Akto nanñe arekñe magañmâ dâep, “Apo, âlepñe ariwerân.” dâm hianñim bo ariep.

³¹ Gârâmâ nanlogâtñe lâuwâ arekñe niñande âmâ ewenâet den lokoep?” dâmbo dâyi, “Teunñe arekñe.” dâyi. Hain dâmbiâ Yesuñe makyenñim hin dâep, “Aregât den bunñe hin makyenñigire nângâñet. Puli dâtâñe meme luâk akto âmbâle dâp gulip man-mai yâkñe ye ewangiyekmâ Anutugât kâmolân dewatiyi.

³² Amâ yeñe Yohanenñe agak meme âlepñe hekat yenñimbo hâkânñe akmâ denñe bo lokoyi. Dâ

gawamangât puli meme luâk akto âmbâle dâp gulip manmainje âmâ denje nângâm hanyenande nângaŋi. Dâ ye âmâ are ekmâ hanyenje bo purik kato denje bo nângâyi.

Waiŋ damunje bâleŋaet den.

³³ Akto den dopŋe siâkâ makyengire nângâŋet. Luâk siâŋe hân siân tâk kotŋe waiŋ are kâmetmâ metem lope dâgâep. Akto waiŋ tuŋe pipikowaengât dâm kondo ketugum hengemgom damun yeŋaet emet mem âi kalam hârok ketugum metem hoŋ bawalupŋe hin makyengiep, “Kalam ire damunje akmâ sot bunŋe akto mem niŋbai.” dâm hân siângen ariep.

³⁴ Arim manmâ manmâ mando sot bunŋe akto âi luâk siâ sot bunŋe bikŋe meyekŋet dâm huŋgun yeŋgimbo ariyi.

³⁵ Arimbiâ damun luâklupŋe arekŋe hoŋ luâk are kât mem pitim panmâ yeŋgumbiâ bikŋe arimbiâ bikŋe moyi.

³⁶ Hain akto amboŋe arekŋe âi luâk dondâ huŋgun yeŋgimbo arimbiâ a hainâk kalam damunlupŋe arekŋe hoŋ luâk are hainâk yeŋgum watyegi.

³⁷ Amboŋande pat are nângâm hin dâep, “Nune nanne huŋgun aŋdere arimbo yâkgât amukŋân manbai.” dâep.

³⁸ Hain dâm huŋgun aŋdo arimbo âi damunlupŋande nanan are ekmâ maganŋi goanŋi akmâ hin dâyi, “Woe, humonenŋaet nanŋe togoâp. Eweŋe mondo yâkŋe hârok membopgât kondenŋe moâk. Hain aktenŋe bât bâiŋe hârok nengât akbiap.” dâyi.

39 Hain dâm mem oloŋmâ hâkŋângen kombiâ moep.

40 Hain akbiâ âi amboŋe are gain gain akbiap?” dâep.

41 Hain dâmbo hin dâyi, “Âi amboŋe arekŋe to-gom hoŋ bawa are yeŋgumbo mombiâ âmâ benŋe dumyenân hoŋ bawa siânbaŋe sot yendoân ninbai dâm katyekbiap.” dâyi.

42 Hain dâmbiâ Yesuŋe hin dâep, “Anutuŋe makto luâk siâŋe hin kulemgoep,

“Emetŋe ketuguwerân âmâ luâkŋe kât siâ ekmâ hâkŋe hâkŋe dâm panbiâ yendo Anutuŋe kât are mendo emetgât kun kun kârikŋe agep. Are ekmâ, “Imâ Humoŋe mem miawaktâp.” dâm ektenŋe humo aktâp.” Siâŋe ulikŋân hain kulemgoep.

Aregât ye âmâ nananyenânbak oyaŋmâ nâŋgâyi amâ wangât hilipkoyi?

43 Aregât makyenŋire nâŋgâŋet. Anutuŋe damunyene akberâm aktâp yâkŋe yekto ârândân bo akto luâk âmbâle aŋgâ damunyene akbiap are yâk Anutuŋe damunyene akbiap aregât bunŋe membai.

44 Dâ luâk siâŋe kât tetembeŋe kârikŋe are ekto ârândân bo akto âmâ hâkŋe hilipkowiap. Akto kât arekŋe amâ luâk siâ kakŋân ge kom hambumbo hogoakbiap.”

45 Hain dâmbo Parisaio luâk akto sumbe kat kat luâk areyengât humomolupyenande den are nâŋgâm hin dâyi, “Imâ nengât dop maktâp.” dâm nâŋgâmbiâ bâliep.

46 Hain akto aregât Yesu mem kala busi kâlegen katberâm agi. Hain akmâ memberâmbiâ luâk

âmbâle dondâŋe ain kili arekŋe Yesu amâ Propete luâk dâm nâŋgâyi aregât, “Mendenŋe nenguwâi.” dâm hamewakmâ yânâk hepuli.

22

Luâk hâk katip bâlâk yâkgât den ginŋe.

¹ Akto Yesuŋe den ginŋe siâ hin makyenŋieŋ,

² “Anutuŋe damunyaŋe akbiap amâ hângât luâk kembu siâgât agak meme hainare. Luâk kembu aregât nanŋande âmbâle memberâm akto luâk kembu arekŋe sot soŋgo dondâ om hâwuruep.

³ Akto ulikŋân luâk bikŋe nanŋande âmbâle mendoân togombiâ sot om yenŋiwiapgât makyenŋieŋ. Akto nanŋande âmbâle memberâm akto ain âi luâklupŋe bikŋe huŋgun yenŋim, “Ari luâk are kewugu yekmâ togoŋet.” dâep. Akto âi luâklupŋande ari makyenŋimbiâ yâkŋe borâm bo togoyi.

⁴ Akto lâuwâŋe âi luâklupŋe bikŋe huŋgun yenŋim hin makyenŋieŋ, “Ye arim nâŋe ulikŋân luâk makyenŋiân are hin makyenŋiwei. Ye nâŋgâŋet. Sot akto bau akto soŋgo humomo emelâk kom om katân akto kotŋe siâ siâ hârok emelâk mem ârândâŋ ketuguân. Gârâmâ ye togom nannande âmbâle memberâp iregât sot neŋet.” dâm âi luâklupŋe are makyenŋim huŋgun yenŋieŋ.

⁵ Akto âi luâklupŋande arim den are luâk âmbâle makyenŋiyi. Makyenŋimbiâ den a bonâŋgâm han-sumbu akmâ ariyi. Siânbaŋe gem kalam yenŋâŋen ariyi. Dâ bikŋande âmâ puli âi memberâm gem ariyi.

⁶ Dâ bikɲande âmâ luâk kembugât âi luâk are hilip yeɲgumbiâ mom meteyi.

⁷ Hain akbiâ luâk kembu are biwiɲe kâlâp akto tembe lokolupɲe huɲgun yeɲgimbo arim luâk koko yeɲgumbiâ mom meteyi. Mom metembiâ kepi-ayeɲe arekâ ombiâ om bo akyegep.

⁸ Akto luâk kembu arekɲe âi luâklupɲe makyenɲim hin dêep, “Nannande âmbâle mendâp iregât sot sonɲo emelâk mem ârândâɲ ketugure yendâp. Dâ nâɲe luâk togoweigât makyenɲiân are yeɲgât agak memeyenɲe ârândâɲ bo.

⁹ Gârâmâ ye arim dâp kautɲe ârândâɲ kinmâ âmâ luâk âmbâle arim togombiâ yekmâ âmâ makyenɲimbiâ togom sot ire neɲet.” dêep.

¹⁰ Hain dâm huɲgun yeɲgimbo âi luâklupɲe arekɲe dâp kautɲe ârândâɲ kinmâ arimbiâ luâk âmbâle âlepɲe me bâleɲe togombiâ hârok mendugu yegi. Akto luâk âmbâle arekɲe togom luâk âmbâi lâuwâ meagiat are yetgât emet are pikmâ teɲ teɲ dâm tali.

¹¹ Akto luâk kembu arekɲe luâk âmbâle are yekberâm emet are kâlegen bam âgâep. Âgâm luâk siâ hombaɲ tat tatgât sâɲgum are bo lalakmâ togoep.

¹² Togom ekmâ luâk kembu arekɲe maganmâ hin dêep, “Gala, gâ gain gain akmâ luâk âmbâle meak meak aregât sâɲgum bo latmâ in togoât?” dêep. Luâk kembu arekɲe hain dâmbo yâkɲe denɲe nânjâk kinmâ aɲun aɲgiep.

¹³ Aɲun aɲgimbo luâk kembu arekɲe âi luâklupɲe makyenɲim hin dêep, “Ye luâk are mem keiɲe bâɲɲe mem mendugum dâgâm ge hândâkɲângen ain panbiâ yeâk. Yem âmâ hâk hilâlâm dondâɲe

nângâm indem kambonmâ yem âgâwiâp.” dâm makyengiep.

¹⁴ Aregât den ginje purikje hin makbe. Anutuje luâk âmbâle dondâ makmâ yengonmap. Dâ luâk âmbâle konok konok potatmâ yengondo Anutugât kâmolân dewatimai.” dâep.

Yesu puligât aikoyi.

¹⁵ Akto Parisaio luâk arim hin dâyi, “Hianjenje Yesuje den siâ makmâ hilipkombo mene.” dâm magangi goangi agi.

¹⁶ Hain akmâ hon bawalupyene akto Herotegât âi luâklupje hungun yengimbiâ Yesugâlân togom lau tu aganmâ hin dâyi, “Humo, gângât keige nângâen. Gâ hiangi den bo makmat. Bunjeâk makmat. Gâ luâk hârok Anutugât dâp âlepje makmâ makyengimat. Akto luâk yengât nângâ nângâyenjaet bo watmat. Akto luâk âgâ âgâje me gegeje areyengât hamep bâlâk akmâ ârândânâk makmâ hekatnengimat aregât ire makmenâ nângâne.

¹⁷ Nen Roma luâk siâ damun nenje kotje Sisa are gawamangât puli wanmaen are âlepje me bo? Aregât gain nângâmat? Puli wanbaen me bo?” dâyi.

¹⁸ Hain dâmbiâ biwiyenjaet keije ekmâ nângâm hin makyengiep, “Ye hianjindâi. Denje hami kom katjindâi.

¹⁹ Romagât puli koaje siâ mem ninjbiâ ekbe.” dâep. Hain dâmbo mem wanjbiâ mem agatmâ hekat yengim hin dâep,

²⁰ “Puli ire ekjet. Iregât otnenje akto kot ire ninjaet?” dâep.

²¹ Hain dâmbo hin dâyi, “Damun nenje Roma luâk kotje Sisa yâkgât otnenje.” dâyi. Hain dâmbiâ

hin dêep, “Wan me wan Roma luâk humogât dâtânje amâ yâk wanbei. Dâ wan me wan Anutugât dâtânje are amâ Anutu wanbei.” dêep.

²² Hain dâmbo nânġâmbiâ humo akto yân hep-unmâ ariyi.

Momonânba agatbaengât aikoyi.

²³ Akto hilâm ainâk Sadukaio luâk are togoyi. Luâk arekņe momonânba luâk bo agatbai dâmini. Yâkâ hainâk togom lau tu agaņmâ hin dâyi,

²⁴ “Tiksa, Moseņe ulikņân hin dâm kulemgœp, “Luâk siânje âmbâle mendo nanan bo miawakto mondo emiņande kambut mem teuņaet kâmot bo akbopgât membiap.” Moseņe hain kulemgœp aregât hin makgiņe.

²⁵ Emi teu nâmbulân lâuwâ nen hutnenņân mali. Hain manmâ ulikņân teuyenjande âmbâle mem nanan bâlâk manmâ moep.

²⁶ Mondo emiņande kambut are mem hainâk nanan bâlâk manmâ mondo emiņe siânje âmbâle kambut are miep. Hain akmâ mondo emi teu nâmbulân lâuwâ arekņe âmbâle konok are mem nanan bâlâk manmâ mom meteyi.

²⁷ Bâiņe kambutyene are hainâk moep.

²⁸ Akto luâk nâmbulân lâuwâ are hârogâk âmbâle konok areâk mem mom meteyi. Aregât sop bâiņân agatmâ metembiâ âmâ âmbâle are niņaet âmbenņe akbiap?” dâm hianġiyi.

²⁹ Hain dâmbiâ Yesuņe hin makyenġiep, “Ye Anutuņe makto kulemgoyi are akto Anutugât kârikņeņe bonânġâmai are nânġâm hilipkom hain dâm maktâi.

³⁰ Luâk me âmbâle momonânba agatmai yâk himbimân anjelo mandâi hainare akmâ luâk âmbâle meak meak are hepunmâ yân manbai.

³¹ Dâ momonânba agat agatgât keiñe hin maktere nângâñet. Anutugât den aregât keiñe makyengire nângâm hengemgonet.

³² Anutuñe hin magep, “Nâ Abraham akto Isaka akto Yakobo yâk yengât damunyeñe akman.” dêep aregât yâk âmâ momone yâk yengât Anutu bo. Golâ manmanñe yâk yengât Anutu akmap.” dêep.

³³ Hain dâm Sadukaio gâtñe makyengimbo luâk âmbâle yânñe ain kilî arekñe den are nângâmbiâ umatñe agep.

³⁴ Akto Yesuñe den magep are Sadukaio gâtñande nângâm den hâuñe gain gain maganñe dâm pâpkoyi aregât anjun angim hepuli, paraiaione aregât nângâm âmâ Yesugâlân menduguyi.

³⁵ Mendugumbiâ hutyeñân Mosegât den kârikñe makmâ kepigi ain gâtñe konok Yesu hianberâm aikom hin dop koop,

³⁶ “Tiksa, Anutuñe den kârikñe kalep ain gâtñe wan soñ lokowaen.” dâmbo

³⁷ hin dêep, “Anutuñe makto Moseñe kulemgoep are bikñe hin tatâp, “Gâñe Humoge Anutu yâkgâlân biwi kambiamge me nângâ nângâge katmâ manben. Yâkgât âi akto den lau aregâlâk nângâm kârikñe akmâ hange konogâk manben.”

³⁸ Den are soñ lokombiâ huraguwiâp.

³⁹ Akto hamiñân den ire lokombiâ huraguwiâp, “Gâ gugaet agakmat hainâk luâk siâ aganben.”

⁴⁰ Anutugât den kârikñe lâuwâ irekñe amâ den kârikñe are hârokgât keiñe aktâp. Akto Anutugât

Propete luâk den ire nângâm aregât keiŋe kulemgoyi.” dêep.

Yesuŋe ikinjaet keinjaet aiyenŋuep.

⁴¹ Hain dâm Parisaio luâk menduguyi aregât Yesuŋe aiyenŋum hin dêep,

⁴² “Ye Anutuŋe huŋgun aŋdo gewiap aregât gain gain nângâi? Yâk âmâ niŋaet nanŋe nângâi?” dâmbo Parisaio luâk bikŋe arekŋe hin dâyi, “Dawidigât hakuŋe.” dâyi.

⁴³ Hain dâmbiâ hin dêep, “Bâin, Anutugât Heakŋande Dawidigât biwiŋe mem agato hin dêep,

⁴⁴ Anutu Humoŋe nângât Humone hin maganep, “Gâ enemnân togom bâte bungen tatmenâ gasalupge keigaet amukŋân kâmot katere tâliyekbiat.”

⁴⁵ Aregât keiŋe hin. Dawidiŋe Anutuŋe huŋgun aŋdo gewiap are amâ nângât Humone dâm konminep. Aregât gain gain yâk âmâ Dawidigât nanŋe dâmai?” dêep.

⁴⁶ Hain dâmbo luâk ain kili arekŋe Yesuŋe den magep are hâuŋe bo magani. Hain akmâ are hamiŋangen den siâ me siâgât lâuwâŋe bo aikoyi.

23

Yesuŋe Parisaio minao makyenŋiep.

¹ Yesuŋe luâk âmbâle dondâ akto ikinŋe hon bawalupŋe hin makyenŋiep,

² “Luâk Mosegât den kârikŋe makmâ kepikmai akto Parisaio luâk yâk âmâ Mosegât welamŋân tatmai.

³ Aregât den makmâ hekatyengimbiâ nângâm lokowei. Dâ yâkne yâk yengât den bo lokomai aregât agak memeyene bo watbei.

⁴ Yâk yengât agak meme are hin. Luâk âmbâle den kârikne wârakmâ hin makyengimai, “Âi humo mem hâk hilâlâm nângâm manmâ âgânet.” dâm makyengimai âmâ bo tân yengumai. Denâk akmai.

⁵ Akto wan me wan hârok akmai are âmâ luâkne neneknet dâm aregât akmai. Akto neneknet dâm manmâ âmâ mitigât siâ me siâ wan me wan mem manmâ kâlewâk mângim manmai.

⁶ Akto luâk âmbâle mendugum kinmaiân me den opmânân âgâmaiân âmâ yâkne nenne sonj dâm tat tatne egon tatmai.

⁷ Akto yâkne luâk âmbâle kepiân tiksa humonenne dâm nengonjet dâm aregât ukenne nângâmai.

⁸ Dâ ye amâ tiksaye konok akto ye hârok gala konogâk akmai aregât tiksa humonenne dâm nengonjet aregât bo nângâwei.

⁹ Akto Eweyene konok mandâp amâ Anutu himbimân manmap yâk aregât iren hânân gâtne siâgât ewenenne bo dâwei.

¹⁰ Akto humoyene konok mandâp amâ Anutune hungun ninjo geân aregât humonenne dâm nengonjetgât ukenne bo nângâwei.

¹¹ Akto yengâlân gâtne bikne tân yengum âi yengât mem manmap are âmâ Anutune ekto huragumap.

¹² Aregât yengâlân gâtne siâne ikinje kotne mem agato âmâ Anutune mem gewiap. Dâ kotne mem gembo âmâ Anutune mem agatbiap.

13 Gâuk Mosegât den makmâ kepihmai akto Parisaio ye hârok hiangi luâk. Luâk âmbâle himbingât kâmolân ariwerân akbiâ âmâ yeñe dâp gisapko yengimai. Yeñe âmâ ain bo ariwaen dâm âmâ ariwaen dâmai yâk yengât dâp gisapko yengimai.

14 Gâuk Mosegât den makmâ kepihmai akto Parisaio hiangi luâk yeñe mându kambut yengât emet me wan me wan kâmbu memai. Dâ nenekbiâ huraguâk dâm Anutu sop kâlep ulilañmai. Aregât Anutuñe hâuñe umatñe bâleñe akyengiwiap.

15 Gâuk Mosegât den makmâ kepihmai akto Parisaio ye luâk konok yengât pat agâkgât âi humo mem haru akto hân hâtikom arimai. Arim hâwâtyekbiâ dewatyekmâ âmâ benñe hemem kâlâpgât pat akmâ ewangiyekbiap.

16 Gâuk Mosegât den makmâ kepihmai akto Parisaio yeñe luâk âmbâle manman âlepñân kewuguyektenñe ariwai dâmai gârâmâ ye âmâ dewunyeñe bokbokñe. Aregât hin dâmai, “Luâk âmbâle siâñe sumbe aregât metenân dâm makbiâ âmâ yânñe akbiap. Dâ sumbe kat kat opmângât goli aregât metenân dâm makbiâ âmâ âlepñe akbiap.” dâmai.

17 Hain dâmai amâ dewunyeñe nângâ nângâ yeñe hândâk akmap. Anutuñe wan ekto humo akmap? Goli me sumbe emetñe? Sumbe kat katñet emetñande goli are ewangimap. Sumbe emetñe bo tatâp dâine puli are yânñe akbop.

18 Akto ye hin dâmai, “Luâk âmbâle siâñe sumbe kat katgât alata kotñe konmâ den kârikñe makbiâ yânñe akbiap. Dâ yâkñe sumbe om alata kakñân katmai are konmâ den kârikñe makbiâ amâ kârikñe akto areâk membei.” dâmai.

19 Hain dâmaigât âmâ dewunye hândâkne akmap. Wan me wan Anutu wanmai arekne alata bo ewangimap. Alata bo tatâp dâine sumbe yânne akbop.

20 Aregât luâk âmbâle alata aregât kotne konmâ den kârikne makbai arekne alatagât kotne areâk bo konbai. Alata akto sumbe me wan kakjân katmai are olop konmâ makbai.

21 Akto luâk âmbâle sumbe kat kat opmân aregât kotne konmâ den kârikne makbai arekne opmân aregât kotne areâk bo konbai. Opmân akto aregât Amboje Anutu yâkgât kotne konbai.

22 Akto himbim kotne konmâ den kârikne makbai arekne Anutu tat tat akto tat tat Amboje lâuwâ lâuwâ yetkonbai.

23 Gâuk Mosegât den makmâ kepikmai akto Parisaio ye hiangi luâk. Ye metâ akto lombo akto sot siâ siâ are dopjân potatmâ Kembangât pat dâm bikne katmai. Dâ Moseje kulengoep den bikne umatne are hepunbiâ bâlimap. Aregât den amâ hin. Wan me wan âlepne membiâ ârândânâk akto okot nângâ nengim gala akmai akto Humogâlân biwi kat kat aregât agak meme are âkâ hamianmai aregât siân hâuje humo bunewâk yengiwip. Ye Mosegât den owâine akto umatne are lâuwâ lâuwâ lokomai dâine ârândân akbop.

24 Ye, “Nen kewuguyekmaen.” dâm âmâ luâk dewunye bok bokne are yengât dop hainâk akmai. Wan me wan bâlensiâ aregâlâk nângâmai. Dâ wan me wan umatne Anutune egâlianmap are amâ yânne dâm hepunmai.

25 Gâuk Mosegât den makmâ kepikmai akto

Parisaio ye hiangi luâk. Ye hâk akto hângât aregâlâk nângâmai. Âmbâle siâne kondo akto umbâ hâkneâk pulim kâlegen bo pulim akmap aregât dop hainâk yâk hâkyeñe âlepñe akmai. Dâ biwiyenân âmâ kâmbugât akto hâkgâlâk egâlian aregâlâk nângâmai.

²⁶ Woe, Parisaio luâk, ye âmâ dewunyeñe bok-bokñe hainare akmai. Kâlegen biwiyenñe son hengemgombiâ âmâ huraguwiap benñe hâkyeñe gai hainâk salek salek akbiap.

²⁷ Gâuk Mosegât den makmâ kepikmai akto Parisaio ye hiangi luâk. Lâmân luâk âmbâle han yenğumai are buluñe me wan me wan âlepñe agâk dâm kâmetmai. Dâ kâlegen âmâ hagitñe akto hâkñe hambuñe are yemap aregât dop hainâk

²⁸ luâk âmbâle bikñande hâkyeñe yekbiâ ârândân akmap. Dâ biwiyenân âmâ den hianğim agak meme bâleñe akto Anutugât den kârikñe hamianmâ nângâmai.

²⁹ Gâuk Mosegât den makmâ kepikmai akto Parisaio ye hiangi luâk. Ye hin nângâm hilipkomai. Hokboâk hokboâk propete luâk akto luâk agak meme âlepñe akmâ manmini are yenğât sum are buluñande hâk meanmâ kotyeñe lauyenñande mem agatmai. Are nângâre bâliâp.

³⁰ Buluñande meanmâ hin dâmai, “Woe, nen ulikñân bâgilupnenñe mali dop hainâk malion dâine yâk tân yenğuenñe Propete luâk bo yenğuwâen.” dâm lauyenñande makmai.

³¹ Hain akmâ keiyenñe mem miawakmai. Ulikñân akmini areyenğât dop ye hainâk akmai. Aregât ye ain manmini dâine Propete luâk are

yengumbiâ mombâi.

³² Akto humomolupyenê dosa kaknân manmâ gayi, ye gai hainâk dosa kaknân manbiâ dosayenê pikmâ yembiap.

³³ Ye niambigât kâmot, ye Anutuñe dosa yenjaet hâuñe yengimboân âmâ gain gain akmâ âlepñân ariwai?

³⁴ Aregât hon bawalupne propete luâk akto nângâ nângâ luâk akto den makmâ kepikmai luâk are hungun yengire yengâlân togom makyengimbiâ bikñe yengum siâ siâ ketugu yekbiâ bikñe mombai. Dâ bikñe amâ lâwinân yengumbiâ mombai. Dâ bikñe amâ yenê den opmânân bugânê yengumbiâ hâk hilâlâm akbai. Hain akmâ bikñe kepia siânba watyekbiâ kepia siân ariwai.

³⁵ Aregât ulikñân Anutuñe keñe katmâ luâk âmbâle ketuguyekto mali sop ain Anutugât hon bawalupne hilip yengum gayi are yengât nângâmbiâ âlepñe akmap aregât yenê hainâk akmâ dosa hainâk membai. Akto hakulupnennande bugânê Abe kom ainba keñe katmâ yengum gam gam bâñe Berekia nanñe Sakaria sumbe emetjaet hângi akto alatagât keñe aregât hutñân gam ariwerâm akto ain kombiâ moep. Akto hakulupnennande Anutugât Propete hârok yengumbiâ moyi.

³⁶ Aregât hin makyengire nângâñet. Yu mandâi irekñe Anutugât luâk âi membîâ ârândân agep are hilipyengumbiâ moyi aregât hâuñe amâ yengâlân miawakbiap.

Yesunê Yerusalem ambolupñe yengât okotñe nângâñep.

³⁷ Bâe, Yerusalem kepia ambolupne areyengât keiyene hin. Yâkne Anutune honlupne akto propetelupne hungun yengimbo yengâlân togombiâ kâtne mem panbiâ yengumbo momai. Puine nananlupne damunye akmâ mem mendugu yekmâ korat yengumap aregât dop hainâk mendugu yekmâ okotnân katyekmâ damunye akberâre hâkâne akmâ arimai.

³⁸ Aregât Anutune damunye bo akmap kepi-aye hepundo bugâ miawak yengiwiap.

³⁹ Aregât nâ bo nekmâ âgâmbiâ hilâm siân miawaktere nekmâ hin dâm makniñbai, “Wei, Gâne Anutugât laugât togonengiât aregât âlepne akgiñne.” hain dâwai.” Yesune hain dâep.

24

Yesune lâuwâne togowiapgât magep.

¹ Yesune sumbe kat kat emetjânba sopando luâklupne emet are ekbiâ humo akto hin dâyi, “Humo, sumbe kat kat emetne ire ek.” dâmbiâ

² hin makyengiep, “Emet humo ire ektâi are hâmbâi gasalupyenande kârikne akmâ kât me wan me wan ire gagaim itij gulam mem patakowai.” dâep.

³ Hain dâm makyengimbo gimbâne kotne Oliwa ain âgâyi. Ain tatmâ luâklupne yâkneak yonâk Yesu hin aikoyi, “Gâ maknengiât are amuten miawakbiap? Akto sop humo miawakbiap akto gâne purik katmâ lâuwâne in manmenâ hân hârok bo akbiap aregât dâp gain gain nângâwaen?” dâyi.

⁴⁻⁵ Hain dâmbiâ hin makyengiep, “Luâk dondâ miawakmâ nângât kolân hâk tunangim hin dâwai,

“Nâmâ Anutuŋe huŋgun niŋdo geân.” hain dâmbiâ luâk âmbâle dondâŋe han gulip akbai. Gârâmâ ye han gulip akbâigât den yu maktân ire nâŋgâm biwiyenŋe damunŋe kârikŋe aganŋim manbei.

⁶ Akto bugâgât warapŋe me bugâgât denŋe nâŋgâm ainâk hin nâŋgâwei, “Anutuŋe are miawakbiapgât nâŋgâmbo miawaktâp.” dâm aregât bo hamep akbei. Dâ sop bâiŋe âmâ irawot miawakbiap.

⁷ Bugâ akto kuk me wan me wan umatŋe are miawakbiap dâm Anutuŋe den makmâ kalep. Are miawakto hân bikŋande gasa aganŋim ariwai. Akto mop humo miawakbiap. Akto wâriŋ humo mem wan me wan hârok mendo duwuŋ humo akbiap.

⁸ Hinŋe maktere nâŋgâi are amâ umatŋe. Aregât keiŋeâk miawakto hamiŋân umatŋe dondâ miawakbiap.

Tembe bugâ miawakbiapgât magep.

⁹ Yenŋât gasalupyenŋe den âiân katyekmâ den opmânŋân bugâŋe yenŋuwai. Akto yenŋâlân gâtŋe bikŋande mombai. Dâ bikŋe âmâ nâŋgât den lokowai aregât hân hârok aregât ambolupŋande kuk bâleŋe akyenŋiwai.

¹⁰ Aregât, “Nen Yesugâlân gâtŋe.” dâmai are yenŋâlân gâtŋe dondâŋe hepun nekmâ ikiyeâk ikiyeâk akmâ gasa aganŋiwai. Akto yenŋâlân gâtŋe bikŋande bikŋe kewugu yekmâ kiapgâlân arim makyenŋimbiâ yenŋuwai.

¹¹ Akto sop ain luâk dondâ agatmâ, “Nen Anutugât Propetelupŋe.” dâm heyenŋimbiâ luâk âmbâle dondâ han undup akbai.

¹² Akto agak meme bâleŋe are miawakmâ humo akbiap aregât luâk âmbâle dondâŋe nâŋgât akto galagât okot nâŋgâ nâŋgâ aregât agak meme are âmâ hepunbai.

¹³ Dâ bikŋande âmâ kârikŋe akmâ tatmâ âgâmbiâ sop humoân âmâ Anutuŋe meyekbiap.

¹⁴ Akto Anutuŋe damuŋeŋe akbiap aregât den pat are luâk âmbâle hânŋe hânŋe hârok nâŋgâmbiâ Anutugât keiŋe humo agâk dâm hân hârok manmâ makyenŋim manbai. Hain akbiâ hamiŋân sop humo miawakbiap.

Siâ me siâ hâkŋe hâkŋe dondâ miawagep.

¹⁵ Aregât propete Daniel arekŋe kulemgœp are yaiwâk oyaŋmâ nâŋgâm heŋgemgœwei. Den are kârigembo siâ me siâ bâleŋe hilip agu aguŋe olowâk âgâm kinmâ sumbe kat katŋân ain bo kin kinŋân kinbiap amâ ye nâŋgâm heŋgemgœwei.

¹⁶ Hain akmâ nenguwâi dâm Yudaia hânângenba pârigim gimbâŋe siân âgâwai.

¹⁷ Akto kepia ewumâk manbiap arekŋe emetŋe kâlegen purik katmâ âgâ ito sikumŋe bo membiap.

¹⁸ Akto âiângenba manbiapŋe kepian âgâm sâŋgum dâgâmŋe bo membiap.

¹⁹ Akto sop ain âmbâi tepdâŋe me namân gâtŋe olowâkŋe âmâ gain gain akbai? Umatŋe olowâk akbai sop ain âmâ umatŋe humo dondâ miawakbiap.

²⁰⁻²¹ Amâ Anutuŋe luâk mem miawak yegewânbak hainâk bo miawagep. Akto hân himbim liunyelegewânbak umatŋe hainâk bo miawagep. Akto hamiŋân umatŋe hainâk bo miawakbiap aregât Anutu hin ulilanbei,

“Humonenne umatne are tânâk kâlegen me âi bo meme sopnân bo miawak nengiwiap.” dâwei.

²² Aregât Kembuņe sop are bo dâm hârembo dâine luâk me âmbâle siâ me siâ bo manmâ kârikņe manbop. Dâ Anutuņe ikinę kâmotlupņe yâk yengât akmâ âmâ sop aregât makto tâlâwâk akbiap.

Miti luâk hiangi miawakbai.

²³ Akto Anutuņe hunğunaņdo iregen miawaktâp akto Anutuņe hunğunaņdo indâgen miawaktâp den hain makmâ bam gamâk akbiâ bo nângâyengıwei.

²⁴ Amâ hingât. Sop ain hiangi luâk akto Propete yânne togom nângât kâmot potatmâ kepilâyegân are han biwiyenę mem gâlikowaigât kulem siâ siâ akto tirip keiņe keiņe mem âi humo membai. Gârâmâ hanyenę mem gâlikowaigât dâp bo tatâp aregât ewum hâumgowai.

²⁵ Akto ye gulip akbâi dâm irawotņân yu makyengıân.

²⁶ Akto ain hiangi luâkņe hin makyengıwai, “Wei, Anutuņe hunğunaņdo gewiap dâmai âmâ hân kamitņângen ain miawaktâp.” dâmbiâ yâk yengât den bo nângâm ekberâm ariwei. Akto hiangi luâkņe hin makyengıwai, “Woe, hoņ bawa arekņe purik katmâ gem emet kâlegen miawaktâp.” dâmbiâ arekâ hainâk bo nângâwei.

²⁷ Aregât lâuwâņe makbe. Himbim belek akmâ dowâk sop konok miawakmap dop are hainâk luâk akmâ geân nâ hân siângen miawakbianân âmâ hân hârok mem belekņe memap dop hainâk nâņe hânân gem miawakbian.

²⁸ Siâ siâ mom yembiâ liplipņe nemberâm mendugumai.

Luâk akmâ gewiap aregât keiņe.

²⁹ Akto areâk bo. Umatņe humo are bo akto sop ain âmâ dewutâ lâuwâ lâuwâk pagalenje bo akbian-dat. Akto diâ himbimânba bererek kârâm hânân gewai. Akto wan me wan himbimân yendâp are hârok duwuņ akbai.

³⁰ Akto sop ain luâk akmâ geân nâņgât kulem are himbimân miawakbiap, aregât luâk âmbâle hânņe hânņe manmai are hârok indem tâgâiak akbai. Ainâk nâ hamandat kakņân tatmâ pagalenje humo olop agat agatne akmâ gere ekbai.

³¹ Gârâmâ lâmun kârikņe kondere munņe humo miawakto aņelolupne mendugumbiâ huņgun yeņgire nâņgât kâmot nune dâtâņe dâman are hân hârok ainba mem kewuguyekmâ ariwai.

Sop humogât den.

³² Akto den ginņe siâkâ makbe. Ye lâwin kotņe solom are esenņe bererek dâmbo hin dâmai, “Wei, emelâk sot kâmetberengât sopņe aktâp.” dâmai.

³³ Aregât dop hainâk hâmbâi wan me wan maktân are hârok miawakto ye hin nâņgâwai, “Emelâk togowiapgât sop ewumâk aktâp.” dâwai.

³⁴ Luâk âmbâle yu mandâi arekņe ire hârok miawakto ekbai.

³⁵ Aregât hin makbe. Wan me wan yu maktân ire âmâ bunewâk miawakbiap. Hân akto himbim âmâ bo akbiandat. Dâ nâņgât den âmâ bo boakbiap. Amâ yem âgâwiap.

³⁶ Akto sop aregât hin makbe. Luâk me âmbâle aregât sop bo nâņgâmai. Dâ aņelo himbimân manmai arekņe âkâ bo nâņgâmai. Akto nâkâ hainâk

bo nângân. Dâ Ewene konokņe aregât sopņe nângâmap.

³⁷⁻³⁹ Amâ hin akbiap. Ulikņân Noa malep ain ugurup miawagewân sop ain luâk âmbâle hanâk hanâk manmâ, “Nen âlepņe manbaen.” dâm sot tu nem luâk âmbâle meagi. Hain akmâ manmâ âgâmbiâ Noaņe wanġa kâlegen âgâep. Âgâambo âlepņe manden dâmbiâ umatņe miawak yeņgiep. Are bo nângâm hanâk hanâk manbiâ tânâk humo momoņe gembo ugurupņe humo togom luâk âmbâle hârok mem kawut yekto mom meteyi. Aregât dop hainâk siân âmâ luâk âmbâle aregât sop bonângâmbiâ luâk akmâ geân nâ gere umatņe humo miawak yeņgiwiap.

⁴⁰ Sop ain âmâ luâk lâuwâ âiângen manbela ainâk Anutuņe luâk konok mem konok âmâ hepunbiap.

⁴¹ Akto sop ain âmbâle lâuwâ âi membela ainâk Anutuņe âmbâle konok mem konok hepunbiap.

⁴² Akto Humoyeņe nâ togowiangât sop bo nângâmai aregât ye damun kârikņe akmâ manbei.

⁴³ Aregât den ginņe siâ makbe. Kepia ambonande gasa hândâgân togowiap aregât sop nângâm âmâ ain biwi golâk tatmâ emet kepiane damungombo âmâ bo bâlianbiap.

⁴⁴ Dop hainâk luâk akmâ geân nâ lâuwâņe gewian aregât sopņe bo nângâmai aregât yeâmâ biwi pâlmâņe akmâ bo nângâ ninbâigât nângâmâk biwi golâk damun nugum manbei.

Biwi asinġ bâlâk manbaen.

⁴⁵ Aregât den ginņe siâkâ maktere nângâņet. Luâk kotdâ siâņe hoņ bawalupņe yeņġât damun siâ katmâ hin dâm maganbiap, “Arim mandere

gâñe damunyeñe akmâ sopñânâk sot me sonjo are dop yenñânâk yengim manben.”

⁴⁶ Hain dâm hepun yekmâ arimbo damunyeñe arekñe âi aregât biwiñande mem hengemgom humonñande purik katmâ togom ekmâ okot âlep nâñgâ añbiap.

⁴⁷ Hain akbiap aregât hângât sikum siâ siâ are hârok damungoâk dâm magañbiap.

⁴⁸ Dâ humoyenñande damunyeñe akmâ manben dâm arimbo âmâ damunyenñande biwiñande hin nâñgâwiap, “Kotdânande hepun nekmâ arim sop kâlep mandâp imâ dowâk bo togowiap.”

⁴⁹ Hain nâñgâm âmâ luâklupñe are bugâ yengum âmâ tu kêrikñe nem biwi gulip akmai yâk olop hain akmâ manbiap.

⁵⁰ Hain akmâ hilipkom biwi pâlâmñe akmâ mando humonñande ainâk togowiap. Are bo nâñgâm mando humonñande dowâk sân sânâk togom

⁵¹ ekmâ yengum bâleñe akyengiep aregât mem kom gâimbo itik matik akto hiangi luâk âmbâle yâk olowâk hemem kâlâpgât pat akbai. Akmâ indem kamboñmâ hâk hilâlâm nâñgâwai.” dâep.

25

Âmbâle bât biken hârok yengât den ginñe.

¹ Akto Yesuñe den ginñe siâ hin magep, “Sop humoân Anutuñe damunyeñe akbiap amâ âmbâi kâmñe bât bip bip hârok yâkñe agi dop hain akbai. Amâ luâk siâñe âmbâle siâ miep arekñe yâk yengâlân togowerâm agep.

2-4 Akto âmbâle momerâk âmâ biwi golâk damun aganġim manmini aregât manmâ pagaleŋe akto pagaleŋe tuŋe kâlegen kâim âmâ tu bikŋe hâpuŋân kâimbiâ gembo mem ariyi. Akto âmbâle bikŋe momerâk are âmâ hanâk hanâk manmini aregât pagaleŋe akto pagaleŋe tuŋe kâlegen mem âmâ tu hâpuŋân bo kâimbiâ gembo mem ariyi.

5 Hain manmâ tatbiâ luâk âmbâle miep arekŋe titnan togombo etemŋe tatmâ asin yem mali.

6 Hain akbiâ hândâk timoŋân luâk siâŋe hin dêep, “Luâk âmbâle mendâp ina togoâp gârâmâ ari dâwân peniaŋmâ kewugumbiâ togoŋet.” dêep.

7 Akto âmbâi kâmŋe arekŋe agatmâ pagaleneyenŋe are membiâ ululunŋe humo oep.

8 Hain akto âmbâle hanâk hanâk manmai arekŋe âmbâle nânġâ nânġâyenŋe âlepŋe are hin makyenġiyi, “Pagalenenenŋe bokberâm aktâp gârâmâ yenŋe tu siâ potatmâ kâim nenginŋet.” dâyi.

9 Hain dâmbiâ âmbâle nânġâ nânġâyenŋe âlepŋe arekŋe hin makyenġiyi, “Bo. Tu irekŋe nengât dop bo. Gârâmâ bo akbopgât ye arim anġim nene emetnânġen arim yenŋeak puligoŋet.” dâyi.

10 Hain dâmbiâ yâk tu are puligowerâm anġim nene emetnânġen arim manbiâ luâk âmbâle miep are togoep. Akto âmbâle wan me wan mem dunġân ketugum tali yâk luâk are olop sot soŋgo nemberâm emet kâlegen âġâm hânġi gisapkom tali.

11 Akto âmbâle bikŋe are hami togom hin magi, “Humonenŋe ġâ hânġi mem katnengi.” dâyi.

12 Hain dâmbiâ luâk arekŋe hin makyenġiep, “Nâ ye bo nânġâyenġiân.” dêep.

13 Aregât keiŋe hin. Nâ sop humoân togowian

aregât bo nângâi aregât biwiyeŋaet damun kârikŋe akmâ manbei.

Luâk puli geârâk yeŋgât den.

¹⁴ Akto aregât den ginŋe siâkâ makbe. Luâk siâŋe kâlewâŋen ariwerâm hin agep. Luâk arekŋe âi luâklupŋe yeŋgondo togombiâ hin makyenŋiep, “Wan me wan tatniŋdâp iregât damun kârikŋe akbei.” dêep.

¹⁵ Akto âi luâklupŋe are yeŋgât agak memeyeŋe akto âi memeyeŋe aregât keiŋe nâŋgâm kinmâ âi luâk siâ ikiyeâk ikiyeâk âi dopyenân puli hin yeŋgiep. Siâ ito momerâk akto siâ ito lâuwâ akto siâ ito konok puli lugumbo giep. Hain yeŋgim ikiye gem ariep.

¹⁶ Akto luâk ito momerâk miep arekŋe anŋi goanŋi âi mendo puli arekŋe puli oloŋdo ito momerâk siâkâ miawakto 10 agep.

¹⁷ Akto luâk ito lâuwâ miep arekâ hainâk anŋi goanŋi âi mem ito lâuwâkâ oloŋdo ito imbât miawagep.

¹⁸ Dâ luâk puli ito konok miep arekŋe âmâ humoŋaet puli are mem ari lâm kendâm ain heambukto yiep.

¹⁹ Akto manmâ manmâ sop kâlewâk akto âi luâk yeŋgât humoyeŋe are purik katmâ togoep. Togom âi luâklupŋe puli meyi are olop den heŋgemgowerâm agi.

²⁰ Akto luâk ito momerâk miep arekŋe puli siâkâ mem togo humoŋe are hin maganep, “Luâk humo ulikŋân gâŋe ito momerâk niŋen arekŋe âiŋe mem ito momerâk siâkâ yu meân.” dêep.

²¹ Hain dâmbo humoŋe arekŋe hin maganep, “Gâ âi luâk âlepŋe. Gâŋe âlepŋe dondâ agen. Gâŋe âi mem heŋgemgom wan me wan bâlensiâ ire damunŋe akmâ heŋgemgoen aregât nâŋe wan me wan ire hârokgât damunŋe kat gektere kambiamne âlepŋe aktâp aregât heronŋe ak.” dâep.

²² Akto luâk ito lâuwâ miep arekŋe togom humoŋe are hin maganep, “Ulikŋân gâŋe puli niŋen arekŋe âiŋe mem ito lâuwâ siâkâ meân.” dâep.

²³ Hain dâmbo humoŋe arekŋe hin maganep, “Gâ âi luâk âlepŋe. Gâŋe âlepŋe dondâ agen. Gâŋe âi mem heŋgemgom wan me wan bâlensiâ ire damunŋe akmâ heŋgemgoen. Aregât nâŋe gâ wan me wan dondâ iregât damunŋe kat gektere kambiamne âlepŋe aktâp aregât gâ hainâk kambiamge heronŋe agâk.” dâep.

²⁴ Akto luâk ito konok miep arekŋe togom humoŋe hin maganep, “Luâk humo nâ gâŋgât keige nâŋgân. Gâ luâk kârikŋe. Luâk siâŋe âi kâmetmap are gâŋe hindâm om nemat. Akto hân siâ luâk siâŋe sot koaŋe panmap ain gâŋe seŋgo orem om nemat.

²⁵ Hain akmat aregât gâŋgât hamewakmâ puli niŋen ire mem arim lâm kendâm ain heambuktere yemap. Wan me wan ire gâŋgât aregât meak.” dâep.

²⁶ Hain dâmbo humoŋe arekŋe hin maganep, “Gâ âi luâk bâleŋe. Gâ luâk konam. Akto luâk siâŋe kalam kâmelep ainba sot mem om nemat dât. Akto luâk siâŋe sot koaŋe panmap ainba seŋgo orem om nemat dât.

²⁷ Aregât puli ire siâ waŋmenâ âi mendo puli siâkâ mendât dâine togomân âmâ are mendere ârândân akbop.” dâep.

28-29 Akto damunyenjande tembe lokolupne hin makyenjiep, “Luâk bikjande wan me wan dondâ memai amâ nâje dondâ siâkâ yenjiwian. Dâ luâk siâje wan me wan getek memai amâ wan me wan bâlensiâ kinañbiap are meman aregât ito konok are mem luâk ito momerâk miep are wanjet.

30 Akto âi luâk konam are âmâ watbiâ ginjângen hândâknân are geâk. Ain gembo luâk âmbâle bâleje indem kambonmâ manbai are olop manbai.” Luâk kembu arekne hain dêep.

Yesuje mem potat nenekbiap.

31 Aregât lâuwâje makbe. Luâk akmâ geân nâ purik katbian sop ain pagalenân anjelolupne olop togom luâk âmbâle damunyeje akbian.

32 Akto lama damunjande lama potatmâ biken katyekmâ nânin biken katyekmâ akmap. Hain akmâ luâk âmbâle hârok enemnân mendugumbiâ mem potatmâ kâmot lâuwâ katyekbian.

33 Lama are âmâ bâte biken bungen katyekbian. Dâ nânin are âmâ kanegen katyekbian.

34 Hain akmâ damunyeje nâje luâk âmbâle bâte bungen kinbai are hin dâm makyenjiwian, “Ewene damun akmap arekne ulikjân hân himbim liunyelegewân bâte bânje manman âlepne katyenjiep are yenjimbo mem manmâ âgâm herone akbai.

35 Nâje sotgât mop agu agu mandere yeje sot om ninji. Akto tugât nângâm mandere yeje tu ninjiâ neân. Akto nâ kepia siân gâtne ina yeje kewugu nekmâ emetyenân katnegi.

36 Akto sângum bâlâk mandere yeje sângum ninji. Akto kundat akmâ mandere togom nekmâ

tân nuguyi. Akto humomolupnande kala busi kâlegen katnekbîa tatere togom okotyenje nângâm tân nuguyi.”

³⁷ Hain dâre luâk âmbâle agak meme âlepneâk akmâ manmai arekne den hâuñe hin makniñbai, “Humo, gâ maktât amâ bo nângâen. Amuten gâñe sotgât me tugât nângâmenâ giñion?

³⁸ Akto amuten gâ luâk kepia siân gâtne me sângum bâlâk manmenâ

³⁹ me kala busi kâlegen tatmenâ me kundat akmâ manmenâ tân guguyion? Nen amâ hain siâ bo akgiñion.” dâwai.

⁴⁰ Hain dâmbiâ damunyenje nâñe hin makyengiwan, “Nângât kâmolân gâtne siâ yâkgât kotne bo tatâp are yenje tângoyi are amâ nâ tân nuguyi dop aktâp.” dâwian.

⁴¹ Hain dâm makyengim benñe luâk âmbâle bânñe kanegen tatbai are amâ hin makyengiwan, “Ye luâk bâlenje. Ekenet. Anutunje Niambi akto yâkgât añelolupñe kâlâwân katyekbian dâm kâlâp kalep ain manñet.

⁴² Nâñe sotgât mop agu agu mandere yenje siâ bo om niñi. Akto tugât nângâm mandere tu siâ bo hâgâm gutmâ niñi.

⁴³ Akto nâ kepia siân gâtne ina yenje kewugu nekmâ emetyenân bo âgâ katnegi. Akto sângum bâlâk mandere yenje sângum siâ bo niñi. Akto nâ kundat agân me kala busi kâlegen katnekbîa talân sop ain bo togom negi.”

⁴⁴ Hain dâre hin makniñbai, “Woe, amuten gâñe sotgât me tugât nângâen me luâk kepia siân gâtne me sângum bâlâk manmenâ me kala busi kâlegen

tatmenâ me kundat akmâ manmenâ âmâ bo tân guguyion?" dâwai.

⁴⁵ Hain dâmbiâ hin dâwian, "Yeŋe nângât kâmolân gâtŋe geŋe are bo tânyenŋuyi âmâ yeŋe nâ hainâk bo tân nuguyi dop aktâp." dâwian.

⁴⁶ Hain dâm watyektere kâlâwân arim hâk hilâlâm dondâŋe nângâm âgâwai. Dâ luâk âmbâle âlepŋe amâ kewugu yektere manman âlepŋân manmâ âgâwai." dâep.

26

Yesuŋe mombiapgât makyenŋiep.

¹ Yesuŋe den are hârok makmâ metem sop ain hoŋ bawalupŋe hin makyenŋiep,

² "Nângâi. Homban kotŋe Pasowa aregât sop amâ hilâm lâuwâ akto miawakbiap. Ain luâk akmâ geân nâ lâwinân nuguwaigât mem miawak nek-bai." dâep.

³ Akto sop ain sumbe kat kat luâk akto Israe yeŋgât humomolupyenŋe arekŋe sumbe kat kat yeŋgât humoyenŋe siâ kotŋe Kaipa aregât emelan mendugum

⁴ Yesu hianŋim mem kondenŋe moâk dâm aregât yonâk maganŋi goanŋi agi.

⁵ Hain akmâ benŋe hin maganŋiyi, "Homban kâmbokŋân ire hain bo akberen. Ageine luâk âmbâle dondâ kuk akbiâ bugâ humo miawak-bopgât." dâyi.

Âmbâi siâŋe Yesu tu higenŋe âlepŋe pulianŋep.

⁶ Yesuŋe Betania keŋian luâk siâ diwi bâlenŋe agep kotŋe Simon aregât emelan talep.

⁷ Emelan tato âmbâle siâne tu higenne ukenne hâpurâ puliñe âgâ âgâne are mem yâkgâlân togoep. Togom tu higenne ukenne are Yesu sot nem tato ain yâkgât kautñân kâiep.

⁸ Akto Yesugât hoñ bawalupñande are ekmâ nângâmbiâ ârândân bo akto hin maganji goanji agi, “Wangât tu higenne ukenne ire yân kâiâp?

⁹ Nenne ire mem arim yenjenne dâine luâk bikñande puli humoñe puligombiâ puli are mem arim luâk umburuk yenjiwâen ina.” dâyi.

¹⁰ Hain dâmbiâ Yesuñe den are nângâm hin makyenjiep, “Wangât ye âmbâle iregât kakñân umatñe katâi? Hepunñet. Agak meme âlepñe dondâ akniñdâp are nânganñdere âlepñe aktâp.

¹¹ Luâk umburuk âmâ ye olop sop kâlep manbai. Dâ nâmâ ye olop sop kâlep bo manbian.

¹² Âmbâle irekñe tu higenne hâknân kâiâp ire âmâ sumân katnekbai aregât dopñe aktâp.

¹³ Nâ den bunñe makyenjiñe nângânñet. Hânñe hânñe âmâ den pat âlepñe ire makyenjiwai akto âmbâle irekñe wan me wan akniñdâp irekñe âkâ olowâk makbiâ yâkgât nângâwai.” dâep.

Yudasine Yesu hâkñe tunmâ puli miep.

¹⁴ Akto sop ain hoñ bawalupñe keiân lâuwâ are yengât hut yenân gâtñe siâ kotñe Yudasi Karioto gâtñe yâkñe sumbe kat kat luâk yengât humo-molupñe yengâlân ariep.

¹⁵ Arim hin makyenjiep, “Yenñe wan niñbiâ âmâ nânñe Yesu yâgâten tatberâp ain kewugu yekmâ arim ire dâm hekat yenjiñe membai?” dâep. Hain dâmbo puli koanñe 30 wanji.

16 Akto sop ain âmâ yâkne keiñe katmâ gain gain aktere Yesu meñet dâm aregât âi mem malep.

Yesuñe luâklupñe olop sot neyi.

17 Akto Pasowa homban aregât sop are miawakto hoñ bawalupñande Yesu hin magañi, “Emet wanân sot om katenñe numberen?” dâyi.

18 Hain dâmbiâ yâkne hin makyengiep, “Ye Yerusalem âgâm âmâ ain luâk siâ ekmâ âmâ hin magañbei, “Tiksañe hin maktâp, “Emelâk nâñgât sop ewumâk aktâp gârâmâ nâ hoñ bawalupne olop gâñgât emelan sot numberen.” tiksâ hain dâp.” dâwei.” Yesuñe hain dâm makyengim hungunyengimbo ariyi.

19 Arim Yesuñe magep hain akmâ sot songo are mem dumñân dumñân ketuguyi.

20 Akto emet engaiñe akto Yesu akto hoñ bawalupñe keiân lâuwâ olop sot nem tatmâ

21 yâkne hin makyengiep, “Nâ makyengire nâñgâñet. Yengât hutyenân gâtne siâne nâñgât gasa kewugu yekto menekberâi.” dâep.

22 Hain dâmbo nâñgâm biwiyenñe umatñe akto siâkâ ikinñeâk ikinñeâk hin magañi, “Amâ nâ mon?” dâyi.

23 Dâmbiâ hin makyengiep, “Luâk yu kondo konogân sot olop numberet irekñe nâ mem miawak nekberâp.

24 Anutunñe makto kulemgoyi aregât den bunñe akberâpñât âlepñe luâk akmâ geân nâ momberân. Gârâmâ luâk nâ mem miawak nekberâp are memenñande bo miep dâine owâñe agañbop. Amâ umatñe humo miawaganbiap.” dâep.

25 Hain dâmbô luâk kotņe Yudasi Yesu mem miawagep arekņe hin maganņep, “Apo, nâmâ bo me?” dâmbô Yesuņe hin maganņep, “Amâ ya gugak maktât are.” dâep.

26 Akto sot nem tatmâ Yesuņe sot siâ mem Anutu mepainņe mem âmâ munditmâ hoņ bawalupņe yengim hin makyengņep, “Ire mem neņet. Ire âmâ nânġât sunumne areġât dop.” dâep.

27 Akto wainņ hâpurâ siâ mem Anutu mepainņe mem âlepņe dâm maganņmâ kâim yengim hin makyengņep, “Ye hârok tu ire mem neņet.

28 Ire amâ Anutu olop irakņe dewatiakbaigât hepne amâ luâk âmbâle dondâ yâk yengât dosa bo agâġġât kâiwerân.

29 Nâ hinņe wainņ koaņe bunņe bo nemberân ġârâmâ yân manmâ hâmbâi Anutuņe lâuwâņe damunyeņe akberâm keiņe kato ain ye olop nem agak meme irakņe akmâ heroņe akbian.” dâep.

Yesuma Gesemane kalamân ariyi.

30 Hain dâm makyengimbo Anutugât kot mem agatmâ kep siâ membiâ bo akto arewa sopanmâ Oliwa gimbânġân âġâyi.

31 Âġâm ain hoņ bawalupņe hin makyengņep, “Anutuņe makyengimbo kulemgoyi bikņe hin tatâp.

Anutuņe hin dâep, “Nâņe lama damunyeņe kon-dere mondo lama are awam akmâ kâit akmâ metewai.”

Den pat bunņe miawakto menekberâm togom-biâ ye hamep akmâ hârok gem awam akmâ hanâk hanâk ariwerâi.

³² Akto nugumbiâ mondere han nugumbiâ monânba agatmâ arim Galilaia hânân lâmyengure Galilaia hânângen menduguwai.” dâep.

³³ Hain dâmbo Petoroñe hin magañep, “Gângât gasa togombiâ hamewakmâ ariwerâi me bo. Bo nângân. Dâ nâmâ bo hepun gekberân.” dâep.

³⁴ Hain dâmbo Yesuñe hin magañep, “Makginðere nângâ. Hândâk unak gâñe nângâ yâkgât kotñe bo nângâman dâm makyengimenâ âlâwu akto ainâk gokorok indewerâp.” dâep.

³⁵ Hain dâmbo Petoroñe kârikñe akmâ hin dâep, “Bo. Nâ gâ olowâk mombaet aregât hamep bo aktân. Akto nâ gângât kotge bo mem heambukberân.” dâep. Akto luâklupñe hârok hain dâyi.

³⁶ Akto arewa arim kalam siâ kotñe Gesemane ain ariyi. Ain arim Yesuñe hin makyengiep, “Ye in tatbiâ indâgen kinmâ Apo olop den magañgiweret.” dâmbo ain tali.

³⁷ Hain tatbiâ hutyeñânba Petoro akto Sebedaiogât nanlogâtñe meyekto bayi. Ba kinmâ biwiñe umatñe akto hin dâm makyengiep,

³⁸ “Ye âmâ iren damun tatñet. Biwine umatñe dondâ akto gain gain akberân aregât tân nugum tatñet.” dâm makyengiep.

³⁹ Makyengim hepun yekmâ getek indâñânba hânân ge tatmâ Anutu hin magañep, “Ewene unak umatñe miawak niñberâm aktâp aregât bo niñ dâm ulit ginðân. Gârâmâ gâñe âmâ nângât han nângâ nângâne bo watben. Guge hange nângâ nângâge watben.” dâm magañep.

⁴⁰ Hain dâm gutmâ yem tatbiâ yekmâ Petoro goañmâ hin magañep, “Ye wangât asiñ yendâi? Hinñe hepun yektân ina pâlmñe yendâi.

⁴¹ Biwiyeṇande âmâ laune lokowerâm aktâp. Dâ hâkyeṇe âmâ konam aktâp aregât agak meme bâleṇe arekṇe togom dop yeṅguwerâm akbopgât damun kinmâ Anutu ulilaṇṇet.” dâep.

⁴² Hain dâm makyenḡim purik katmâ bam lâuwâṇe hainâk Anutu maganep, “Ewene, gain gain nânḡât? Uṇak âi niṇen aregât makmenâ umatṇe miawak niṇâkgât nânḡât me? Hain nânḡâmenâ âlepṇe agâk.” dâm maganep.

⁴³ Maganmâ purik katmâ hoṇ bawa âlâwu asinḡât dondâ nânḡâyi aregât asinḡ yembiâ yegep.

⁴⁴ Akto hepun yekmâ bam âlâwuṇe Anutu hainâk maganep.

⁴⁵ Maganmâ metem purik katmâ yâk yeṅgâlân gutmâ hin makyenḡiep, “Woe, wangât asinḡ yendâi? Bâin. Emelâk Anutṇe ire miawak niṇbiapḡât huṅgun niṇdo luâk akmâ geân aregât galanande heninmâ gasalupne kewuguyekmâ togombo menekberâigât sop ewumâk aktâp.

⁴⁶ Gârâmâ bâin agatmâ indâre yekṇet. Nânḡât halop hogoâi ina togoâi. Agatbiâ arim penâyeṅḡine.” dâep.

Gasaṇe Yesu meyi.

⁴⁷ Hain dâmbo kinbiâ ainâk indâgenba Yudasine luâk dondâ sumbe kat kat luâk are yeṅgât humomolupyene yeṅgât kâmiti arekṇe huṅgun yeṅḡimbiâ bugâ soṇ soṇ membiâ Yudasine kewugu yekto togoyi.

⁴⁸ Akto luâk gasa kewugu yekto togoyi are âmâ Yudasi Karioto gâtṇe luâk arekṇe gasa tirip katyeṅḡim hin makyenḡiep, “Yesu are âmâ lokom maṅḡandere ekmâ âmâ hikom mem arinḡet.” dâm

makyengim kewugu yekto tâwât bugâ me son son mem togoyi.

⁴⁹ Togom gasa are ingon kinbiâ Yudasine Yesugât enemjân âgâm Humone dâm lokom manjanlep.

⁵⁰ Manjando Yesune hin maganep, “Gala, gâ wan me wan akniñberâm togoât are akniñmenâ mi-awagâk.” dâmbo gasa Yudasi olowâk togoyi arekne âgâ Yesu mem hikoyi.

⁵¹ Mem hikombiâ luâklupne yengâlân gâtne siâne tâwât mem olojmâ sumbe kat kat yengât humoyenjaet hon bawane siâ ondopneâk kârâm hârembo giep.

⁵² Hain akto Yesune hin maganep, “Luâk siâne tâwâtne kuk akberâm mandâp amâ siâne tâwâtneak kârâmbo mombiap.

⁵³ Gâ bo nângât. Nâne âlepne Ewene magandere dâine âlepne yâkne anelolupne dondâ niñdo tân nuguwâi.

⁵⁴ Gârâmâ nâne hain aktân dâine Anutune nune mombian dâm makyengimbo kulemgoyi denne are bunne bo akbop.” dâep.

⁵⁵ Akto sop ainâk Yesune luâk kâmot togoyi are hin makyengiep, “Ye tâwât bugâ lokom togoâi ire nâ me luâk kâmburâ siâ agañberâm togoâi? Nâ hilâmne hilâmne sumbe kat kat emetjân kinmâ den pat makyengiman. Sop ain menekbâi gâten.

⁵⁶ Anutune hârok nângâm makyengimbo kulemgoyi are yendâp are bunne miawagâkgât hinne meneknet.” dâmbo hon bawalupñande hamep akmâ hepunmâ gem awam agi.

Yesu den âiân kali.

57 Akto Yesu mem sumbe kat kat are yengât humoyeŋe kotŋe Kaipa yâkgâlân ariyi. Ain arimbiâ Mosegât den kepikmâ hekatyengimini are akto Yuda yengât kâmiti hainâk ain mendugum kili.

58 Luâklupŋe hamewakmâ arimbiâ Petoroŋe konok purik katmâ yonâk haminângen yonâk watyekmâ togom emet kili aregât ginŋânba ba sombeimân kilep. Bam âmâ luâk humo aregât tembe lokolupŋe yengât hutyenân tatmâ wan me wan aganberâi are ekberâm talep.

59 Tato sumbe kat kat luâk yâk yengât humoyeŋe akto Yudagât humomolupyene arekŋe luâk niŋande Yesugât agak meme are nâŋgâp are makto kone dâm lâmgom kili.

60 Hain akmâ luâk dondâŋe hiangim den aŋgâ hogom togo hâkŋân hâkŋân agi. Akto denyene aregât keiŋe nâŋgâmbiâ Yesu kombiâ mombiapgât dop bo agep.

61 Akto bâiŋe luâk lâuwâ siâ togom hin dâm hianjat, “Luâk irekŋe hin makto nâŋgâyiôt, “Nâŋe Anutugât sumbe kat kat emetŋe ire gagaim patakore awam akmâ yendo hilâm âlâwu kâlegen nunak mem metewom.” dêep.” dâyiât.

62 Akto sumbe kat katyengât kautŋande hutyenânba agatmâ kinmâ Yesu hin maganep, “Gâ wangât den hâuŋe siâ bo maknengiât? Den aŋgâ aŋgâ hogom togo hâkgân hâkgân aktâi iregât nâŋgâmenâ ârândân aktâp me bo? Gain gain maknengimenâ nâŋgâne?” dêep.

63 Hain dâm maganŋo Yesuŋe den hâuŋe bo maganmâ denŋe nâŋâk kilep. Akto humoyeŋe arekŋe totokomâk hin maganep, “Bâin, Anutu manman

kârikne amboņe yâkgât metenân kinden aregât makgiņdere maknengi. Gâ Anutuņe nanņe huņgun anđo gewiap dâmaen are me siâ?” dâep.

⁶⁴ Hain dâmbo Yesuņe hin dâep, “Âmâ gâņe ya maktât are. Aregât ye hârok hin makyenġiwe. Ewe-naet enemņân manman aregât luâk akmâ geân nâ himbimânba hamandat kakņân gem âmâ hârok damunyene akbian. Ain âmâ nekbai.” dâep.

⁶⁵ Hain dâmbo humoyene arekne den are nânġâm biwiņe kâlâp akto aregât ikinġe sâņgumņe mem duwatmâ galalupne hin makyenġiep, “Bâin, siâņe siâ siârâm akbiâ den âi humo membâen.

⁶⁶ Luâk ire âmâ Anutugât kotne mem bâlimbo nânġâen aregât ye gain gain nânġâi?” dâep. Hain dâmbo luâk âmbâle mendugum kili arekne Yesugât hin dâyi, “Emelâk bugâgât pat aktâp aregât moâk.” dâyi.

⁶⁷ Hain dâm enemņân tâwutkoyi. Akto bikņande ondopne kom hogom hin maganġi,

⁶⁸ “Anutuņe huņgun niņdo geân dâmat aregât bunne akto âmâ aregât kârikņân konmâ ondopge hogoâp aregât kotne kon.” dâyi.

Petoroņe Yesugât munen agep.

⁶⁹ Akto Petoro inġon emet aregât giņņân tato ainâk hoņ âmbâle siâņe ekmâ hin dâm maganġep, “Gâ Yesu olop Galilaia hânân maliat are me?” dâep.

⁷⁰ Hain dâmbo luâk hârok dewunyenân are bo nânġân dâm hin magep, “Nâ luâk kondât are bo nânġandân. Akto den maktât aregât keiņe bo nânġân.” dâep.

⁷¹ Hain dâm arim âmâ sombeim giņņân kindo âmbâle siâņe ekmâ luâk âmbâle ain kili are hin

makyengiep, “Woe, luâk ire amâ Yesu Nasarete gâtne yâk olop manmandat are.” dâep.

⁷² Hain dâmbo hin magep, “Nâ Anutugât metenân den bunne makgindere nângâ. Nâ luâk are bo nângân.” dâep.

⁷³ Hain dâm getek ba kindo luâk enemnân kili arekne Petoro hin maganji, “Yesu amâ Galilaia hânân gâtne. Gâ den maktât are amâ Galilaiane makmai han hainângen maktât aregât gâmâ Yesu olop mali areyengâlân gâtne.” dâm maganji.

⁷⁴ Hain dâmbiâ Petoro kârikne akmâ hin dâep, “Woe, hinne heyengiwerân amâ benne Anutune nugumbo momberân aregât makyengire nângânet. Nâ yenje luâk kotne kondâi are bo ekman.” dâep. Hain dâmbo arekneak gokorok indiep.

⁷⁵ Indembo nângâm Yesune den hin maganep are hanjân ga miawagep, “Gâ gokorok bo indemboâk nângâ yâk bo nângâ anman dâmenâ âlâwu akbiap.” dâep are hanjân ga togombo nângâm dondâ indiep.

27

Yudasine hip meagep.

¹ Akto emet haundo sumbe kat kat yengât humoyene akto Israe yengât kâmiti arekne Yesu kombiâ mombiapgât den maganji goanji agi.

² Hain akmâ tâkne hikom mem kiap kotne Pilatogâlân ariyi. Ain arim wanbiâ tembe lokolupnande kala busi kâlegen kali.

³ Akto luâk kotne Yudasî Yesugât gasa kewugu yekto meyi arekne Yesu kondenne moâk dâm kili are yekmâ hanje purik kato puli koane 30 waji

are mem purik katmâ arim sumbe kat kat yengât humomo akto kâmiti hin makyengiep,

⁴ “Nâñe Yesu dosañe bo ina bâleñe agandere mem kombiâ momberâp aregât dosa humo aktân.” dâmbo hin magañi, “Maktât are amâ gânğât dosa aregât guge henğem guguwiap.” dâyi.

⁵ Hain dâmbiâ biwiñe bâlimbo puli koañe are sumbe kat kat emetñân ain pando hânân gembo sopanmâ ari ikinje hikoagep.

⁶ Akto sumbe kat kat luâk yengât humomolupyenande puli koañe are pitim mem hin dâyi,

⁷ “Puli ire amâ luâk moâkgât puli kat katñe ina emet iregât katenñe bo ârândân akberâp. Aregât gain gain akberen?” dâm magañi goañi akmâ puli arekñe luâk siâ umbâ ketugumap yâkgât kalam siâ puligoyi. Hân are puligom hin dâyi, “Hân ire amâ hin akbiap. Luâk kâlewângenba togom manmâ mombai are in hanyenğuwaen.” dâmbiâ hain arekñe bunñe agep.

⁸ Hain akmâ hân aregât kotñe Hepgât hân koli. Akto kot are hinñe hainâk yendâp.

⁹ Hain aregât benñe Anutñe ulikñân makto Propete siâ kotñe Yeremianje hin kulemgoep, “Is-rae luâk siâ moâkgât puli koañe 30 gasañe wanbai.

¹⁰ Hain katbiâ puli are purik kato mem luâk siâ umbâ ketugumap yâkgât kalam puligowai. Are âmâ Humoñe makniñep.” dâm kulemgoep. Den are bunñe miawakto sumbe kat kat luâk akto kâmiti arekñe kalam are puligoyi.

Kiapñe Yesu moâkgât makmâ hâriep.

11 Akto sop ain Yesuṇe kiap kotṇe Pilato yâkgât enemṇân kindo hin aikoep, “Yuda yengât luâk humoyeṇe are gâ me?” dâmbō hin dâep, “Amâ gâṇe ya maktât are.” dâep.

12 Akto luâkṇe Yesu meyi arekṇe den aṇgâ aṇgâ hogom hâkṇân hâkṇân agi. Hain akbiâ den hâuṇe siâ bo makmâ yânâk kilep.

13 Hain akto Pilatoṇe Yesu hin maganep, “Nângâ. Den aṇgâ aṇgâ hogom togo hâkgân hâkgân aktâi aregât gâ den hâuṇe siâ wangât bo makmâ kindât?” dâep.

14 Hain dâmbō Yesuṇe den hâuṇe bo makmâ yânâk kilep. Kindo Pilatoṇe den hâuṇe bo magep aregât nâṅgâmbō bimbiâk agep.

15 Akto sop ain Pasowa homban aregât kala busi kâlegen gâtṇe aregât ukenyenjaet akmâ kotṇe konbiâ are watmâ akminep.

16 Aregât Pilatoṇe nâṅgâm Yesu me bâleṇe luâk siâ kotṇe Baraba are watere yânṇângen ariâk dâm malep.

17-18 Akto Pilatoṇe hingât nâṅgâm, “Sumbe kat kat are yengât humomolupyenande, “Luâk âmbâle hârokṇe Yesugât kotṇe mem agatbiâ nengât kotnenṇe gewop.” dâm nâṅgâmbiâ bâlimbo aregât mem nâṅgâlân togoâi.” dâm nâṅgâm aregât hin makyengiep, “Niṇe Baraba me Yesu Anutuṇe huṇgun aṇdo giep dâmai are watere yengâlân geâkgât nâṅgâi?” dâep.

19 Akto Pilatoṇe ainâk tatmâ den siâ siâ nâṅgâm heṇgemgom kilep ainâk âmbenṇande yâkgât den katmâ hin magep, “Nâ asinân giwet siâ Yesu ekmâ heṇgemgom hanoko aktân aregât Yesu dosṇe bo

are bâlene bo aganben.” dêep.

²⁰ A hârok nângâm heŋgemgom tato âmâ sumbe kat kat are yengât humomolupyene kâmiti luâk âmbâle are hanyenân gem wâragi. Akto hin makyengi, “Konmâ wârakbiâkâ Pilatoŋe Baraba hepundo gembo âkâ tembe lokolupŋande Yesu kombiâ moâk.” dâyi.

²¹ Hain dâmbiâ Pilatoŋe lâuwâŋe hin makyengiep, “Ye luâk lâuwâ ire yâk hutyetŋân niŋe hepundere geâkgât nângâi?” dâmbiâ hin dâyi, “Baraba.” dâmbiâ hin makyengiep,

²² “Dâ Yesu Anutuŋe huŋgun aŋdo giep dâmai ire amâ gain aganberângât nângâi?” dâmbiâ hârokŋe hin dâyi, “Lâwinân kombiâ moâk.” dâyi.

²³ Hain dâmbiâ hin makyengiep, “Woe, keiŋe wangât akto bâlene wan agep aregât kombiâ moâk dâi.” dêep. Hain dâmbiâ hin dâyi, “Hanâk lâwinân kombiâ moâk.” dâm wâragi.

²⁴ Pilatoŋe mem mulunyekto den gulip milip dondâ akbiâ ekmâ nângâm dâmbiâ tu hâgâm wanbiâ yâk yengât dewunyenân bâte pulim hin magep, “Luâk dosa bâlâk manmap iregât dosane nângâlân bo hâtikowiap. Yeŋeak heŋgemgoŋet.”

²⁵ Hain dâmbiâ dâyi, “Kombiâ momberâp aregât dosa amâ nengâlân akto nengât nan baratlup-nenŋe yengâlân miawakmâ âgâwiap.” dâyi.

²⁶ Hain dâmbiâ Pilatoŋe Baraba hepundo yâk yengâlân giep. Dâ tembe loko makyengimbo Yesu âmâ bugâne kombiâ hâk hilâlâm nângâmbo lâwinân kondenŋe moâk dâm mem ariyi.

Tembe lokoŋe Yesu kom hâk hilâlâm wanŋi.

27 Akto tembe lokoŋe Yesu mem kiap humogât kala busi kêlegen mem âgâyi. Mem âgâm tembe loko hârogâk yengonbiâ togoyi.

28 Togombiâ den hembalik mângim hin dâyi, “Woe, luâk humo.” dâm giriŋaŋmâ sângum gilâm siâ luâk kembuŋe lalakmai hain are lalaŋmâ

29 tâk dâtâ dâtâ siâŋe irimut ketugum kautŋân kaunjaŋi. Akto kêro siâ bâteŋe bungen katbiâ miep. Hain mendo togo enemŋân pâwutyenŋe ligim katmâ hin dâyi, “Woe, Yuda yengât luâk kembuyenŋe.” dâm hiaŋgim giriŋaŋi.

30 Hain dâm tâwutkom kêro arekŋe kautŋân oreyi.

31 Hain akmâ sângum gilâm are hilonmâ ikinŋe sângum lalaŋmâ lâwinân komberâm mem ariyi.

Yesu lâwin parâŋân koyi.

32 Mem arim dâwân luâk siâ egi are kotŋe Simon Kirene hânân gâtŋe wârakmâ tatbiâ Yesugât lâwin are lokombo ariyi.

33 Arim hân siâ kotŋe Goligata aregât den purikŋe âmâ kaut hagitŋe ain ariyi.

34 Arim âmâ waiŋ akto biwi gulip tu kâim mendugum waŋbiâ getek nem nâŋgâm borâep.

35 Akto lâwinân kom mem anuŋbiâ kindo sângumŋe memberâm kotyenŋe kulemgom kotyenŋe umbân panbiâ gembo bâtyenŋe panbiâ gembo kot siâ mem olonbiâ luâk kotŋe miawagep arekŋe Yesugât sângum are meyi.

36 Akto ain tatmâ Yesugât damun kili.

37 Akto kom kautŋân lâwin ulikŋân kulem kulemgoyi aregât keinŋe hin, “Ire âmâ Yuda yengât luâk kembu.”

³⁸ Akto bugâ koko kâmburâ lâuwâ siâ Yesugât gasomņe biken biken lâwinân yetkuyi.

³⁹ Akto luâk âmbâle gam ariyi arekņe Yesugât den hilit balit aganņmâ hin dâyi,

⁴⁰ “Woe, gâņe hin dâmat, “Sumbe emetņe gagaim hilâm âlâwu kâlegen lâuwâņe ketuguwian.” dâmat aregât kârikņe akmâ lâwinânba ge. Gemenâ benņe gâ bunņe Anutugât nanņe dâweren.” dâyi.

⁴¹ Akto sumbe kat kat are yengât humomolupyņe akto Mosegât den kârikņe makyengimini arekņe hainâk den hilit balit aganņmâ hin dâyi,

⁴² “Luâk angâ âmâ tân yengumap. Dâ ikinņe âmâ wangât bo tânaguâp? Akto Israe nengât kembu dâmap inarekņe lâwinânba gembo ekmâ amâ den are bunņe dâm nâņgâweren.

⁴³ Akto, “Nâmâ Anutugât nanņe aregât tân nuguwiap nâņgân.” dâmap aregât Anutuņe tângombo lâwinânba gembo bunņe dâweren.” dâyi.

⁴⁴ Hain dâmbiâ luâk bâleņe lâuwâ biken biken lâwinân yetkum hikoyelegi areâkâ hainâk den bâleņe maganĵiat.

Yesu moep.

⁴⁵ Akto hilâm tânâmņân ainâk hândâk humo dâgâm yendo engainņe agep.

⁴⁶ Engainņe akto Yesuņe ikinĵaet denân kot hin kolep, “Eli Eli lama sabaktani?” dâep. Aregât purikņe amâ, Humone wangât hepun nektât?

⁴⁷ Akto luâk kili bikņande den are nâņgâm hilip koyi aregât hin dâyi, “Âure nâņgâņet. Elia kondâp.” dâyi.

⁴⁸ Hain dâmbiâ siâne pârigim arim sângum pa-
pañe siâ kâroân bigeim bigeim wain ñasukñân
panmâ mem neâk dâm Yesugât launân katmâ
kilep.

⁴⁹ Hain akto galalupñande hin magañi, “Hepun.
Eliane bunne himbimânba gem tângombo
lâwinânba gewerâp me bo aregât ekmâ kinne.”
dâyi.

⁵⁰ Hain dâmbiâ Yesune lâuwâne kârikñeâk kam-
bonmâ ainâk moep.

⁵¹ Mondo ainâk sângum sumbe kat kat emetñân
kinminep ina tânâmñânba duwalakmâ hâreagep.
Hain akto wârîñ humo mendo kât humomo hogo
agep.

⁵² Akto sum bikñe kepik akto Anutugât luâk
âmbâle ulikñân moyi are yengâlânba dondâne
agatmâ bam guli.

⁵³ Sum hepunmâ agatmâ âmâ benñe Yesu agalep
sop ain Yerusalem kepiân arimbiâ luâk âmbâle
dondâne yegi.

⁵⁴ Akto Yesu moep sop ain tembe loko humoyeñe
siâ akto Yesu damunñe akmâ kili arekñe wârîñ
humo are nângâm akto wan me wan miawagep
are ekmâ hamep keirâk akmâ hin magi, “Woe,
luâk ire amâ Anutugât nanñe bundâk.” dâyi.

⁵⁵ Akto âmbâle bikñe ain kili arekñe getek
kâlewânâk kinmâ egi arekñe Galilaia hânânba
Yesugât hoñ bawa akbiâ olop mali.

⁵⁶ Areyengât hutyenân gâtñe amâ kotyeñe hin,
Maria Madala kepiân gâtñe akto Maria siâ âmâ
Yakobo siâ akto Yose yâk yetgât memeyetñe
akto âmbâle siâ Sebedaiogât nanlogâtñe yetgât
memeyetñe.

Yesu hangoyi.

⁵⁷ Akto emet dâgâwerâm akto puli sikumdâ luâk siâ Yesu nânğanmai yengâlân gâtñe Arimataia kepiân gâtñe kotñe Yosepe are togoep.

⁵⁸ Arekñe togom Pilato hin aikoep, “Gain nânğât? Yesugât hâkñe mem arim hangowerân. Âlepñe me?” dâmbo Pilatone âlepñe dâm tembe loko makyengimbo bam Yesugât hâkñe lâwinân ba mem gutmâ Yosepe wañi.

⁵⁹ Wañbiâ mem bam sânğumñe kau kau siâ mem Yesugât hâkñe are katipkoep.

⁶⁰ Hain akmâ mem ari kât dâpñe parâ parâ siân Yosepeñe mondere in han nuguwai dâm kendâep ain katmâ kât humo siâne hâkokombo tigiep. Hain hâkokombo tigimbo Yosepe Arimataia gâtñe ariep.

⁶¹ Akto Maria Madala gâtñe akto Maria siâ are olop Yosepeñe Yesu kât dâpñân kato talep ain tal-iat.

⁶² Akto emet haundo Sarere akto sumbe kat kat are yengât humomolupyene akto Parisaio luâk arekñe Pilatogâlân ariyi.

⁶³ Arim hin magañi, “Humonnenñe, Yesugât ulit giñdenñe gain nânğât? Yesu hiangi luâk arekñe malep sop ain den siâ hin magep, “Nugumbiâ mondere han nugumbiâ hilâm âlâwu akto ain âmâ momonânba golâ akmâ agatbian.” dâep.

⁶⁴ Hain gârâmâ gâne tembe lokolupge bikñe makyengimenâ sum dâpñe are gisapkom hengemgombiâ kindo hilâm âlâwu bo akbiap. Ageine hoñ bawalupñande togo hâkñe are lokom ari siângen hangom luâk âmbâle makyengim, “Emelâk sumânba agalep.” dâmbiâ sum pum are

ekmâ bunne dâmbiâ hiangi den arekne sambelem arim âmâ ulik gulik ewangiwoy.” dâyi.

⁶⁵ Hain dâmbiâ Pilatonê hin makyengiep, “Yenê nângât tembe lokolupne bikne meyekbiâ arim yenêak maktâi hain akmâ sum dâpne are tigim golâk tatmâ damunne akmâ kinbei.” dâep.

⁶⁶ Akto arim sum dâpne are tigim hengegombiâ tembe loko bikne kât aregât damun kili.

28

Yesu agalep.

¹ Akto Sarere bo akto emet haundo Sonda hândâktâk Maria Madala gâtne akto Maria siâ arekne sumângen ariyat.

² Akto ainâk wârin humo miep. Akto Humogât anelo siâne himbimânba gem kât humo are hâkokombo arimbo âgâ kaknân talep.

³ Akto anelo aregât enem dewunne pagalene akto sângumne kau kau hainare agep.

⁴ Hain akto tembe loko ain kili arekne yâkgât hamewakmâ ongâye hogombo sân sân mem ge hân tete luâk momonande yemai hain yeyi.

⁵ Akto anelo arekne âmbâle lâuwâ are hin makyetkiep, “Yet âmâ bo hamep aget. Yet Yesu lâwinân koyi are ekberâm togoatgât nângân.

⁶ Yâk in bo yendâp. Yâk uliknân magep hain akmâ emelâk agatâp. Yet gutmâ gewâkne ire eget.

⁷ Ire ekmâ nângâm hengegom âmâ benne dowâk arim hon bawalupne iregât makyengiet. Akto siâ hin makyetkire nângâet. Yâk emelâk Galilaia hânân yâkne son ariwerâm ariâp gârâmâ ye aregen arim ekbei.” dâep.

8 Hain dâmbô âmbâle lâuwâ arekne hamep agiat. Dâ biwiyetjande herone humo agiat. Hain akmâ sum are hepunmâ honj bawalupne makyengiwerâm pârigim kepiangen ariyat.

9 Akto Yesune dâwân yelekmâ hin makyetkiep, “Âmbâi lâuwâ.” dêep. Akto âmbâi lâuwâ arekne enemjân bam ge hânân tatmâ keinjân mem herone agiat.

10 Hain akbela Yesune hin makyetkiep, “Yet bo hamewakmâ âmâ arim nângât galalupne are makyengimbela Galilaia hânân ariwei. Arimbiâ nâmâ ain arire nekbai.” dêep.

11 Akto âmbâi lâuwâ are dâwân arim manbela tembe loko sum damunne kili arekne kepia humoân ariyi. Arim wan me wan miawagep aregât den pat are sumbe kat kat luâk yengât humomolupyene are makyengi.

12 Akto sumbe kat kat yengât luâk humomolupyene akto kâmiti luâk arekne yenêak mendugum den maganji goanji akmâ tembe loko are puli dondâ yengi.

13 Hain akmâ hin makyengi, “Ye âmâ hin makbei, “Nen asinj pâlmne yem mandenne Yesugât honj bawalupjande hândâgân togom hâkne are petâm lokom ari siângen hangoyi.” dêwei.

14 Dâ kiap Pilato arekne den ire nângâmbo âmâ nenne den siâ magandenne ye hin me hain bo akyengi.

15 Hain dâmbiâ tembe loko arekne puli mem yâkne den makyengi are watmâ hain agi. Akto den pat hianji arekne Yuda luâk yengâlân sambelem metiep. Aregât Yuda luâkne den are hinne

hainâk makmâ manmai.

Yesuŋe aposolo miti âi yengiep.

¹⁶ Akto hoŋ bawalupŋe keiân konok yenêak Galilaia hânân ariyi. Arim gimbâŋe siâ ain togowei dâm Yesuŋe tirip katyengiep gimbâŋe ain togoyi.

¹⁷ Togom Yesu ekmâ heronŋe agi. Bikŋande nânŋaŋmâ âmâ kotŋe konmâ nânŋâmbiâ humo agep. Dâ yâk yengât bikŋande âmâ nânŋâ nânŋâyeŋe lâuwâ âlâwu agep.

¹⁸ Akto Yesu enem yenân gutmâ kinmâ hin makyengiep, “Anutu Ewenande meme akniŋdo hân himbim me wan me wan hârok damunyeŋe akmâ manmâ âgâwian.

¹⁹ Aregât ye arim luâk âmbâle hârok hânŋe hânŋe manbai are makyengimbiâ bikŋande bi-wiyeŋe nânŋâlân katbai are mem tuân katyekbei. Ewene akto nâ akto Heak nen konokgât akten aregât kotnenŋe konok are konmâ tuân katyekbei.

²⁰ Hain akmâ benŋe wan me wan den kârikŋe makyengiân are hârok makmâ miawakmâ metewei. Dâ âi ire âlepŋe agâkgât nânŋe hokboâk hokboâk tânyenguwian. Hain akmâ tân yengum manmâ âgâre sop bo akbiap.” dêep.

Yusugât Pat Âlep Den
The New Testament in the Timbe Language of Papua
New Guinea
Nupela Testamen long tokples Timbe long Niugini

copyright © 1987 Wycliffe Bible Translators, Inc.

Language: Timbe

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 18 Mar 2025 from source files dated 31 Aug 2023

03f82704-6ad1-5094-a78e-e240d9f2d4f8